

# **ENDUATA ANG OO NKANISANI NAATII ENKOP OLMAASAI**

**Kaitarasaki intae ena buku pee iasishore nishetietie kanisa te nkop Olmaasai. Enkitanyaanyukoto ena pee aaret ilairukok tenebo ilarikok pee etum induaat sidain naaing'uaa Enkai, nesuj sii pee elo dukuya abulu kanisa enye oleng tengolon Olaitoriani lang Yesu Kristo. Aiuloko klusta natii Olkoroi (Mara South) kake keidim atasishore sii ena buku Inkulie klusta's aashu anisani tenkop o Lmaasai.**

**Olaigeroni: Paul Highfield oji sii Saruni Ole Ntaysia te nkop Olmaasai**

## **ERISHATA NAIGEROKI O COPYRIGHT 2014.**

Ore copyright naa enena ampuni naji Christian Restoration Ministries, 3247 N. Nixon Ave., Springfield, MO 65803 USA. Ore enkampuni naitobira kuna bukui naa keji Evangel Publishing House P. O. Box 28963-00200 Nairobi Kenya – [www.evangelpublishing.org](http://www.evangelpublishing.org). Ore pee iyieu niyiolou enaipirta kuna bukui tisiraki Cosmas Lemein te Box 110, Narok, Kenya, aashu email enye te: [cplemein@gmail.com](mailto:cplemein@gmail.com). Ore nampai e simu enye naa: Safari com – 0725975651; Yu - 0754470706. Toliki sii ninye tinidol inkitapong'ot tiatua ena buku. Tadamu sii ajo ekiata website natii kuna bukui pooki e Kimaasai naa ena: aashu <http://www.maakenya.com>. Ore pee iyieu niliki Olaigeroni Paul Highfield shakenisho ino tenkaraki eretoto ena buku, indim aigeroki ninye te email enye te: [prhighfield@mchsi.com](mailto:prhighfield@mchsi.com). Ataasishore ina oshi Bibilia nikiata te Kimaasai (1991version).

**Ilairetok:** Cosmas Lemein, Cosmas Yenko, James Nkurumua, Simon Parmuat, Isaya Shakua, Isaak Mampalu, Daniel Sakeri, Daudi Koshal, Petero Olormaitai, Abraham Koshal, Paulo Meing'ini, Yohana Parmeres, Jeremiah Narok, Patrick Nkoyo, Kuseyo Ntayia, Matayo Mpario, Kelvin Salenoi, Peter Nanteya, Ben Ntayia, John Ole Dukuny, Thomas Shololoi, Oloshipa Rogei, Jackson Pirikany.

# IMBAA E DUKUYA

## (Introduction)

Ketii ai buku naigero naji "Induaat naarikoo Kanisa." Ore tiatua ina buku aimaka imbaa naaipirta induaat e Kanisa te eumata naa tinimiata ina buku esidai tinitum nisom pee eaku olkitamanyunoto le nena baa naati ena buku ng'ejuk. Amu keibung'akino oleng.

Keipirta ena buku ng'ejuk enduaata nabo e kanisa tenebo isipat o nkisomaritin naaipirta ina duaata o nena sipat. Aiuloko klusta Olkoro, naji sii Mara south, pee aimaki inkanisani naaje naaibala. Kake ore to Itau lai kayieu neasishore sii inkulie kanisani too wuejitin pooki pee etum induaat sidain naaret inkanisani aapuo dukuya te nkirowuaj. Neaku inkanisani naata biotisho Olaitoriani nesujita Enkai, Yesu o Enkiyang'et Sinyati te nkoitoi naishiakino.

Kayieu neretu sii ena buku inkanisani pee elikioo ororei le Nkai too Itauja sidain, te ng'iriata o te nkitieunoto. Neiteng'en sii iltung'ana pee eiruk, neirridu, neibalunyie enkarna e Yesu o enkirukoto enye, neibatisai. Nepuo dukuya aaiteng'en ninche pee eiteng'en sii ninche ilkulikai.

Nayieu sii nadol inkanisani naanyokita oleng aaret ilkulikae to olng'ur sapuk te murua. Keaku shakenisho sidai pee edol aajo ekinyor ninche. Kake kinteng'en ninche aajoki pesho tenetum intokitin pooki tena kop tenemeata Yesu anaa enalimu Marko 8: 36 tenebo Yohana 15: 5.

Matadamu pee kinteng'en nena kisomaritin naatii ena buku kila olari pee eibung'a iltung'ana le kanisa ang. Kesipa meidimayu pee inteng'en imbaa pooki telulung'ata kila olari kake tegelu inkisomaritin naaret iltung'ana pee eibung nena baa naata tipat oleng. Ore te likae ari nigelu inkulie kisomaritin neitu iasishore ilo ari otulusoiyie. Miureyu sii iponaa ilkulikae kererin leitu adamu nanu.

Matonyok amu ore pee meeta kanisa induaat, nemelo dukuya aitobiraki. Netiuu anaa emeli tiatua enaiposha nareuta enkijape ake. Keimaki Paul ina bae te Efeso 4: 14 pee ejo, *"..pee mikintoki aaku*

*nkera, naanang'ari idie o idie to lkutati ake pooki le nkiteng'enare, olosek loo ltung'ana tiatua esunkureisho o losekin le lejare."* Keipirta ele kereri tipat pee kiata ilarikok oorikoo kanisa kake ore esiai sapuk oleng naas ilarikok naa inchere keiteng'en kanisa metusuja enduaata Enkai. Ina oitoi easishore pee meitapong'oo iyiook imbaa enkop. Neaku, kenare nikidamu pee kimbelekeny indamunot enkop meibung'a induaat Enkai alang tinikimbelekeny induaat ang o ndamunot ang anaake metanyaanyukie enkop. Amu, mesuj enkop induaat naaing'uaa Enkai neaku ina pee eyieu Enkai netii kanisa tena kop pee kiutaki iltung'ana enduata e Nkai. Keeta enkop ilosekin kumok kake tinikisuj enduata Enkai keaku olkitamanyunoto sidai oleng oret iyiook pee kipuo dukuya te sipata o te ewang'an.

***"Mme iyiook, Olaitoriani, mme iyiook kake enkarna ino nchoo enkisisa, tenkaraki enyorrata ino nauno o sipat inono!"***  
(Olkerempe le Nkai 115: 1).

# ENDUATA ANG OO NKANISANI NATHI ENKOP OLMAASAI

**ENDUATA ANG: Ekinyor Enkai o Ikkulikae aajing enkipankata enye (Keji "mission" te Kingeresa.)**

**(Ore pee kijo "Enkai" naa kigira aaimaki Enkai, Enkiyang'et Sinyati tenebo Yesu Kristo Enkerai e Nkai)**

**Enkoittoi enduata ang**

- Ekinturukie imbaa Enkai te nkishui ang o te kanisa.
- Ekinteng'en iltung'ana enkoittoi enjeunoto pee eiruk Yesu, neirridu ng'ok enye, neibalunyie enkirukoto enye, neibatisai.
- Nikintutum ninche olkulikae airukok,
- Nikintubulu ninche pee eeku ninche ilasujak le Yesu neas isiaitin e kanisa,
- Niking'oru sii inkoittoi pee king'arie ilkulikae enyorrata o lng'ur le Kristo. (Aanyor ilkulikae)

**Ore isipat o iasat naarikoo ina kipirta naa kuna:**

**Ilairukok pooki:**

1. Ekisis Enkai nikiomon tenebo te seremare.
2. Ekiisom ororei le Nkai nikimbung tiatua iltauja lang nikisuj sii.

**ENDUATA**

Aanyor  
Aajing

**ENKOITTOI**

Aiturukie  
Aiteng'en  
Aibatisa  
Aitutum  
Aitubulu  
Aing'urrie

Ekiisom oopeny, nikisom tenebo ilmareita lang aaiteng'en inkera, nikisom too lturrurri.

3. Ekiomon Enkai anaake te nkishui ang maate pee kishukoki ninye enashe, nikisis ninye, nikiomonoki ilkulikae, nikiliki Enkai inkolati, nikiomonoki sii eng'eno o engolon naing'uaa enetii ninye.
4. Kiuloki aaliki ilkulikae ilomon supati aa oltung'ani obo aashu ilkumok.
5. Ekintutum ilturrurri loo ltung'ana ooata enkipirta aibung'akino enkipankata (mission) Enkai.
6. Eking'oru oltung'ani likitumore pee kiomon tenebo nikiretu olikae olikae.
7. Ekiretu kanisa olkulikae ooata inkolati too ropiyiani o too nkulie masaa.
8. Ekinyorraa aibung enkoitoi e Yesu o esiai enye too ltauja lang pooki pee kiaku ilasujak le Yesu.
9. Ekiun inkanisani ng'ejuko.
10. Ekintodol ilkulikae olng'ur o enyorrata e Yesu.
11. Ekiasishore inkishoorot ang te nkisisa Enkai nikijing enkiteng'-enare nairirikino esiai nikiyieu nikias pee kias aitoliraki te yiolounoto o te ng'eno.
12. Ore te kanisa nikijo kinteng'en iltung'ana, aa inkera, elelero, oltung'ana kituak aitoliraki pee eyiolou Bibilia, Enkai, Yesu o esiai enye te kanisa o te nkipankata Enkai.
13. Ekinteng'en enkoitoi enjeunoto o enkoitoi e sinyatisho telulung'ata o aitoliraki.
14. Ekinyok oleng aasis Enkai te ndaa Olaitoriani kila Jumapili.

### **Ilarikok le kanisa:**

1. Ekirikoo kanisa tenyorrata, olng'ur, emborron, o teng'eno naing'uaa Enkai.
2. Ekiomon oleng nikitumo sii aaimaki imbaa e kanisa pee kitum induaat sidain naaipirta embulunoto e kanisa o enkoitoi nikiasishore nikiramat sii intokitin pooki e kanisa,

- tenkitanyaanyukoto, enkaji e kanisa o enkiwanja e kanisa.
3. Ekigelu komiti naipanka imbaa e kanisa netum induaat o nkipankat. Nepuo dukuya aas te nyuaata. Ore pee meas nikirorie ninche.
  4. Ekiimbung enkoitoi e sinyatisho aakurraki pee kiaku enkitanyaanyukoto too lkulikae.
  5. Ekinteng'en ilairukok likitegelutua pee eaku ilarikok neitoki ninche aaiteng'en ilkulikai anaa enajo 2 Timoteo 2: 2.
  6. Ekinteng'en ilairukok le kanisa metayiolaito inkishoorot enye nikinkok pee egelu isiaitin naairirikino inkishoorot enye. Niking'oru sii enkoitoi pee etum enkiteng'enare nairirikino inkishoorot enye metaasa isiaitin enye aitobiraki.
  7. Ekiimbung sii kuna sipat tomon oong'uan naati shumata kuna aakurraki pee kiaku shakenisho too lkulikae airukok te kanisa.
  8. Ekinyok pee kishet naboisho tenebo inkulie anisani ang te klusta ang to Lkoroi aa inchere te klusta e Mara South, tenkitanyaanyukoto, kinyorraa pee kinyok aaponu entumo kila olapa pee kiimaki imbaa, niking'ar indamunot, nikintagol olikae olikae, nikiomon Enkai pee kitum induaat sidain.
  9. Ekirrip kanisa nikiramat inyamalaritin e kanisa aasioki.
  10. Ekibaiki iltung'ana le kanisa pee kining inyamalaritin enye nikiomonoki ninche nikinteng'en ororei le nkai nikintagol sii.
  11. Ekinteng'en aaitobiraki lelo pooki oojo keyieu neibatisai. Nikinteng'en ajo ore enkibatisa naa keipirta empalakinoto oong'ok, eng'amunoto Enkiyang'et Sinyati, o enkiabung'ata enkoitoi e Yesu tiatua enkishui enye. Nikinteng'en sii enaipirta imayianat tenebo imbaa naagol naaponu tenejing enkoitoi e Yesu.
  12. Nikinteng'en sii ororei le Nkai aaitobiraki o tenkipankata sidai pee kintoti kanisa tendaa Olaitoriani nairirikino enkitubulunoto enye tiatua Yesu.
  13. Nyorraa olupastai le kanisa pee eiteng'en inkisomaritin naing'uaa Bibilia naaipirta kuna baa te kila olari.
  14. Nikipik enkomono atua nena baa pooki anaake.

# ILKERERIN O NDAMUNOTO NAAIPIRTA ENDUATA ANG:

## ENDUATA ANG:

**Ekinyor Enkai o lkulikae:** Matayo 22: 34-40, “*Kake ore pee ening Ifarisayo inchere eitigira Isadukayo nepuo aatumo. Neikilikuan olang’eni obo lenye atem ninye ajoki, ‘Lo Aiteng’ enani kaa kitanapata naisul inkitanapat?’ Nejoki, ‘Tonyorra Olaitoriani Enkai ino to ltau lino pooki o te nkishui ino pooki o te ng’eno ino pooki. Ena kitanapata ene dukuya naa ninye naisul. Ore eniare nanyaanyukie naa ena, ‘Tonyorra ole latia ino anaa kewan.’ Ore kuna kitanapat pokira are ninche naaun nkitanapat o loibonok le Nkai.*” Ing’orai sii Mk. 12: 28-31 tenebo Enkigilata oo Nkitanapat 6: 4-9.

Kiimakita kulo kererin ti ai buku neaku kayie u nang'arie intae enatejo apa tene.

Keyie u netem Ifarisayo Yesu pee eyiolou tenaa eing'en oleng. Keyiolo ninche ewalata kake keyie u neyiolou tenaa keyiolo Yesu. Amu, keisom oshi Osotua Musana neyiolo aajo eigero ina kitanapata tolning'o Musana tem buku Enkigilata oonkitanapat 6: 5. Ing'orai sii Yoshua 22:5. Newal Yesu aitobiraki oleng metaa neing'asia ninche neitu eitoki aikilikuan Yesu imbaa amu etoduaa aajo eing'en oleng (Mk. 12: 32-34).

Matisipu ena kitanapata oleng amu etejo Yesu keata tipat alang inkulie kitanapat pooki. Ore te dukuya matadamu aajo etonyorra Enkai iyiook eton eitu kinyorru ninye (1 Yohana 4: 7-12). Neaku, ore pee kinyor ninye naa ekisujita enkitanyaanyukoto enye eton eitu eini iyiook.

Etang'asa Yesu ajo “**Tonyorra.**” Kainyioo enyorrata? Ore entonai enyorrata naa tinikidamu ilkulikae o yieunot enye. Naa kegol oleng ina te iyiook amu kiata iyieunot kumok oleng tiatua



iltauja lang. Naa ore tenkaraki tung'anisho ekidamu iyieunot ang oshi oleng alang iyieunot ookulikakai. Naa ekiata sii enkuretisho oleng toonaipirta imbaa kumok. Kiure aajo ebaiki tinikidamu ilkulikae nimikitum iyiook ina toki nikiyieu. Neaku, ore tenguton mikiata enkirukoto aajo keramat Enkai iyiook tinikinturukie iyieunot enyena. Aashu mikiata enkirukoto aajo ore pee kinyorru ilkulikae keaku emayianata te Nkai. Kijo ore pee kinyorru ilkulikae oleng ebaiki nimikitum entoki nikiyieu iyiook.

Etejo Yesu ***“Tonyorra Olaitoriani Enkai ino to Itau lino pooki o te nkishui ino pooki o teng'eno ino pooki”*** (Mat. 22: 37). Ore pee ejo Yesu neijia naa kegira aimaki oltung'ani telulung'ata. Neaku, kenare nikincho meitoria Enkai pooki toki aa iltauja lang, iseseni lang, indamunot ang. Neponaa Marko ***“te ngolon ino”*** (12: 30). Neaku, kincho Enkai enkishui ang pooki telulung'ata.

Ketii embae nabo naata tipat oleng tene nanare nikiimaki naa keipirta iltauja lang o ndamunot ang. Ebaiki nejo oltung'ani kanyor Enkai toltau lai pooki kake ore enyamali naa ore pee inkilikuan ninye tenaa keisom oshi Bibilia aashu ening inkisomaritin e Bibilia oleng pee eyiolou ninye tenguton, nejo mme oleng amu kaisilig olkuak aashu oltau lai. Neaku, ore enyamali naa megira ninye anyor Enkai teng'eno enye aashu matejo too ndamunot. Neaku, keyieu nikiata enkirukoto nagut oleng naipirare iltauja lang kake keipirta sii eng'eno ang metaa ketii pooki tenebo pee mikipong'ori te nchoto nabo. Amu, tadamu enajo Bibilia tenaipirta iltauja looltung'ana pee ejo, ***“Olalejani oltau alang ntokitin pooki naa torrono oleng. Kaing'ae oidim atayiolo ninye”*** (Yer. 17: 9)?

Tadamu sii enkishui ino tenaa inyor Enkai oleng anaa enajo Yesu tene aashu tininyor Enkai tenkoitoi olkuak ake nimigira aisho Enkai enkishui ino pooki. Ebaiki nijo kanyor Enkai kake misujita enkoitoi enye aashu minyor Enkerai enye Yesu. Neaku, tenaa neijia etiu igira alej kewon ajo inyor Enkai amu ore te sipata ore enyorrata ino nemegut katukul. Kake igira anyor Enkai tenkoitoi ino kake mme tesipata. Etiu anaa intobira Enkai ino tenkitanyaanyukoto ino anaa eniyieu iyie kake mme tesipata.

Ore ai bae nabo naa inchere ore enyorrata tialo Enkai naa olkitamanyunoto sidai te iyiook pee kinyor ilkulikae. Amu, kegol pee kinyor iltung'ana kake ore pee eata enyorrata ang intona eatua enyorrata Enkai neretu iyiook pee kinyorru ilkulikae. Amu ore pee ejo "eniare nanyaanyukie ena" naa kegira aimaki inchere ore ina kitanapata naa eniare neing'uaa ina kitanapata e dukuya. Neaku, ore engolon eina kitanapata eare naa enyorrata Enkai.<sup>1</sup>

Nelo dukuya Yesu nejo, "***Ore eniare nanyaanyukie ena. Tonyorra ole latia ino anaa kewan***" (Mat. 22: 39; Lawi 19:18). Tadamu ajo eitu ninche eikilikuan Yesu pee eisho iwalat are kake eshomo Yesu dukuya aimaki ena kitanapata. Etiu anaa keyiolo Yesu ajo keibung'akino kuna kitanapat. Amu, kipong'ori tinikimbung nabo ake e kuna nikipal enkae.<sup>2</sup>

Ore pee ejo "***ole latia***" naa kegira aimaki iltung'ana pooki litumore aa iltung'ana liatua olmarei lino, emurua ino, ilchoreta linono, ata lelo tung'ana likimba iyie. Neaku, kejo tadamu ninche o yieunot enye. Nias anaa enaishiaakino te ninche. Inyor oleng kewan niramata kewon nintoti kewon, nintiship kewon. Neaku, tadamu sii ilkulikae aiko neijia. Ore enyamali nabo naipirta ina naa kiure oshi pee kiretu ilkulikae te nkoitoi nagol inchere kiyieue nikiretu ninche tenaa kelelek te iyiook kake ore pee egolu nikintoki aadamu ate nikipal ilkulikae. Tenkitanyaanyukoto, ebaiki nijo mayieue naretu oltung'ani aisho inkishu ata tenaa keata enyamali oleng amu kanyor inkishu aainei oleng. Kake ore pee kisipu aajo mme inkunaang kuna kishu kake ine Nkai, naa ebaiki nikiretu ninche. Amu, kegol tedukuya tenemetii Yesu atua iltauja lang nikiata indamunot aajo inkunaang kuna tokitin, kake ore pee eibelekeny Yesu iltauja lang katukul nikitum inkulie damunot ng'ejuko.

Keimaki sii Paulo ina kitanapata te Roma 13: 9; Ilgal. 5: 14, neimaki sii Yakobo 2: 8. Ore pee kinyor ile latia ang naa mikias imbaa torrok tialo ninche. Mikipurroo intokitin enye, nimikiloloito, nimikidekisho, nimikiarisho, nimikikurrisho, nimiking'oru elap te ninche. Kejo Bibilia, "***Meitaas enyorrata ole latia entorrono; enkaraki ina paa enyorrata enkitabaroto oo nkitanapat***" (Iroma 13: 10). Nejo sii, "***Ilanyor laainei, emintalaku ilapi, kake entung'eiki mbaa inyi engoro e Nkai;***

*amu etisiraki aajo 'Enaai elap, nanu oitalaku lapi, Olaitoriani ojo' ” (12: 19). Naa kegol oleng oshi pee king'iri aanyu Enkai. Neaku, kiyieu niking'oru elap aasioki. Kake keata Enkai engolon oleng pee eitobir inyamalaritin alang iyiook. Ore inkulie katitin naa lasima pee kijing atua enyamali pee kintobir kake ore tia rishata kenare nikipuo dukuya temberron oleng nikincho Enkai erishata pee eitobir ninye amu tinikijing atua ina nyamali ebaiki nikinyial ina bae oleng tenkaraki matejo engoro ang aashu indamunot pee king'oru elap.*

Neaku, matonyok pee kinyor Enkai nikinyor sii ilkulikae te nyorrata nasipa nemeeta esunkureisho. Matoomon Enkai pee eisho iyiook engolon pee kinyor ilkulikae amu ore inkatitin kumok kegol oleng. Matadamu pee kinyor ilo tung'ani otii dukuya iyiook alang tinikijo ekinyor iltung'ana te umata kake ore pee elotu oltung'ani oata enyamali naje nimikishilaa ninye. Nejo oltung'ani obo inchere, *"Ore enkoitai nikindimie aatonyorrie iltung'ana pooki lenkop naa pee king'as aanyorru lelo tung'ana likiboitare anaake."*<sup>3</sup> Maibung'a sii kuna kitanapat pokira are pee eretu iyiook matayiolo tenguton inkulie kitanapat te Bibilia. Keaku ninche enkipimet ang pee kimpim inkulie kitanapat.<sup>4</sup>

Keibung'akino sii **euriata e Nkai** enyorrata e Nkai. Amu, ore enyorrata nasipa naa keata sii euriata. Neaku, matisipu sii kulo kererin oopirra euriata e Nkai. **Luka 12: 4-5**, *“Ajoki intae, loshoreta laainei, emiure lelo ooar osesen, nemeitoki aata ai naaidim aataas eidipa ina. Kake aikok intae aliki olonare niurere; entureita ilo laa ore eidipa atara metua, neitoki aata engolon nanang'akinye Yehanum; ee ajoki intae, ilo enturiata!”* (Ore Yehanum naa ewueji te Yerusalem nepiki iltung'ana o takitaka nepejoo sii apa inkera aita ilasarri (2 Ilaiguanak 23: 10), kake keesishore Yesu ilo rorei pee eimaki olbalbal le Nkima anaa enajo Marko 9: 44 tenebo Embolunoto 20: 12-15).

**Olkerempe le Nkai 128: 1**, *“Emayiana pooki ng’ae oure Olaitoriani, ilo olo too nkoitoi enyena!”*

**Endung’eta e Rashe 29: 25**, *“Ore euriata e tung’ani neyau orreshet. Kake ore ilo oisilig Olaitoriani neserian.”*

**Ndung’eta e Rashe 1: 7**, *“Ore euriata o Laitoriani naa ninye enkiterunoto e ng’eno; eany ilmoda eng’eno o utarot.”*

(Matadamu aajo ore ina uriata naa keipirta enkanyit nagut oleng. Ekiure Enkai amu ninye oishoo iyiook enkishui naa ninye naiguenare iyiook tenkiting’oto. Kake ore tiatua Yesu mme lasima pee kiure ninye anaa olaiguanani torrono kake anaa Enkai supat nanyor iyiook. Ketii enkuretisho nemesidai naa ore ina kuretisho keipirta oltung’ani lemeyieu nenyikaki Enkai katukul amu keure ninye. Meomon sii Enkai amu keure ajo mening Enkai. Neaku ina pee etejo 1 Yohana 4: 18, *“Metii enkuretisho atua enyorrata, kake kearaa enyorrata nalulung’a enkuretisho. Amu ore enkuretisho naa enkitamioto eipirta, naa ilo oureisho melulung’a enyorrata te ninye.”*)

**Iasat 5: 29**, *“Kake etawalikitia Petero o lelo kulikae kipaareta nejoki, ‘Enkai pae kining iyiook alang tenikining iltung’ana.’ ”*  
(Keipirta ina walata ina kata pee eitanap Olapolosani Kitok ilkipaareta le Yesu pee melikioo ilomon supati le Yesu.)

**Aajing enkipankata enye:** Ore enkipankata enye naa pee etum iltung’ana pooki imayianat, enkordunoto o njeunoto tiatua Yesu nesuj sii Yesu te sipata too ltauja lenye pooki, naa ketii ilkererin kumok oopirta nena baa. Ekinteru te Nkiterunoto 12: 1-3 pee eipot Enkai Abrahamu pee elo enkop e Kanaan. Nejo Enkai kemayian ninye neitaa sii ninye emayianata too lkulikae. Nelo dukuya ina kipankata neesishore Enkai Israeli pee emayian ilkulikae kake eitu eaku emayianata nadupa anaa enayieu Enkai. Nelotu erishata e

Yesu neaku ninye emayianata nadupa too ltung'ana pooki. Neiteng'en iltung'ana eneiko pee eaku ilasujak lenyena nyenyor ilkulikai. Ore ilkulikae kererin ooitodolu enkipankata e Nkai naa ninche kulo. Ekidol enkipankata e Nkai tenkata o olmeita anaa enikidolita tenkata e Musa. Neasayu nena baa pee eibalunyeki enkarna Enkai te nkop pooki (Enaidurra 9: 14-16); erishata e Daudi o Goliat "*pee etum enkop pooki atayiolo inchere etii Enkai atua Israel*" (1 Samuel 17: 45-47); neipirta Olkerempe ematua e 67 enkipankata (aashu mission) Enkai; Ore tipat Ohekaloo naa pee eyiolou sii iloreren enkarna Enkai (1 Ilaiguanak 8: 41-42; Isaya 56: 7-8; Matayo 21: 12-13); Ore tenkata e Solomon nelotu enkaiguanani e Sheba naa ore pee edol emayianata natamayiana Enkai Solomon neisis Enkai enye nera ninye enoololeren (1 Ilaiguanak 10: 9, 24); Neshomo Israeli eyararoto pee eyiolouni enkarna e Nkai (Daniel 4: 1-3); Neitupuku Enkai Israel te sinkaisho pee eyiolou iloreren ajo era Enkai Olaitoriani ( Esekiel 36: 22-23); Nelimu enaibon naipirta Messia oyau enjeunoto te nkop pooki (Isaya 49: 6); Ore pee kidol enkisiyaiare e Yesu nikidol aajo ore esiai enye naa keipirta sii iloreren neme Ilyahudi ake. Amu eisiayia ninye oltung'ani le Roma (Matayo 8: 5-12; enkitok e Kanaan (Matayo 15: 21-28; enkitok e Samaria (Yohana 4: 1-42); eshomo Yesu ewueji oo Ilgiriki pee eishiunye iltung'ana (Matayo 8: 28-34); Ore pee eimaki Marko 7: 31 Dekapoli naa kegira aimaki ewueji oo Ilgiriki; Ore pee eimaki Yesu enkoliai e Sarepta tenebo Naaman naa keitodolu ajo kenyer sii ninye iloreren (Luka 4: 25-30). Tisipu sii kulo kererin: Matayo 24: 14; 26:13; Luka 10: 30-37; 17: 11-19; Matayo 21: 33-46; 25: 31-46.

Nelotu erishata pee eye Yesu tenkaraki ng'ok ang neitoki apiu aing'uaa ilootuata. Neitanap Yesu ilkipaareta lenyena pee epuo enkop pooki aita iltung'ana ilasujak le Yesu (Matayo 28: 16-20; Iasat 1: 7-8). Nelotu enkolong e Pentekoste neliki Petero lelo Yahudi ootara Yesu ilomon supati. Neliki ninche ajo etara Yesu metua neitaa Enkai ninye Olaitoriani. Neliki iyiook Iasat 2: 37-38 enataase. Ore pee eikilikuan Petero ajo kaa eas newaliki ninche

ajoki, *“Erridutu pooki tung’ani, neibatisai pooki te intae te nkarna e Yesu Kristo, pee epalakini intae ng’ok inyi; naa ing’amumu enkishorunoto e Enkiyang’et Sinyati.”*


Keibung’akino kuna baa o ina apa kisiligata naishoo Enkai Abraham amu etejo Petero to Iasat 3: 25, *“Irara intae inkeru e lelo oibonok le Nkai, o ne ilo sotua oishoo Enkai iloo minyi, anaa pee ejoki Abraham, ‘Te ishoi ino emayiani iloreren pooki le nkop.’ Metaa Enkai nainyeyie Osinka lenye, naa intae eiteru airriwaki, pee emayian intae pooki aibelekeny entung’uai enkoitoi inyi enkarrueisho.”*

Neliki sii iyiook kulo kererin enaipirta enkipankata e Nkai: Yohana 3: 16-21; Luka 4: 16-19; Marko 10: 45; Yohana 1: 10-13, 29; 9: 39; Iasat 8: 9-25; Iroma 1: 5-6, 13-17; 4: 25; Ilgalatia 3: 26-29. Ore esiai e Paulo naisul naa pee eliki Ilgiriki ilomon supati (Iasat 9: 15; 13: 46-48; 18: 6; Iasat 28: 28; Iroma 11: 13; 1: 5). Tisipu sii ina atini naipirta Kornelio amu era sii ninye Olgiriki (Iasat 10: 1-47). Tisipu Ilgalatia 2: 11-14 pee kidol aajo mesidai olkep. Ore tenkiting’oto keaku ketii iltung’ana ooling’uaa inkuapi pooki te keper anaa enalimu Embolunoto 7: 9-12.

Ekidol sii te Efeso 3: 6,10, 21 ajo ketii kanisa atua enkipankata e Nkai. Neyieu neesishore sii iyiook te kanisa anaa enajo 1 Petero 4: 10, *“Taasishore inkishoorot naaba anaa inikinchooki aisiaayie ilkulikae, anaa olaing’urani supat te mpiris e Enkai oo mpukunot kumok.”*

**Neyieu sii Enkai nikinyor ilkulikae** anaa enatejo Yesu, *“Ore eniare nanyaanyukie naa ena, ‘Tonyorra ole latia ino anaa kewan’”* (Matayo 22: 39). Niking’urrie ilkulikae anaa enajo embuku e Yakobo 2: 14-17.

Netii empisha naret iyiook pee kidol tipat eina bae naipirta enkipankata aashu mission e Nkai.



Ore tipat eina pisha naa inchere kenare netii enkipankata Enkai tempolos ombaa pooki. Neaku, ore pee kimpanka inkulie baa ang kenare nikidamu aajo kaji kinko pee kiretu enkipankata Enkai. Ore ai arna nikindim ataashore naa “enkitoria e Nkai.” Amu, keibung’akino enkipankata Enkai o enkitoria enye. Neaku ore pee kias ina ekidol imbaa pooki too nkonyek Enkai. Niking’or pooki toki ti ai oitoi ng’ejuk. Matusuj enatejo Matayo 6: 33, *“Kake entang’as eng’oru enkitoria enye o sipat enyena; naa keponikini intae nena pooki.”*

## ENKOITOI ENDUATA ANG:

**1. Ekinturukie imbaa Enkai te nkishui ang.** Etejo Yesu, *“Kake entang’as eng’oru enkitoria enye o sipat enyena; naa keponikini intae nena pooki”* (Matayo 6: 33). Ing'orai sii Iasat 4: 18-20; Daniel 6: 1-28; Ilfilipi 3: 8-11; Matayo 6: 24; Ilkolosai 3: 1-4; Yohana 15:

5-8; Luka 14: 26; Ndung'eta e Rashe 3: 5-6; Yakobo 4: 4-8; Iroma 12: 1-2; Ilhebrania 12; 1-2.

**2. Ekitejo ekinteng'en iltung'ana enkoitoi enjeunoto pee eiruk Yesu, neirridu ng'ok enye, neibalunyie enkirukoto enye, neibatisai. Ketii embuku naigero naji “Enkoitoi Enjeunoto enaa Enaigero tiatua Ororei le Nkai” nalimu kulo kererin pooki anaa kulo:**

Kenare niking'as aayiolou aajo ketii enyamali tenkaraki ng'ok anaa enalimu kulo kererin: Yohana 3: 19, 20; Iroma 3: 10, 23; Iroma 5: 6, 10; Iroma 6: 16, 23; Ilkolosai 1: 21; Efeso 2: 1, 2, 11, 12; Isaya 59: 2; Isaya 64: 6; Yeremia 2: 13; Yeremia 17: 9; Ilhebrania 9: 27.

Matadamu sii inkatitin pooki **osarge le Yesu tenebo empiris Enkai** anaa enalimu kulo kererin: Iroma 5:9, 10; 1 Petero 1: 17-19; Iroma 3: 25; Efeso 1: 7; Efeso 2: 8-9; Iroma 3: 24; Yohana 16: 8; Iasat 2: 37.

**Aairuk** – Lhebrania 11: 1, 6; Yohana 5: 24; Iroma 3: 22; Yakobo 2: 17, 26; Ilgalatia 3: 27; 1 Yohana 5: 5.

**Aairridu** – Marko 1: 5; Olkerempe le Nkai 32: 5; 38: 18; Yohana 12: 42; Nehemia 9: 1-3; Iasat 19: 18; Luka 15: 11-32; 2 Ilkorintio 4: 4; Iasat 26: 17-18; Iroma 3: 22-23; Olkerempe le Nkai 38: 8-9; Luka 7: 36-50; 2 Ilkorintio 7: 8-13; Matayo 26: 75; 2 Samuel 12: 13; 24: 10; Olkerempe 38: 18; 1 Yohana 1: 9; Iasat 19: 18; Esra 9: 6; Luka 7: 36-38; Olkerempe 97: 10; 119: 104, 163; Ndung'eta e Rashe 8: 13; Olaikooni 3: 8; Amos 5: 15; Yohana 2: 15; Esekiel 13: 20; 14: 6; 33: 10-11; Isaya 55: 7; Iasat 3: 26; 20: 21; Embolunoto 9: 29-21; 1 Petero 3: 10-11; Matayo 5: 23; Iasat 2: 38; Luka 3: 7-9; 19: 1-10; Iasat 26: 19, 20; Matayo 7: 21; Iroma 12: 9. Iasat 19: 18; Ilkolosai 2: 6; Iasat 3: 19; 1 Petero 3: 15; Ilfilipi 2: 9-10.

**Aaibalunye enkirukoto ang** – Ilkolosai 2: 6; Iroma 10: 9, 10; Matayo 10:32; 1 Timoteo 6: 12; 2 Timoteo 2: 19; Iasat 19: 18 – 19.



**Aaibatisa** – Yohana 3: 5; 1 Petero 3: 21; Iasat 2: 38; Iroma 6: 1-7; Igalatia 3: 26-27; Matayo 3: 13-17; Matayo 28: 18-20; 1 Ilkorintio 12: 13; Iroma 6: 1-4; 2 Ilkorintio 5: 17; Ilkolosai 2: 11-12; Marko 16: 16; Tito 3: 5.

### **3. Nikintutum ninche olkulikae airukok.**

Matadamu kulo kererin: Iasat 2: 42-47; Ilhebrania 10: 24-25; Efeso 3: 10, 21; Yakobo 5: 16; Iroma 12: 9-13.

### **4. Nikintubulu ninche pee eeku ninche ilasujak le Yesu neas isiaitin e kanisa. Neiteng'en sii ilkulikae.**

Mataasishore kulo kererin: Efeso 4: 11-13; 1 Petero 3: 15-17; Iasat 20: 28; Marko 8: 34-38; 1 Petero 4: 10. Eisdai sii tinikiasishore ena buku naji *“Enkoitoi Enjeunoto anaa Enaigero tiatua Ororei le Nkai”* pee kinteng'en ilairukok pooki eneiko pee eiteng'en ilkulikai leitu eiruk enkoitoi enjeunoto. **Neiteng'en sii ilkulikae.** Keitanap Paulo iyiook pee kias ina te mbuku e Timoteo pee ejo, *“Ore ina nitoning'o te nanu te dukuya ilchakenini kumok, intarasaki lelo tung'ana ooisiligayu ooidim sii ninche aaiteng'ena ilkulikae”* (2 Timoteo 2: 2). Amu, ore pee kinteng'en iltung'ana nemeiteng'en ninche ilkulikae naa keye kanisa.

### **5. Niking'oru sii inkoitoi pee king'arie ilkulikae enyorrata o lng'ur le Kristo.**

Matadamu kulo kererin: Marko 1: 40-41; Marko 6: 30-44; Matayo 14: 13-21; 22: 39; 25: 31-46; Marko 6: 30-44; 12: 28-31; Luka 4: 16-30; Yakobo 2: 14-17; Matayo 25: 31-46. Matadamu sii ilkulikae kererin oomaki ajo kenare nikias isupati too lkulikae (Igalatia 6: 9-10; Efeso 4: 32; Tito 2: 7, 14; 3: 1-2, 8, 14; 1 Petero 3: 8-9).

# ISIPAT O IASAT NAARIKOO INA KIPIRTA

## ILAIRUKOK POOKI:

### 1. Ekisis Enkai nikiomon tenebo te seremare.

Keitanap iyiook **Iihebrania 10: 23-24** pee kitii entumo e seremare pee kintagol olikae olikae. Amu, kegol oleng pee kinap inyamaritin ang oopeny. Naa ore pee mikitii tenebo nikiropiju. Etiu anaa enchata tinintayu te nkima nipik ai wueji aa ninye ake openy. Kaa naasayu? Kesipa keye amu metii atua enkima. Neaku, ore pee mikitii tenebo ilkulikae kelelek pee kishalu te nkirukoto ang. Matadamu sii pee kisis Enkai te sipata o tenkiyang'et anaa enalimu **Yohana 4: 24**. Ore pee kisis Enkai to lwuasa pee edol ilkulikae tung'ana iyiook naa mikigira aasis ninye te sipata o te nkiyang'et. Ore pee kisuj inkulie kanisani alang enkoitoi emborron e Yesu naa mikigira aasis Enkai te nkiyang'et o te sipata. Ore tiatua kulo kererin kegira Yesu airorie ina kitok naing'ua Samaria. Kejo ninche inchere ewueji eseremare neeta tipat amu keisis ninche to Idoinyo obo neisis Ilyahudi to likae. Kake eitu enyorraa Yesu ina, nejo ore enaata tipat naa teneisis iltung'ana Enkai te sipata o te nkiyang'et. Ore sii tinikipuo dukuya aasuj ina damunoto nikidol aajo ore eseremare nasipa naa meipirta sii embuaata. Amu, ebaiki nebuak oltung'ani oleng tenkomono aashu te seremare kake mesidai oltau lenye naa ebaiki neeta olwuasa sapuk oleng. Nejo Olkerempe le Nkai 101: 5, *“Ore ilo tung'ani oitokoos newuasa to ltau lenye, magirakino nanu.”*

Neliki iyiook **Iasat 2: 42-47** enaipirta kanisa edukuya o eneiko ninche pee etii tenebo te nchula neisis Enkai tenebo neng'ar indaiki *“too nkajijik enye.”* Neibung sii ninche enkiteng'enare oo lkipaareta neshulare te nkomono (Iasat 2: 42). Neaku, matisipu pee kimbung enkiteng'enare oo lkipaareta pee eeta eseremare olkitamanyunoto sidai. Kenare nikidamu sii aajo meipirta eseremare

Jumapili ake. Keiteng'en **Ilhebrania 12: 1-2** enaipirta ina bae. Keipirta kila enkolong. Keipirta iseseni lang o ndamunot ang anaake. Amu, ebaiki neisis oltung'ani Enkai oleng te Jumapili kake ore te Jumatatu nelej iltung'ana te sokoni. Aashu, neirorie ilkulikae tung'ana tolwuasa. Aashu keeta indamunot torrok naaipirta ai kitok neme enenye. Aashu kelo osirua nemera nemedamu ajo kegilunore ina seremare enye Jumapili. Keiteng'en sii **Olkerempe 101: 7** enaipirta ina bae pee ejo, "*Meetae oltung'ani oas esunkureisho obik tiatua enkaji ai; meetae oltung'ani oiro elejare oton te dukuya nanu.*"

Ketii sii ilkulikae kererin oopirta enkisisa Enkai anaa kulo: **Olkerempe le Nkai 95: 6-7**, "*Wootu mateserem nikirrugokino matigil kung te dukuya Olaitoriani oitobira iyiook! Amu ninye Enkai ang, nikira iyiook iltung'ana le nkirrita enye o nkerra e nkaina enye.*" Nejo sii **Olkerempe 100: 1-3**, "*Entaranyaki Olaitoriani te ng'ida, na kuapi pooki! Esiaayia Olaitoriani te nchipai! Wootu dukuya ninye to sinkolio! Entayiolo nchere Olaitoriani ninye Enkai!*"

## **2. Ekiisom ororei le Nkai nikimbung tiatua iltauja lang nikisuj sii. Ekiisom oopeny, nikisom tenebo ilmareita lang aaiteng'en inkera, nikisom too lturrurri.**

Ore te dukuya keeta kulo kererin ootii Enkigilata oo nkitanapat 6: 4-8 tipat oleng. Keipirta inkitanapat naatii olning'o musana kake ore pee kidamu telalai nikidol aajo keipirta inkitanapat o isipat e Nkai pooki. Neaku, keiteng'en iyiook pee etii ororei le Nkai atua iltauja lang niking'eng'en sii inkera ang niking'oru inkoitoyi pee kidamu ororei le Nkai anaake. Eisdai sii katukul Olkerempe le Nkai 119 pooki amu keipirta enyorrata ororei le Nkai. Nejo 119: 11, "*Atushuma nanu ororei lino to ltau lai pee maas ake eng'oki tialo iyie.*" Nejo olkereri le 16, "*Kashipakino nanu nkitanapat inono; Maarikino nanu ororei lino.*" Nejo olkereri le 18, "*Taboloki nkonyek aainei pee atum atoduaa mbaa e nking'asia*"

*naaing'uaa enkitanapata ino.*" Nejo olkereri le 36, "*Ntonyorra oltau lai enchakenisho ino, nimintonyor dupoto.*" Nejo olkereri le 103, "*Kemelok oleng irorei linono te nainyorrinyor, kemelok aalang enaisho te nkutuk ai!*" Nejo olkereri le 105, "*Ore ororei lino naa oltaa loo nkejek aainei naa ewang'an te nkoitoi ai.*" Nejo olkereri le 133, "*Ntirring'ie iroruat aainei te risioroto e nksiligata ino nimincho entorroni maaitoria nanu.*" Neitanap Paulo Timoteo pee elikioo ororei le Nkai (2 Timoteo 4: 1-5) amu etejo kelotu enkata nemeiyeu iltung'ana ororei le Nkai. Neitoki aitanap Paulo Timoteo te 1 Timoteo 4: 13, "*Tasheikinoyu enkisomata oo lkigerot te dukuya iltung'ana o elikioroto, o enkiteng'enare o metaba anaa nalotu.*" Nejo sii 2 Timoteo 3: 16, "*Ore ilkigerot pooki naa Enkai naiyang'ua, neeta dupoto te nkiteng'enare, o te nksikong'at o ererioto, o te nkitubulunoto tiatua esupatiso, paa ore oltung'ani le Enkai neitabari te nkaaas pooki sidai.*"

Matadamu enkatini e Yesu pee etem shetani ninye. Neesishore ororei le Nkai pee ewal. Nemeeta ilkigerot etii ninye ong'ata metaa keibala ajo eibung'a ninye ororei le Nkai te lukunya pee ewaliki shetani (Matayo 4: 1-11). Nejo Efeso 6: 4 tenaipirta inkera ang, "*Ore intae iloo papa, emintagor inkera inyi, kake entubulu ninche te nkitamioto e utaroto o te nkiteng'enare o Laitoriani.*" Ore te naipirta esujata ororei le Nkai naa eisidai oleng Yakobo 1: 22-25. Neitanap sii Yesu iyiook pee kisuj ororei le Nkai alang tinikining ake (Matayo 7: 21-27). Neliki iyiook Ilhebrania 4: 12-13 ajo keeta tipat ororei le Nkai oleng. Neliki sii iyiook 2 Timoteo 3: 14-16 ajo keretu iyiook ororei le Nkai pee kinteng'en iltung'ana nikirerioo ninche. Neyiolo Timoteo ororei le Nkai aiteru apa ebaiki keraisho. Ore ilkulikae kererin oopirta ororei le Nkai naa kulo: 2 Ilkorintio 2: 17; 4: 2; Ilkolosai 3: 16; 2 Tim. 2: 15. Ketii enkoitoi nabo nayieu nikidamu pee kisom ororei le Nkai nikimbung. Ore to lturrur kiti king'as aaisom ororei le Nkai nikintoki aaiso iltung'ana erishata pee elimu enadamu ninche. Ebaiki nemedamu kila oltung'ani imbaa pooki naatii lelo kererin kake ore pee elimu

kila oltung'ani embae nayiolo ninye naa keidimayu pee elimu pooki tenebo eseshata e nena baa naatii kulo kererin. Ore pee eidip ina nedamu pooki enkoitoi pee eng'arie lelo kererin likae tung'ani nesuj sii imbaa naatii lelo kererin. Amu, ebaiki netii imbaa naaibala nanare neasi tiatua lelo kererin. Ore pee esuj iltung'ana kumok ina oitoi naata osiligi ajo kebulu kanisa oleng. Amu, ore tina oitoi megira ilairukok aaisom ororei le Nkai pesho. Keeta enkipirta neeta sii enkipankata pee esuj neng'arie sii ilkulikae.

### **3. Ekiomon Enkai anaake te nkishui ang maate pee kishukoki ninye enashe, nikisis ninye, nikiomonoki ilkulikae, nikiliki Enkai inkolati, nikiomonoki sii eng'eno o engolon naing'uaa enetii ninye.**

Tang'asa tadamu enkishui e Yesu pee eomon Enkai. Ore erishata naata tipat oleng naa ina rishata pee etemi Yesu ti ong'ata. Meliki iyiook Bibilia ajo etoomono Enkai etii ong'ata kake keibala ajo kegira aomon Enkai tina rishata. Nebik ninye inkolong'i artam ti ong'ata tenebo Enkai o ng'uesin nemegira anya endaa. Keibala ajo keeta enkomono tenebo enkepari tipat oleng te Enkai. Amaa, naa tenaa keiuloko Enkerai e Nkai enkomon aiko neijia anaata kiuloki sii iyiook amu ekishal oleng nemeeta enikias metii Yesu (Yohana 15: 5). Ing'orai Luka 4: 1-15 tenebo Matayo 4: 1-11 o Marko 1: 12-13 pee isipu ina atini. Nejo Luka 4: 14 eidipa ninye atushukunye ti ong'ata, *“Nerrinyo Yesu Galilaya ebore engolon e Nkiyang'et Sinyati, neibulaa enkisisa, nkuapi naamanita. Neiteng'enisho too nkajijik enye e ntumo nerrep iltung'ana pooki ninye.”* Neaku, ore pee itii tenebo Enkai te nkomono indim anoto sii engolon e Nkiyang'et Sinyati anaa Yesu pee eas eisiai Olaitoriani. Keimaki sii Marko 1: 35 enkomono e Yesu. Nejo, *“Ore enasirie, te niosowuani, neinyototo ayok alo ewueji neliyio neomon teine.”* Matisipu ele kereri amu kejo eshomo tadekenya oleng nelo ewueji neliyio neomon. Neaku, eshomo Yesu aomon Enkai eton eitu eas inkulie siaitin nelo tadekenya oleng eton eitu

eponu iltung'ana. Nejo Marko 1: 39 inchere eshomo ninye inkajijik enye entumo alikioo ororei le Nkai. Neaku, idolita ajo ore eton eitu elo ninye alikioo ororei le Nkai nelo ninye aomon pee etum engolon neyiolo olkilikuai lenye te sipata. Kenare nikias sii iyiook neijia amu ore pee kilikioo ororei le Nkai eton eitu kiomon Enkai keeku enyamali sapuk oleng. Ebaiki nikipong'ori aashu ebaiki nimikiliki iltung'ana ororei le Nkai to ltau sidai. Keiuloki embuku e Luka oleng aimaki enkomono e Yesu. Matisipu nena katitin: (1) pee eibatisai ninye (Luka 3: 21); (2) Ore ina kata pee eidip atarai iloiriruani nelo aomon Enkai (Luka 4: 42); (3) Enkata pee eomon enkewarie pooki (Luka 6: 12); (4) Ina kata etii Yesu Kaisari e Filipi pee eikilikuan ilkipaareta lenyena ajo kera ninye ng'ae (Luka 9: 18-20). (5) Ina kata pee ewalu Yesu (Luka 9: 28-29); Ina kata pee eiteng'en ilkipaareta lenyena eneiko pee eomon (Luka 11: 1-13); (6) Meliki iyiook Luka 18: 1-8 enaipirta enkomon e Yesu kewan kake keliki iyiook enaipirta enkiteng'enare e Yesu naipirta enkomon pee Mikinauru te nkomono; (7) Ina kata pee eomonoki Yesu Petero (Luka 22: 31-34); (8) Neiteng'en Yesu ilkipaareta lenyena pee eomon pee mejing atua intemat (Luka 22: 40); (9) Ore erishata enkomono e Yesu naata tipat oleng naa ina kata pee elo ninye oldoinyo loo Loirienito aomon Enkai oleng. Nejo Luka 22: 44, *“Ore tenkaraki naisina neitirrish oleng aomon netiu enkinyinyiret enye edoiki enkop anaa ilkituua kitong'at lo sarge.”* Neaku, matusuj enkitanyaanyukoto e Yesu nikiomon anaake te wueji neliyo pee kitum engolon e Nkiyang'et Sinyati, eng'eno naing'uaa Enkai, o pee mikijing atua intemat amu etejo sii Yesu keyieu oltau kake keshal osesen (Matayo 26: 41).

Matisipu sii **Matayo 6: 5-13**, *“Naa tiniomonono nimitiuu anaa isunkuro, amu enyor ninche aatoomon eitashoo too nkajijik e ntumo o too lojat oo nkoitoi naalala e nkanasa, pee etum aatodol iltung'ana. Esipa ajoki intae, eidipa ninche aanoto shunet enye. Kake tiniomon iyie, tijing'a olgilata lino, ore pee indipa aikeno kutuk aji, niomon Papa lino too nkisudorot, ore Papa lino odol too nkisudorot naa eikilaaki iyie. Naa tiniomonono, emintaa irerei*

*kumok anaa enaas iloreren, amu edamu ninche aajo kening'i ninche te nkumoi oo rorei lenye. Emitiu anaa ninche, amu eyiolo Papa linyi iniyieuu eton eitu iomonunu intae. Na entoomon aaiko neijia, 'Papa lang otii shumata meitisinyi enkarna ino, meeu enkitoria ino, metaasi eniyieu te nkop anaa enatiu te shumata. Inchoo iyiook ena olong endaa ang e anaake. Nipalaki iyiook isilen ang, anaa tinikipalaki iyiook ilooata isilen ang. Nimirik iyiook atua intemat, kake intajeu iyiook tiatua ilo torrono.'"*  
Matisipu kuna baa naaipirta kulo kererin:

Kenare nikidamu oleng pee mikilepie ate. Amu, ore pee kiomon tolwuasa anaa apa Ifarisayo nemenyor Enkai katukul. Kake keyieu nikiomon temberron oleng pee etum Enkai enchunet. Amu, ore pee king'oru iyiook enchunet ooltung'ana nimikitung katukul. Kenare niking'oru ewueji nikipuo pee kiomon too nkisudorot. Naa ata tenaa kegol oleng pee kiata enkirukoto kiyiolo inchere ekitung iyiook olerrinyore te Enkai tenkaraki emberron o enkirukoto ang. Mme lasima pee kilepilep aita irerei kumok tiatua inkomonoritin ang amu keyiolo Enkai imbaa pooki neyiolo iltauja lang. Ketii iltung'ana laa kejo kening Enkai ninche oleng teneilepilep alang ilkulikae, kake etejo Yesu "*Emitiu anaa ninche.*" Keitanap Yesu iyiook pee kiomon enkomono dorrop nalelek kake kegut. Nejo ninye pee kisis Enkai (Mat. 6: 9), nikiomon sii pee etii enkitoria Enkai atua ena kop aa taa pee etii atua iltauja loo ltung'ana (Mat. 6: 10), nikiomon pee esuj iltung'ana eyieunoto Enkai anaa enaasita inkiyang'eta e shumata (Mat. 6: 10), nikiomon tenkaraki iyieunot ang kitii ena kop anaa endaa, o nkilani (Mat. 6: 11), nikiomon pee epalaki Enkai iyiook ing'ok ang neisho sii iyiook engolon pee kupalaki ilkulikae (Mat. 6: 12), nikiomon pee meisho Enkai iyiook matadoiki atua intemat kake keitajeu iyiook aisho iyiook enkoitoi pee kiimaa intemat (Mat. 6: 13).<sup>5</sup>

Ekidol sii tembuku o Iasat ajo keeta enkomono tipat oleng teina kanisa edukuya. Keimaki Luka enkomono inkatitin 32 tiatua embuku o Iasat. Tisipu kuna wuejitin tiatua Iasat: 1: 13-14, 24-25;

2: 42; 3: 1; 4: 4: 24-31; 6: 4, 6; 7: 59; 8: 15, 22, 24; 9: 11, 40; 10: 2, 4, 30-31; 9; 11: 5; 12: 5-7, 12; 13: 2-3 (tenebo empukuroto); 14: 23; 16: 13, 16, 25; 20: 36; 21: 5; 22: 17; 26: 29; 27: 29; 28: 8; 13, 16. Tinikisipu kulo kererin, ekidol aajo keeta enkomon tipat oleng tena kanisa e dukuya. Neomon ninche eton eitu easayu imbaa enking'asia.

Netii sii kulo kererin oopirta enkomono tiatua imbukui naaigero Paulo: IIfilipi 4:6-7; 1 IIsesalonike 1: 2; 5: 12, 17, 25; 3: 10; 2 IIsesalonike 1: 1-12; 3: 1; Iroma 1: 9-10; 12: 12; 15: 30-31; Efeso 1: 16-19; 6: 18-19; IIfilipi 1: 4-5; Ilkolosai 1: 3, 9; 4: 2, 3, 12; Iroma 8: 26; I Ilkorintio 6: 18; 14: 14-15; 2 Ilkorintio 1: 11. Matisipu **IIfilipi 4: 6-7** amu kejo ore pee kiliki Enkai inkolati ang te nashe nikitum eseriani tiatua iltauja lang. Naa kajo nanu kegira aaimaki kulo kererin ina omono tinikipuo aamon Enkai oopeny. Keeta sii tipat tinikiomon tenebo ilkulikae kake ore enaisul naa tiniomon openy tenebo Enkai. Amu, keidimayu pee kintaakuno tenetii ilkulikae tung'ana aashu kiomono pee edol ilkulikae tung'ana ajo ekigol tenkomono. Kake ore pee itii tenebo Enkai openy nemeitoki atii entemata pee intaakuno. Itii dukuya enkomom Enkai igira aomon Enkai te wang'an. Matonyok pee kiomonu eng'eno naing'uaa Enkai tenebo embolokinoto matayiolo ninye anaa enatoomonuo Paulo te Efeso 1: 17-19. Nikiomon sii pee eiput Enkiyang'et Sinyati iltauja lang anaake (Efeso 5: 18). Matasuj sii enkitanyaanyukoto eilo tung'ani oji Epafras oimaki Paulo to Lkolosai 4: 12 pee ejo, *“Ore Epafras, ora obo linyi, osinka le Yesu Kristo, neiroroki intae, nedamu intae anaake te nkomono enye, peyie intasheshe itubulutua neitisipaki eyieunoto e Enkai tiatua intae.”* Ore pee ejo “anaake” naa kegira aimaki inchere kenyokita aomonoki iltung'ana oleng te yieunoto sapuk. Menauru eomonoki iltung'ana.



#### 4. Kiuloki aaliki ilkulikae ilomon supati aa oltung'ani obo aashu ilkumok.

Ore enedukuya eisidai tinikisipu enkitanyaanyukoto e Yesu pee kiyiolou enikias. Keliki iyiook Yesu te **Luka 4: 14-27** enaipirta esiai enye. Nejo olkereri le tomon o siet, “... *naairriwua matoliki laisnak ororei supat.*” Neliki sii iyiook Marko 1: 15 olkilikuai le Yesu pee elo ninye aiteng'en iltung'ana. Nejo, “Etabaua enkata, netinyikua enkitoria e Enkai; erridutu, naa eruko ele rorei supat.” Kake matadamu aajo eewuo enkitoria e Enkai te nkolong e Pentekoste anaa enalimu lasat ematua are. Amu ore te siadi Pentekoste meekure ejo ilaigerok le Bibilia “*etinyikua enkitoria e Enkai.*” Keimaki ilairukok te nkoitoi naitodolu ajo ketii atua enkitoria e Nkai anaa Ilkolosai 1: 13, 14 pee ejo, “*Ninye otalakua iyiook aitung'uaa enkitoria e naimin neidurrie iyiook maape enkitoria o Inoti lenye kirotet, laa te ninye kiata elakunoto, naa empalakinoto oo ng'ok ang.*” Kake kesipa sii ajo ketii enkitoria e Enkai nalotu te keper anaa enajo 2 Timoteo 4: 18, “*Ee kaakordu Olaitoriani te ntorroni ake pooki naitajeu aaitaany ina kitoo (aashu enkitoria) enye e shumata metaa enenye enkitoo ntarasi o ntarasi. Eesai.*” Keimaki sii Matayo 26: 34 ina kitoria nalotu. Keiteru enkitoria e Enkai tena kop kake kelotu telulung'ata kenya tenelotu enkiting'oto.

Neaku, matusuj sii iyiook Yesu nikiliki ilkulikae ilomon supati. Nikidol sii te nkishui enye ajo eiteng'ena iltung'ana pooki neme laisnak ake. Kake ore inkulie katitin kening ilaisinak aasioki alang ilkarsisi. Ore ilomon supati naa inchere ketii elakunoto atua Yesu. Ore pee kisipu ilkulikae kererin nikidol aajo kelotu elakunoto teneiruk oltung'ani, neirridu, neibalunyie ajo etang'amua Yesu anaa Olaitoriani Olaitajeunoni, neibatisai sii pee etum empalakinoto oo ng'ok nejing Enkiyang'et Sinyati atua oltau lenye (Iasat 2: 38). Kelimu sii kulo kererin ilomon supati oipirta enkishui nemeiting (Yohana 3: 16-21; 5: 24-30).

Neitanap Yesu ilkipaareta lenyena te Marko 16: 15-16, “*Enchom enkop pooki entoliki ltung’ana pooki ele rorei supat. Ore oloiruk neibatisae nejeu; ore olemeiruk nedung’okini enkiguana.*” Ore hoo nemeesishore kulo rorei “*ilomon supati*” kake kegira Yesu aimaki ilomon supati pee eitanap ilkipaareta lenyena pee epuo aaitaa iltung’ana pooki ilooiteng’eni lenyena (Matayo 28: 19-20). Nejo sii Paulo to Iasat 20: 20-21, “*Niyiololo aajo eitu ai kata aing’ash aibalunye intae embae ake pooki naret intae, naiteng’en intae te dukuya iltung’ana, naruk inkajjik, aishakenoki ndung’ot pokira aa Lyahudi o aa Lyunani meirridu tialo Enkai, neiruk Olaitoriani lang Yesu Kristo.*” Neaku, eshomo sii ninye inkajjik pee eiteng’en iltung’ana. Kajo ebaiki neiteng’ena ninye olmarei tenebo. Kake ore inkulie katitin ebaiki neishiaakino pee inteng’en oltung’ani obo tenemeeta olmarei teine wueji netii anaa enataasa Filipino pee eiteng’en ilo kitok le Etiopia (Iasat 8: 26-40).

Ore pee itumoki atayiolo eninko tiniliki iltung’ana ilomon supati tisipu kuna sipat isiet:

(1) Ketii Enkai naa keyieu neeta enchula nagut tenebo iyie Yakobo 2: 23; Yohana 14: 23.

(2) Keyieu pooki ng’ae Olaitajeunoni amu etaasa iltung’ana ng’ok nemeidimayu pee eitajeu ate (Iroma 3: 22-26; Efeso 2: 8-10).

(3) Keyieu pooki ng’ae enyorrata o empalakinoto oo ng’ok (Yohana 3: 16; 1 Yohana 4: 7-12; Iasat 2: 38; 22: 16; Yohana 8: 1-11).

(4) Mitii ena kop intarasi naa ore pee iye kelotu enkiguena metaa kenare nirretena tenkaraki enkishui ontarasi (eternity) (Ilhebrania 10: 27; Matayo 24: 36-44; 25: 1-13).

(5) Kenare nincho Enkai o Yesu enkishui ino pee itum empalakinoto oo ng’ok nitum sii enkipirta tenaipirta kewan ino (Efeso 1: 4, 7; Iasat 22: 16; 1 Yohana 1: 7; Olkerempe le Nkai 138: 8).

(6) Etua Yesu tenkaraki ing’ok inono, nepiu ninye, naa ina oitoo nabo ake easishore Enkai pee etum iltung’ana empalakinoto oo

ng'ok (1 Yohana 2: 2; Yohana 1: 10-13; 3: 16; Iasat 2: 38; Iroma 5: 9-11; 1 Ilkorintio 15: 1-58)

(7) Kinchoo Enkai iyie tempiris enye enkoitoi pee itum enjeunoto, ning'amū Yesu anaa Olaitoriani Olaitajeunoni nitaa nabo o ninye pee iruk ninye, nirridu, nimbalye enkirukoto ino nikimbatisai. Ore pee ing'amū empiris Enkai tina oitoi, nikisiligie Enkai ajo itum empalakinoto oo ng'ok o Enkiyang'et Sinyati tiatua oltau lino. Naa keji sii enkibatisa Enkiyang'et Sinyati. Niaku olairukoni le Yesu aashu olasujani le Yesu, niaku sii eoroti nabo e kanisa e Nkai, niaku "olkilikuai oning'oreki," niata enkordunoto, nikinchoo Kristo (Ilgalatia 3: 27). Ore nena pooki naa tenkaraki esiai e Yesu tiatua iyie (Ilkolosai 2: 11-12). Ing'orai kulo kererin pooki pee iyiolou enaipirta nena baa. Isoma kuna bukui: Iroma 3: 23-24; Iroma 6: 23; Yohana 14: 6; Iroma 6: 1-3; Iasat 2: 38; Iroma 10: 9; Yohana 3: 16; 5: 24; Yohana 10: 10; 1 Yohana 5: 13).

(8) Keeta tipat oleng pee ilo dukuya aisilig Enkai, Yesu o Enkiyang'et Sinyati anaake tiatua enkibung'ata enkomono, enkisoma ororei le Nkai, enchula oo lairukok o eng'arata enkirukoto ino tenebo ilkulikae (Ndung'eta e Rashe 3: 5-6; Yohana 14: 1-12; Iroma 8: 26-27; Ilfilipi 4: 6-7; Olkerempe 119: 97, 105; 1 Timoteo 4: 16; 2 Timoteo 1: 15: 3: 16; Ilhebrania 10: 24-25; Matayo 28: 19-20.)

## **5. Ekintutum ilturrurri loo ltung'ana ooata enkipirta naibung'akino enkipankata (mission) Enkai.**

Ore olkitamanyunoto leina bae naa inchere ketumo ilairukok le dukuya too nkajjik enye pee eeata enchula tenebo nanya endaa tenebo anaa enalimu Iasat 2: 2-47; 5: 42. Kake ore pee kitoni tiatua ilturrurri nimikiata enkipirta naa ketii enyamali. Tisipu Iasat 4: 31, nejo, *“Ore pee eomon neigirigiro ine netumore, neiput ninche pooki Enkiyang'et Sinyati neshirraki aairo ororei le Nkai.”* Neaku, ketii tenebo te nchula negira aomon sii Enkai kake ore pee eidip ina omono neiteru aaliki iltung'ana ororei le Nkai te mpijan. Nejo sii

keretuno tiatua enchula metaa tenaa keeta oltung'ani enyamali neretu ninye. Ore pee kidamu imbaa naaipirta enkoitoi o enduata ang nikitejo eking'oru sii inkoitoi pee king'arie ilkulikae enyorrata o lng'ur le Kristo anaa enalimu kulo kererin: Marko 1: 40-41; Marko 6: 30-44; Matayo 22: 39; Yakobo 2: 14-17; Matayo 25: 31-46; Ilgalatia 2: 10. Neimaki sii 1 Ilkorintio 12: 12-31 osesen le Yesu aa kanisa inchere keeta irubat kumok kake etii osesen obo. Kegira aimaki iltung'ana ooata inkishoorot naapaasha kake keretu pooki osesen le Yesu. Naa ore te sipata keidimayu pee eeta sii olturrur kiti obo (small group) enkipirta aashu enkishooroto nabo nayieu neiuloki. Neimaki sii 1 Petero 4: 10 inkishoorot. Nejo inchere keishiakino pee easishore oltung'ani pooki inkishoorot enyena pee eisiaayie ilkulikai anaa *“olaing'urani supat te mpiris e Enkai oo mpukunot kumok.”*

Neaku, ebaiki netii iltung'ana ooyieu olturrur oiuloki enyamali naje te murua tenebo. Tenkitanyaanyukoto, nejo iltung'ana to lturrur obo kiiyieu nikiuloki ilaisinak tiatua emurua nikiretu ilmareita moo obo pee epuku teina sinkaisho. Nejo likae turrur kiyieu nikiuloki ilmareita aaiteng'en ninche enkoitoi enjeunoto. Nejo likae kiiyieu nikinteng'en elelero nikintubulu ninche pee eaku ilairukok le Yesu nesuj sii ninye too ltauja pooki. Nejo likae ekiyieu nikinteng'en inkeru te skuul naipirta esujata e Yesu. Ebaiki nejo likae turrur kiiyieu nikiretu olmarei obo pee etum emukunta sidai. Ebaiki netii likae turrur oyieu neun kanisa te wueji neje. Neipanka imbaa neomon Enkai nepuo dukuya aas ina tengolon Olaitoriani. Naa keas nena pooki egira adamu enkipankata e Nkai pee eiruk iltung'ana Yesu neirridu neibatisai neaku ilasujak le Yesu. Ore too lturrurri pooki keyieu nikiata oltung'ani oiteng'eni orikito ilo turrur. Metaa keiteng'en ilarikok le kanisa ninche pee eaku ilarikok oorik lturrurri te nkoitoi sidai. Ebaiki nejo likae turrur inchere kiiyieu nikinteru enkiti biashara naje pee kiretu kanisa, neipanka imbaa pooki nepuo dukuya aas ina. Kake keesishore sii ina biashara pee eing'oru enkoitoi pee eliki iltung'ana ororei le Nkai. Ore inkatitin pooki kenare netii enkiteng'enare ororei le Nkai

tenebo enkomono atua ilturrurri pooki. Kake keeta sii ilturrurri pooki esiai enye naiuloki pee easishore inkishoorot enye tenkipankata e Nkai.

## **6. Eking'oru oltung'ani likitumore pee kiomon tenebo nikiretu olikae olikae.**

Ore olkitamanyunoto leina bae naa Yakobo 5: 16 naa kejo, *“Metaa, embalakinoto ing’ok inyi maate, niomonokinono, pee eishiunyieki intae. Amu eeta enkomono oltung’ani supat enkidimata sapuk.”* Neaku, keeta tipat oleng tinikitum oltung’ani likitumore pee kiomon tenebo nikimbalunyie imbaa pee kiomonoki olikae olikae. Matadamu enajo Ndung’eta e Rashe 27: 17, *“Eii esekenkei aiti pij esekenkei, neitipij oltung’ani o likae tung’ani.”* Matadamu sii 1 Samuel 23: 16 amu keimaki kulo kererin Jonathan o shoruetisho enye tenebo Daudi. Nejo sii Paulo to Lgalatia 6: 2, *“Entaretokinoto lolan olikae o likae, amu teina ntabayaya enkitanapata e Kristo.”* Tadamu sii Ilhebrania 10: 24-25 pee ejo, *“Naa ematadamu enikinkunakino olikae olikae enkisusunkat o enyorrata o siaaitin sidain, nimikipalaa entumo, anaa enatiu olkuaak le kulikae, kake intagolo olikae olikae neisul idolitata aajo etinyikua ina Olong.”* Tisipu sii Olaikooni 4: 9-12.

## **7. Ekiretu kanisa olkulikae ooata inkolati too ropiyiani o too nkulie masaa.**

Matang’as aadamu enatejo Paulo to Lkorintio 8: 1-15 tenebo 9: 6-15. Ore pee kisuj enatejo Paulo tiatua kulo kererin ketum kanisa tenebo olkulikae eretoto sapuk oleng. Keimaki osotua Musana ematua e tomon (Lawi 27: 30-33; Enkikena 18: 21-24; Enkigilata oo Nkitanapat 14: 22-29; Malaki 3: 7-12), kake kejo Osotua Ng’ejuk, *“Tumuta pooki tung’ani too ndamunot inono tayiolo entoki ninchooyo inyor metii olng’ash; ilo oishoru te nchipai enyor Enkai.”* Neaku, mme torrongo teneishooyo oltung’ani ematua e

tomon kake ore inkulie katitin ebaiki nerem Enkai oltau lo ltung'ani pee eishooyo ematua e iip. Tenkitanyaanyukoto, ebaiki nerem Enkai oltau lo ltung'ani pee eisho kanisa enkiteng pee eretu ilaisinak aashu pee eretu kanisa te siai elikioroto ororei le Nkai. Amu, kejo Iasat 2: 45 naipirta ilairukok le dukuya, *“Neaku kemir masaa enye o ntokitin naata neorikino pooki mpesai, anaa enaatayie oltung'ani enkolat.”* Neaku, matusuj sii iyiook enkitanyaanyukoto enye. Matayiolo ajo kesipa oleng enatejo Yesu, *“...amu ore enetii masaa inono kiroteni, naa ina eyooki atii oltau lino”* (Matayo 6: 21). Netii sii enkikoo sidai to Lgalatia 6: 10, naa kejo, *“Ore enkaraki ina, ore ake irishat pooki nikitum, emaitaasa pooki ng'ae isupati, neisul lelo le nkaji e nkirukoto.”*

Matisipu sii **Matayo 22: 39-40** pee ejo Yesu, *“Ore eni are nanyaanyukie naa ena, ‘Tonyorra ole latia ino anaa kewan.’ Ore kuna kitanapat pokira are ninche naaun nkitanapat o loibonok le Nkai.”* Eking'as aanyor Enkai anaa enikindipa aatejo nikintoki aanyor ilkulikae tengolon naisho Enkai iyiook. Amu, ore pee metii Enkai naa ketii enkiba, enchankar, olom, o enkuretisho tialo ilkulikae. Kake ore tenebo engolon Enkai ekiindim aatonyor iltung'ana limikinyor oshi. Ore pee ejo ele kereri *“anaa kewan”* megira aitanap iyiook pee kinyor ate kake kegira adamu Yesu ajo kinyor oshi ake oltung'ani kewan. Neaku, kegira aitanap iyiook pee kinyor nikiramat ilkulikae anaa enikinyor nikiramat oshi ate. Ekidol te nkishui e Yesu ajo keishiakino pee kinyor nikiretu ilkulikae amu eing'urrie ninye iltung'ana neitoti neishiunye neitopiu ninche. Keiteng'en iyiook ina kitanyaanyukoto naipirta ilaisiaayiak enkisoma naipirta eramatare oo ntokitin ang. Kenare nikidamu enkoitoi pee kiasishore intokitin ang pee eponari pee kiretu ilkulikae (Matayo 25: 14-30). Matadamu sii ajo ore intokitin pooki naa ine Nkai mme inkunaang amu era ninye oloopeny loo ntokitin pooki (Enkiterunoto ematua e dukuya; Olkerempe le Nkai 24: 1-2; 50: 1; 1 Tim. 6: 6-7; Olaikooni 5: 15). Neaku, entadamu aajo meatai entoki tena kop nara enaang. Maishoo ninye enkishui ang, oltauja lang, erishata ang, mpesai ang, o olmarei lang. Neaku,

keishiakino pee kishukoki Enkai ematua enena masaa ang pee kiretu kanisa enye nikiretu sii ilkulikae. Ing'orai sii kulo kererin: Luka 12: 32-34; 21: 1-4; Marko 10: 17-22; Matayo 6: 24; Iasat 20: 35.

## **8. Ekinyorraa aaibung enkoitoi e Yesu o esiai enye too Itauja lang pooki pee kiaku ilasujak le Yesu.**

Tisipu Matayo 4: 18-22 amu keliki iyiook enaipirta ilkipaareta le Yesu ina kata pee eing'uaa ninche isiaitin nesuj Yesu. Keeta ninche isiaitin kake keisho Yesu ninche esiai naata tipat oleng alang nena siaitin naata ninche oshi ake. Ing'orai sii Luka 6: 40. Neliki iyiook Matayo 5: 3-10 ajo keishiakino teneeta olasujani le Yesu oltau obor, negira aing'oru Enkai toltau lenye pooki.

Ore nabo olong pee egolu imbaa naagira aiting'en Yesu oleng neikilikuan Yesu ilkipaareta lenyena tenaa keyieu nepuo aaing'uaa ninye. Newaliki Petero ninye ajoki, *"Lo Kitok, aing'ae kipuo enetii? Iyie oata irorei le nkishui nemeish, nikiruko iyiook nikitaioloito inchere, ira iyie Ilo Obo Sinyati le Nkai"* (Yohana 6: 68-69). Neaku, kenare nikijo ekisuj Yesu ata tenepuonu imbaa naagol oleng amu ninye oata irorei le nkishui nemeish. Matisipu enatejo Yesu te **Matayo 7: 21-23**, *"Mme pooki tung'ani laajo 'Olaitoriani, Olaitoriani, ' ojing enkitoria e Nkai, kake ilo oas enayieu Papa lai otii shumata. Aayooki aajoki ilkumok teina olong, 'Olaitoriani, Olaitoriani, keitu kimbonisho te nkarna ino, nikiaas ine nking'asia te nkarna ino?' Naa kashirraki ina kata ajoki ninche, 'Eitu ae kata ayiolou intae, enchom entung'uayoki intae, ilaasak loo ntorrok.' "* Neaku, kepaasha tinisuj imbaa e Yesu ti oriong ake. Keyieu Yesu nisuj ninye to Itau owang te sipata. Meyieu nikiaku anaa ilo ng'aboli otediaa ninye amu keeta imbenek kake meeta ilng'anayio (Mark 11: 12-14). Etejo Yesu keyiolouni oltung'ani too lng'anayio lenyena (Matayo 7: 15-20). Ekitum eretoto te Nkai tinikiuloki enkomono anaa enataasa Yesu o ilo tung'ani oji Epafras (Ilkolosai 4: 12). Kearare oleng aomonoki

iltung'ana. Nejo Yesu ore metii ninye meeta enikias (Yohana 15: 5). Kake etejo Paulo, "Aidim ataasa mbaa pooki tiatua ilo laa ninye laaidimie" (Ilfilipi 4: 13).

Matisipu **Ilfilipi 1: 9-11** pee ejo Paulo, "*Ore enkomono ai naa inchere pee eponari enyorrata inyi oleng tiatua eyiolounoto o erishunoto oo mbaa, pee itumutumu aatonyorrai ina naisula, niaakuku biyot, ilemeeta leiyat te nkolong e Kristo. Neboreyu intae ilng'anayio le supatisho, ooimu atua Yesu Kristo, neyau enkitoo e nkisisa e Enkai.*" Kegira Paulo aimaki enyorrata nasipa, amu keetae enyorrata nemesipa. Metaa kelelek pee ejo oltung'ani kaanyor iyie kake ebaiki meitodolu ina nyorrata to iasat enyena. Ore ina nyorrata nagira aimaki Paulo naa keeta eyiolounoto o erishunoto oo mbaa. Neaku, maiteng'ena ate nikinteng'en ilkulikae enkipirta enyorrata nasipa. Nikinyok sii pee kimbung enkoitoi naisul. Ebaiki naa eisidai enkoitoi naje kake keidimayu pee etii ai oitoi naisul alang ina. Neyieu sii nikiata ilng'anayio le supatisho. Nikinchoo Enkai enkisisa pooki. Keimaki sii Yohana 15: 1-8 ilng'anayio ooyieu Enkai te iyiook. Nejo tinikitoni tiatua Yesu nikiiu ilng'anayio kumok. Nejo olkereri le esiet, "*Teina errepi Papa, inchere iatata lng'anayio kumok, niakuku taa ilooiteng'eni laainei.*"

Kayieu nikisipu imbaa naibok iyiook pee mikiaku ilasujak le Yesu te sipata. Ore pee kisipu Matayo ematua e 23 kidol aajo kesujita Ilfarisayo inkitanapat te oriong ake. Nemetii enyorrata e Yesu atua iltauja lenye. Keimaki Yesu ninche ajoki, "*Ee kake ayia! Ilasirak o Lfarisayo sunkuro amu isujusuju oriong enkikompe o engirra kake ebore atua intae eului o enkarri nemeeta enkiririkinoto. Lo Farisayoi modooni! tang'asa isuja atua enkikompe o engirra pee etum sii oriong ataa sidai*" (Matayo 23: 25-26). Neaku, ore entoki naibokito ninche pee mesuj Yesu naa inchere meeta ninche iltauja sidain. Kesujita dini enye tioriong kake isunkuro ninche amu eitorrok oleng iltauja lenye. Ore sii pee kisipu Marko ematua e 11 kidol aajo kegira aadamu iltung'ana Yesu te nkoitoi e tung'anisho. Amu ore pee elotu ninye Yerusalem



nejo ninche keeku olkinki otajeu ninche te sinkaisho e Roma (Negira aadamu sii ilkipaareta le Yesu anaa ilkulikae - Marko 8: 33). Kake mesipa ina damunoto. Neaku, ore pee elusoo enkiti rishata neibelekenya ninche neyieu neshe Yesu (Marko 15: 13). Ore pee kisipu Marko 11: 12-19 kidol aajo etapong'ori Ilyahudi tenaipirta tipat enkaji e Nkai. Amu, megira aisho Ilgiriki erishata pee eponu ninche aisis Enkai. Kegira amir intokitin te rishata enye. Neaku, ore pee kiata olkep keibok iyiook pee mikisuj Yesu te sipata too Itauja lang pooki. Ore pee kisipu Marko 11: 27-33 kidol aajo megira aadamu Ilyahudi imbaa e Yesu tenguton. Kegira ninche aarrip dini enye kake megira aing'oru Enkai te sipata. Neaku, ore pee kiata enkuretisho nikirrip indamunot ang alang indamunot e Yesu aashu Enkai naa keibok iyiook pee mikisuj Yesu te sipata. Keidimayu sii pee eibok iyiook imasaa ang anaa ilo tung'ani karsis (Marko 10: 17-31). Metaa kimbung imasaa ang oleng o metabana anaa nikipik imbaa e Yesu tenebo imbaa e kanisa siadi. Ore pee kisuj enkoitoi enkop ake naa keibok iyiook pee mikisuj Yesu te sipata. Tisipu Roma 12: 1-2 pee itum enkikoo naipirta ina bae. Ore pee kinyor ate alang Yesu naa keibok iyiook pee mikisuj ninye te sipata (Marko 8: 34-38). Ore ai bae nabayie nayieu nikisipu naa inchere ore pee kidamu ajo ekiaata engolon maate pee kias esiai Olaitoriani naa keibok iyiook pee mikisuj Yesu to Itauja pooki. Neikok Paulo iyiook tenaipirta ina bae to Lkorintio 12: 7-10. Ore pee kincho Enkai enchan ang neibelekeny aita engolon. Nejo Paulo, "...amu ore enkata nashal nanu ina kata agol" (2 Ilkorintio 12: 10).

Ketii embuku sidai oleng te Kingeresa naipirta ina bae naji, "*Not a Fan,*" naa oltung'ani oji Kyle Idleman oigero. Ore ina arna eina buku naa keeta tipat inchere, tenejo iltung'ana, "*Mikiyieu nikintaakuno anaa ilairukok le Yesu.*" Metaa kiiyieu nikiaku ilasujak le Yesu te sipata. Neaku, kayieu naaliki intae te ndorrop enajo ina buku. Keimaki ninye ina atini enaipirta Nikodemo te Yohana ematua e uni. Nejo ore Nikodemo naa oltung'ani oota indamunot naaipirta Yesu kake eton mesujita. Amu, eewuo ninye

kewarie, neaku, kajo keure ilchoreta lenyena. Ore pee misujita Yesu te sipata naa kelelek intaakuno anaa isujita. Metii enyamali sapuk. Nimitum inkisilisilot. Ketii iltung'ana kumok laiyo ninye amu keure iltung'ana nemeyieu nesuj Yesu te nkoitoi naitoriori te wang'an. Ore te Yohana ematua e 7 kidol Nikodemo etonita tenebo ilpayiani aashu ilaitoriak loo Lyahudi egira amitu Yesu (Yohana 7: 50-52). Naa melelek ina te ninye amu mesujita ilkulikae Yesu. Nejoki lelo payiani, *"Aa Galilaya sii iyie ing'uaa"* (Yohana 7: 52). Ebaiki nijo mme torrano ina kikilikuanata kake kemori oshi Galilaya tenebo Nasareti amu ore Nasaret naa enkiti anasa nemeeta tipat te ninche oleng. Neaku, ore pee eikilikuan ninye ina etiu anaa kegira amor ninye. Neaku, melelek ina te ninye. Ore tesyadi ina kidol Nikodemo egira aretu Yosef le Arimatea pee epiki Yesu enkurare. Nejo Yohana 19: 39, *"Nelotu sii Nikodemo, olapa otang'asa alo ayiaya ninye kewarie, neshoru enkitushulati eilata narropil o emanoo o esonkoyo nabaya rrantilini iip."* Netaasishore ninye iropiyiani enyena kumok oleng pee einyang'u nena tokitin. Neas sii ina bae te wang'an. Neitu eisudoo. Neaku, etiu anaa etaa ninye olasujani le Yesu katukul.<sup>6</sup> Neaku, ebaiki nigira taata aitaakuno anaa olasujani le Yesu kake migira asuj ninye to ltau lino pooki. Ebaiki niure iltung'ana aashu ishal ake nemiyieu nisuj Yesu te sipata. Ebaiki nimiyieu nipal entoki naje. Nijo kelelek tinintaakuno anaa olasujani le Yesu alang tinimbalunye ajo igira aitaakuno nirridu. Neimaki ilo tung'ani oji Kyle Idleman inkatitin kumok te Bibilia enaipirta ina bae. Neimaki Simon Olfarisayoi oyiolo imbaa naaipirta Bibilia oleng kake mesujita Yesu te sipata (Luka 7: 36-50). Neaku, mera ninye olasujani le Yesu te sipata. Neaku, kenare nikiata eyiolounoto oo mbaa e Yesu kake meitoshia eyiolounoto ake. Keyieu netii sii enkirowuaj tiatua iltauja lang pee kisuj ninye too nkatitin pooki, ata tenegolu imbaa aikaja. Ore pee kisipu enataasa ina kitok te Luka ematua e 7 kidol aajo keyiolo tipat teneji kenare nikiaku ilasujak le Yesu. Amu, ore pee easishore eilata enye narropil neesishore entoki naata tipat oleng te ninye. Etiu anaa eibukoyie iropiyiani

kumok oleng. Neaku, ore olasujani le Yesu naa keisho Yesu enkishui enye neisho ninye iropiyiani neishir sii tenkaraki ng'ok enyena. Ore olasujani le Yesu tiatua ina atini naa ina kitok. Itiu anaa Simon aashu ina kitok? Neimaki Kyle inkulie baa kumok tiatua kulo kererin: Luka ematua e 14; Matayo ematua e 23; Yohana ematua e 16; Matayo 7: 21-23; Yohana 3: 16 tenebo Luka 9: 23. Keipirta Yohana 3: 16 enkirukoto neipirta Luka 9: 23 esujata e Yesu; enkipototo e Matayo te Matayo 9: 9-11; Nikidamu osalaba le Yesu amu etaa ninye olasujani le Nkai o metabaiki enkeeya enye.<sup>7</sup> Matadamu sii aajo etaaraki ilkipaareta le Yesu pooki meteleku Yohana tenkaraki enkirukoto enye. Kake enoto sii Yohana inkisilisilot naagol oleng. Tenkitanyaanyukoto, keji etipika ilkulikae tung'ana leme ilairukok Yohana atua enkare naitokitok kake eitu eye ninye. Netii ai atini naipirta Yohana najo etooko ninye esayiet natipikaki ennikompe kake eitu eye.<sup>8</sup> Neliki iyiook Ilhebrania 11: 36-37 enaipirta ilkulikae tung'ana apa oonoto inkisilisilot naagol oleng.

## **9. Ekiun inkanisani ng'ejuko.**

Kitodua aajo ketii kanisa atua enkipankata e Nkai anaa enajo Efeso 3: 6,10, 21. Neiteru kanisa e dukuya tenkolong e Pentekoste anaa enalimu Iasat ematua e 2. Kake ore tedukuya ina kidol aajo keyieu Yesu neesishore olturrur tiatua enkipankata enye amu etegelua ilkipaareta tomon oare pee eiteng'en ninche neaku ninche osororua le kanisa e dukuya. Nelimu Yesu eneiko pee easayu ina to Iasat 1: 8 pee ejo, *“Kake ing'amumu intae engolon, tene elotu Enkiyang'et Sinyati shumata intae, niaakuku intae lchakenini laainei tiatua Yerusalem, o ti atua Yudea pooki o Samaria, o metabaiki ineeting'ie enkop.”* Naa ore pee easayu ina kidol aajo etuunote inkanisani te nene wuejitin pooki. Meidip tenelikioo ororei le Nkai ake. Keyieu neetae inkanisani te nene wuejitin pee elo dukuya ororei le Nkai. Neaku, keyieu Yesu nikinteru tene wueji nikitii kake keyieu sii nikipuo dukuya aau inkanisani too nkulie

wuejitin. Meidip tinikipuo enkop o Lmaasai ake. Kenare nikiata enkipankata sapuk pee kipuo sii inkulie wuejitin ineetii ilkulikae oshon. Keliki iyiook Iasat 6: 7 enaipirta embulunoto e kanisa te Yerusalem, nejo, *“Neponari ororei le Nkai, ore esiana oo looiteng’eni neponari oleng te Yerusalem, ore ilapolosak kumok neunokino enkirukoto.”* Nejo sii Iasat 2: 41 eibatisaki iltung’ana oobaya **inkalifuni uni** teina olong e dukuya e kanisa. Nejo Iasat 4: 4, *“Kake eiruko ilkumok le lelo ootoning’o ilo rorei; nebaya lewa anaa **nkalifuni imiet.**”* Netii sii ilkulikae kererin oolimu enaipirta embulunoto e kanisa te Yerusalem anaa kulo: Iasat 5: 14: 6: 1.

Eitu esioki aapuo ilkipaareta le Yesu inkulie wuejitin amu ore pee epuonu inkisilililot naipirare kanisa e Yerusalem netotoni ake ilkipaareta te Yerusalem. Neliki iyiook Iasat 8: 1 ina bae, *“Nedumakino ina olong ake osina kitok ina sirit oo looiruko natii Yerusalem, neidapashakino pooki olkirine pooki le Yudea o le Samaria, ilkipaareta ake ootelektua.”* Kake eshomo ilkulikae nene wuejitin. Nejo Iasat 8: 4, *“Neeku ore lelo ooidapashakinote nena kuapi nepuo ninche aalikioo ilo rorei.”* Nejo Iasat 8: 5, *“Nelo Filipo enkanasa oo Samaria neinosaki ninche Kristo.”* Neaku kegira Filipo aasuj enatejo Yesu to Iasat 1: 8 amu keaku ilkipaareta le Yesu ilchakenini te Samaria. Melakua oleng Samaria te Yerusalem, ebaiki inkilomitani 60 ake. Kake olikai orere ninche. Amu, *“ilnusui ninche ime iinot, kake keshula osarge lenye olkulikae oreren. Keshula o Assyrian neshula sii Olyahudi, neaku keitipatisho. Nejo Ilyahudi mme iinot iltung’ana le Samaria neaku meshulare ninche katukul.”*<sup>9</sup> Eshomo Filipo aliki ninche ororei le Nkai ata tenaa era ninye Olyahudi. Ore tesiadi ina nelo Petero aliki Olgiriki ororei le Nkai oji Kornelio (Iasat 10). Kake melelek ina te Petero amu etejo to Iasat 10: 27, *“Iyiololo intae pooki aajo kemito ena amu meshulare oltung’ani loo Lyahudi ole likae orere, nemejing enkaji enye; paa Enkai naatiaaka nanu mijo ake enturuj likae tung’ani nimijo mesinya.”* Ore te dukuya ina neidetidetu imbaa enking’asia naitodolu ajo mesinya lelo tung’ana ooji Ilgiriki (Iasat 10: 9-23). Neishakenoo Petero tedukuya ninche ajoki,

*“Esipa atayiolo inchere ore Enkai, meeta olkep, kake ore pooki ng’ae oure ninye aa ololorere ora, neas isupati te Enkai, nenyorraa ninye.”* Nepuo sii ilkulikae aliki Ilgiriki ororei le Nkai anaa enalimu Iasat 11: 19-21.

Ore tempolos enena baa neaku sii Saulo olairukoni le Yesu, naa keji sii Paulo (Iasat ematua 9). Kake eitu esioki sii ninye aiteng’ en Ilgiriki. Kake ore pee elo Barnaba aing’oru Saulo neriku ninye Antiokia naa kanisa edukuya Olgiriki. Neiteng’ en ninye tenebo Barnaba iltung’ana. Nemanaa Paulo tenebo Barnaba alikioo ilomon supati. Kepuo oshi ninche aiteru tenkaji oo Lyahudi entumo (Iasat 13: 5, 14,). Kake ore pee eany Ilyahudi ororei le Nkai nejo, *“Keishiaakino naa intae eiteraki aaliki ororei le Nkai. Kake ore amu itanang’aitie, nitoduaa oopeny inchere meishiaakino intae enkishui nemeish, ng’ura, kipuo iyiook enetii Loreren. Amu ina doi eitanapa iyiook Olaitoriani, ajoki. ‘Aaitaa iyie ewang’an oo Loreren, peyie iyau iyie enjeunoto o metabaiki ineeiting’ie enkop’ ”* (Iasat 13: 46-47; Isaya 42: 6). Ore te sipata eshomo Paulo dukuya anyok aiteng’ en sii Ilyahudi kake eiteng’ena sii Ilgiriki (Iasat 14: 1, 27; 17: 2, 12). Neaku, ore pee etum Ilyahudi, Ilsamaria, o Ilgiriki ororei le Nkai neitodolu ajo etaase enatejo Yesu to Iasat 1: 8. Keloito ororei le Nkai dukuya o taata o metabaiki ineeiting’ie enkop.

Kayieu nikisipu **Iasat 14: 21-25** pee kidol aajo ore te nene wuejitin pooki netuuno Paulo inkanisani. Amu, kejo Iasat 14: 23, *“Ore pee egelaki ninche Iipayiani te sirit (kanisa) ake pooki, neomon eitupukoo ate, neomonoki ninche Olaitoriani, ilo laa ninye eiruko ninche.”* Neaku, keibala ajo ore pee epuo ninche enkanasa naje aalikioo ororei le Nkai **neun sii kanisa tenetum iltung’ana ooiruko**. Negelaki sii ilpayiani oorikoo nena anisani. Neaku, kenare nikisuj enataasa Paulo amu etejo ninye to Lkorintio 11: 1, *“Nanu entoduaai anaa enaduaaya sii nanu Kristo.”* Metaa matoomon Enkai pee kipuo dukuya aaun inkanisani too wuejitin neutaki Enkai iyiook. Nikisilig Enkiyang’et Sinyati pee eisho iyiook engolon.

## 10. Ekintodol ilkulikae olnɡ'ur o enyorrata e Yesu.

Matadamu kulo kererin: **Marko 1: 40-41.**

Keretu iyiook enatejo ti ai buku naipirta kulo kererin,

“Ore ina atini naa keipirta olnɡ'ur le Yesu o enkitieunoto enye. Neipirta enkishiunoto tiatua Yesu. Keeta Yesu olnɡ'ur oleng amu keeta ilo tung'ani enyamali sapuk oleng. Metii lelo tung'ana oomuoi ewueji netii lelo tung'ana biot. Meshula tewueji nebo. Neaku, kening'ito osina oleng. Neing'urrie Yesu ninye. Nenare nikiata sii iyiook olnɡ'ur tenkaraki iltung'ana ooata enyamali pee kituu anaa Yesu. Neeta sii Yesu enkitieunoto amu keidimayu pee eitasur ilo tung'ani Yesu. Ore inkulie katitin keipotito Yesu iyiook pee kijing batisho pee kiretu ilkulikai.”<sup>10</sup>

Keeta sii tipat pee kiyiolou aajo kejo enkitanapata meishiakino pee eiseyie oltung'ani bioto likae oata enkeeya oo lbolot. Nejo Ilawi 5: 3, *“Aashu tenelo neiseyie ninye mbaa nemesinya oo ltung'ana e pooki pukunoto laa te ninye eaku olemesinya, ore ina bae neisudoro te ninye, ore ake pee elotu ayiolou ina bae neaku ninye oloitarruoyie.”* Neitoki ajo Ilawi 13: 45-46 te naipirta iltung'ana laijo lelo, *“Ore ilo tung'ani oata enkeeya oo lbolot nchoo eishop nkilani naapolosa neisho ilpapat le ndukuya enye eisiong'a, neimulumul ninye enkutuk enye ajo, 'Olo lduruk olo lduruk.' Nebik ninye aa oltung'ani oata olduruk enkata pooki naba anaa enaata ina keeya; neaku ninye olaata entioto; neton ninye openy te wueji enye ti auluo ilng'oborri.”* Keitodolu ina atini inchere etishilayie Yesu olnɡ'ur alang nena kitanapat e oriong naipirta imuoyiaritin aashu matejo olduruk. Ing'orai sii kulo kererin pee isipu imbaa naaipirta olnɡ'ur: Marko 6: 30-44; Matayo 22: 39; Yakobo 2: 14-17; Matayo 25: 31-46.

Matisipu oleng **Luka 4: 16-30**. Nejo kulo kererin, “*Nerrinyo Yesu Galilaya ebore engolon e Nkiyang’et Sinyati, neibulaa enkisisa, nkuapi naamanita. Neiteng’enisho too nkajijik enye e ntumo nerrep iltung’ana pooki ninye. Neito ninye Nasaret ine netubulaka, nejing enkaji e ntumo te nkolong e nkiyeng’iyeng’ata, anaa enaiko apake, neitash e aisoma. Neishori embuku o loiboni le Nkai Isaya. Nebol ina buku netum ewueji netisiraki aajo, ‘Etii Enkiyang’et o Laitoriani atua nanu, amu aatubukoko ninye e ilata, aput, naairriwua matoliki laisnak ororei supat, nalaku te sinkaisho ilooena, naliki lmodook emboloto oo nkonyek enye, nalaku aisho epuo, lelo ooitorogonyaki, nalimu olari osarunye Enkai iltung’ana lenyena.’ Neiken embuku, neshukoki olashumani neton; neibelekenya lelo pooki ootoni te nkaji e ntumo aaing’or ninye. Neiter ajoki ninche, ‘Eitabayioki taata kulo sirat ining’itoto too nkiyiaa inyi.’ Neimaki pooki ninye aarrep eing’asia too rorei le mpiris ooimutua enkutuk enye. Nejo, ‘Ae mme olayioni le Yosef doi ele?’ Nejoki ninye ninche, ‘Meeta nchere pee eitu kiyookiki aadung’ie rashe aajoki, ‘Olabaani tabaa kewan! Taasa sii iyie teine nitubulaka, mbaa nijo nena nikitoning’o nchere itaasa te Kapernaum.’ Nejo, ‘Esipa ajoki intae, meetae oloiboni le Nkai oyanyiti te murua nabulaki. Esipa nchere keetae apa nkolia kumok tiatua Siraeli te nkata o loiboni Eliya, pee elai enchan too larin okuni o lapaitin ile, neibulu olameyu ina kop pooki; kake ore eyia, eitu eirriwakini Eliya hoo nabo e nena, enkoliai e Sarepta ake eirriwakaki te nkop e Sidon. Kumok sii iltung’ana le nkeeya oo lbolot oatae te Siraeli te nkata oloiboni le Nkai Elisha, nemeetae hoo likae obo oitukuoki, leme Naaman ake le Siria.’ Ore pee ening nena baa pooki etoni tiatua enkaji e ntumo neiput engoro. Neinyototo, nearaa auluo eina anasa neriku embata e marti namanya ina anasa, ejo pee esulaa teina marti; kake etapaashari apolos atua ninche nelo ninye.”*

Matadamu kuna baa naaipirta kulo kererin:

Kegira Yesu aisom Isaya 61: 1-2 (ebaiki etii sii imbaa naaing'ua Isaya 58: 6) kake eitu ebaiki ina najo, "*o enkolong e lap e Nkai ang.*" Ore kulo tung'ana ooinining'ito Yesu naa kegira aanyu ninche enkolong elap pee eitame Enkai ilmang'ati lenyena. Kake eitu eisom Yesu kulo kererin. Amu, eitu elotu tenkaraki elap. Ata ina rishata nikitii iyiook mme erishata e lap. Kake kelotu enkolong e lap e Nkai teneshukunye Yesu.

Neliki Yesu ninche ajoki ore kulo rorei naa keipirta ninye. Nenyor ninche tedukuya kake kajo ore pee edamu oleng netum olkob tenkaraki era ninye oltung'ani oing'uaa emurua enye. Ore pee elo Yesu dukuya aliki ninche inkitanyaanyukot naaipirta Ilgiriki oonoto olng'ur le Nkai, netum ninche engoro sapuk oleng. Amu, menyor ninche Ilgiriki naa etiu anaa kejoito Yesu inchere ore pooki ng'ai oborru naa ketum empiris, ata tenaa kera ninche le likai orere. Kake meyieu nening Ilyahudi ina. Netum engoro oleng o metabana neyieu near Yesu kake eitu eidimu ninche Yesu.

Emikitiu sii iyiook neijia taata anaa lelo tung'ana? Kijo kira supati alang ilkulikae tung'ana. Ore tenkaraki ina netang'amutua ilkulikai tung'ana ororei le Nkai tedukuya nikitii iyiook siadi. Kake keyieu nikipal olkep o nkitolonyat niking'amu sii iyiook Yesu pee kitum elakunoto nasipa. Amu, ore kigira aamen ilkulikai keidimayu pee egiroro empiris Enkai iyiook. Neaku, matang'amu ororei le Nkai "taata" amu etejo Yesu, "*Eitabayioki taata kulo sirat ining'itoto too nkiyiaa inyi*" (Lk. 4: 21) Neaku, keishiakino pee erikino iyiook imbaa naatulusoitie niking'amu ororei le Nkai taata amu ore ena olong naa eninyi o enoonkera inyi. Mikiyiolo taaisere kake kitii taata aainining'ito ororei le Nkai neaku, matang'amu. Keitodolu sii kulo rorei ajo kegira Yesu aipot kewon ajo Messia.

Matisipu sii ajo keidimayu pee easisho Enkai te nkoitoni neitu kinteiki. Amu, eitu eiteiki iltung'ana aajo kemayian Enkai ina oliai e Sarepta (1 Ilaiguanak 17: 12; aashu Naaman le Siria (2 Ilaiguanak 5: 1-14). Neaku, ore taata meishiakino tinikigiroo iltung'ana tenkaraki merrep ninche ilkulikae tung'ana. Ore pee



eeta ninche oltau ong'amu imbaa Enkai nenare nikipuo enetii aaiteng'en ninche.

Ore ai bae naipirta kulo kererin naa inchere keyieu Yesu neretu iyiook tenkiyang'et o too seseni lang. Amu keliki iyiook Luka 4: 18 ajo keyieu Yesu neliki iltung'ana ilomon supati kake eyieu sii neretu ninche too nyamalaritin naata. Neaku, ore pee kiyieu nikisuj enkipankata Enkai te Yesu nenare nikiretu sii ilkulikae too nyamalaritin naata. Kidol sii tenkishui e Yesu pooki aajo kedamu inyamalaritin oo ltung'ana pee eitoti ninche neishiunye imueyiaritin enye aiko neijia. Neaku, kenare nikisuj iroruat enyena.

Kake ore entoki naisul nayieu Yesu te iyiook naa pee kiata elakunoto. Ore elakunoto nasipa naa ketii atua Yesu ake. Metii atua enkoitoo oong'ok aashu enkoitoo olkuak ake. Etejo Yesu kewon, "Tintonini to rorei lai nirara ilooiteng'eni laainei oosipa; naa iyiolouu esipata; nelaku intae esipata" (Yohana 8: 31, 32).

Kayieu nikisipu enatejo Yesu naipirta esiai enye tenguton. Amu ore kulo kererin ootii Isaya naa kegira aaimaki esiai e Messia nera Yesu Messia. Ore enedukuya, naa etejo etubukoko ninye eilata. Kebukokini apa ilkinki eilata kake ore tene kegira aimaki Enkiyang'et Sinyati. Kelimu Petero ina bae te nkoitoo naibala tenejo, *"Iyiololo intae olapa rorei oirriwaka nkeru oo Siraeli, otolikioyioki lomom supati lo sotua te Yesu Kristo, olaa ninye Olaitoriani le pooki. Ilo rorei liyiololo intae maate, oitadarayioki te Yudea pooki, aaiteru te Galilaya, eidipe enkibatisa apa nalikioo Yohana. Yesu le Nasareti etuputo (eela) Enkai te Nkiyang'et Sinyati o engolon nelotoo aas isupati, neishiunye lelo pooki ooibooko oloirirua enkop, amu ketii naa Enkai tenebo ninye"* (Isat 10: 36-38). Neaku, keishiakino oleng teneipoti ninye aajo Kristo aashu Messia amu keipirta nena arn ina bae inchere enkielata. Neaku, ore embae edukuya naa inchere kenare nikisuj enkoitoo e Yesu aaikilikuan Enkai pee eiput iyiook anaake te eilata naing'uaa Enkiyang'et Sinyati. Kesipa ketii Enkiyang'et Sinyati atua iyiook ilairukok kake eisidai tinikiomon Enkai pee eiput Enkai iltauja lang anaake pee kias esiai enye.

Ore eniare nejo Yesu, *"naairriwua matoliki laisinak ororei supat.."* Kegira Yesu aimaki ilaisinak ate negira aimaki sii

ilaisinak loo ltauja. Amu, etejo ninye te Matayo 5: 3, “Emayiana ilaisinak too ltauja.” Metaa kemayiana ilo tung’ani oata emborron neng’amu ororei supati. Neaku, kenare niking’oru iltung’ana oata ltauja oobor pee kinteng’en ninche ororei le Nkai tedukuya ilkulikae. Amu, ninche oong’amu ilomon supati aasioki alang ilkulikae. Mikiany sii kiliki ilkarsisi. Kake keibala ajo kegol oleng pee eng’amu ninche ilomon amu mebor oshi ltauja lenye.

Ore eneuni, neitoki ajo Yesu, “*nalaku te sinkaisho ilooena..*” Ore te sipata kegira Yesu aimaki sinkaisho oo ltauja. Neidimayu pee etii impukunot kumok e sinkaisho. Ebaiki netii oltung’ani atua sinkaisho tenkaraki emerai enye, aashu eloloito, aashu engoro enye, aashu olkep lenye, aashu olmarenke lenye, aashu enkuretisho enye, aashu ai toki ake. Ore ilomon supati naa inchere ketii elakunoto e nena pooki tiatua Yesu. Kesipa ore inkulie katitin naa kegol oleng kake kejo Ilmaasai, “*Keme embaare neretisho.*” Ebaiki nejo oltung’ani metii atua sinkaisho kake etejo Paul te Roma 6: 16, “*Aimiyiololo aajo ore ake olinchosh meitoria intae niakuku rrindiki lenyena, nitaa rrindiki le ilo lining’ining’i, aa too ng’ok naa ore pee aa ng’ok isiayiayia neiting’oki keeya; ore pee aa Enkai ining’ining’i, neiting’oki esupatisho.*” Neaku, tenaa ketii entoki nikigira aibung iyie nimiindim atapala, kenare nisipu oltau lino tenaa itii atua sinkaisho.

Neitoki ajo Yesu, “*naliki ilmodook emboloto oo nkonyek enye..*” Ore te dukuya eishiunye Yesu ilmodook ate. Kelimu kulo kererin enaipirta ina: Mat. 9: 27-31; 12: 22; 20: 29-34; Marko 8: 22-26; Yohana 9: 1-7. Naa kenare nikiretu iltung’ana oata enyamali to sesen tenaa keidimayu. Nikiomonoki ninche nikiretu ninche meshomo sipitali tenemeata ninche iropiyiani. Kake keipirta sii ele kereri iltung’ana oora modook too ltauja lenye. Keimaki Yesu ina te Yohana 9: 35-41.

Neitoki ajo Yesu, “*nalaku aisho epuo lelo ooorogonyaki...*” Kelala ilo rorei tene oji “*oorogonyaki*” amu keidimayu pee eeta oltung’ani enyamali tenkaraki imbaa kumok oleng. Ebaiki etaa kerruoyo enkishui osesen oltung’ani tenkaraki esujata enye o nkoitoo oo ng’ok. Aashu ebaiki eeta likae enyamali tenkaraki aisinanisho enye. Keeta Osotua Musana enkiikoo sidai naaipirta

ina aisananisho. Nejo Lawi 25: 35, “*Naa teneaku olalasho lino aisinani, neaku meidim ataretu kewan tenebo iyie, tareto iyie ninye, anaa olomoni anaa olamutanani likiewuo ashulare.*” Ore pee ejo “*olalasho*” naa megira aimaki oltung’ani ake otii olmarei lino kake kegira aimaki oltung’ani otii enkop ino. Ore tiatua kulo kererin kegira aimaki oltung’ani otii atua ilo turrur le Israel. Neaku, kenare nikiretu iltung’ana anaa enataasa Yesu aa inchere teneeta enyamali kenare niking’oru enkoitoi pee kiretu ninche. Kake kejo sii Paulo, “...amu enap ake pooki tung’ani olola lenye makewan” (Ilgalatia 6: 5). Neaku, ore inkulie katitin ketii iltung’ana lemeyieu neretu ate.

Neitoki Yesu ajo, “...*nalimu olari osarunye Enkai iltung’ana lenyena.*” Kelimu Ilawi 25: 8-17 enaipirta ina bae to Sotua Musana naa keji “olari le rrinyunoto” (Keji te Kingeresa Year of Jubilee). Ore pee elusoo ilarin onom nelotu olari le rrinyunoto. Ore pee elotu ilo ari nelaku irrindiki, nemeun sii ilanterera too mukuntani enye. Kake kegira Yesu aimaki imbaa enkiyang’et aa taa imbaa naaipirta elakunoto oo Itauja loo ltung’ana.

Ore tenkaraki eewuo Yesu anaa Messia nelotu sii erishata enchipai tenkaraki elakunoto natum iltung’ana teneng’amu Yesu. Ketum empalakinoto oo ng’ok. Kake keidimayu pee eipirta sii enkishiunoto oo ltung’ana o elakunoto natum oltung’ani tenepuku te aisananisho.

Ore pee kidamu ina lakunoto te lalai kenare nikidamu elakunoto nikitum tenkaraki enkeeya e Yesu te shumata osalaba. Neaku, ore pee eng’amu oltung’ani Yesu neibatisai ajing atua ninye eewuo erishata elakunoto enye (Tito 2: 11-14; Efeso 1: 7; Ilgalatia 5: 1; Ilkolosai 1: 13, 14; Yohana 8: 36; Iroma 6: 1-3).

Matadamu tipat eina dung’et erashe natejo Yesu pee ejo, “*Olabaani tabaa kewan.*” Ebaiki neyieu ninche neibalakinyie Yesu ninche te murua enye inkitoduaat pee eyiolou tenaa kesipa enatejo ninye. Kake etawala sii Yesu ina Ndung’et erashe tenkae Ndung’et erashe pee ejo, “*Esipa ajoki intae, meetae oloiboni le Nkai oyanyiti te murua nabulaki*” – Luka 4: 24. Neaku, meyieu neas inkitoduaat amu keyiolo iltauja lenye. Neliki sii iyiook Marko 6: 5 ajo meidim ataasa inkitoduaat amu medupa enkirukoto enye. Naa ore pee ejo “meidim” metiu anaa meidim

katukul kake etumuta pee meas inkitoduaat kumok tenkaraki meeta ninche enkirukoto.<sup>11</sup>

Matadamu oleng ajo ore pee mikiata iyiook olng'ur too lkulikae etiu anaa mesipa enkirukoto ang. Mesipa indamunot ang naaipirta ilkulikae. Mesipa eseremare ang. Nemeata sii elikioroto ang engolon tinimiking'urrie iltung'ana.

**11. Ekiasishore inkishoorot ang te nkisisa Enkai o te nkipankata enye (mission enye) nikijing enkiteng'enare nairirikino esiai nikiyieu nikias pee kias aaitobiraki te yioulounoto o te ng'eno.**

Kejo **1 Petero 4: 10**, “*Taasishore inkishoorot naaba anaa inikinchooki aisiaayie ilkulikae, anaa olaing'urani supat te mpiris e Enkai oo mpukunot kumok.*” Nejo sii 2 Petero 1: 5, 6, “*Tenkaraki ena entipik enyuaata pooki, entoponiki eyioulounoto; ore eyioulounoto inyi niponikiki enkibooroto ate...*” Neaku kenare nikiata sii eyioulounoto pee kias esiai e Yesu aitobiraki. Keliki sii iyiook 1 Ilkorintio 12: 1-31 enaipirta inkishoorot. Neasishore Paulo osesen anaa enkitanyaanyukoto pee eibalayu imbaa enyena. Keeta osesen irubat kumok kake keeta pooki tipat neas pooki esiai enye pee eas osesen esiai enye aitobiraki. Naa keas iltung'ana nena pooki pee eretu kanisa (1 Ilkorintio 12: 1-11). Ore hoo tenaa keipirta ina kitanyaanyukoto te Matayo 25: 14-25 enkoitoi nikiasishore iropiyiani ang, keipirta sii enkoitoi nikiasishore intokitin pooki naishoo Enkai iyiook anaa inkishoorot, eng'eno, o masaa pooki. Neaku, keiteng'en iyiook pee kiasishore nena pooki aashu kelotu enkolong pee eisikong Yesu iyiook tenkaraki eitu kiasishore enaishooki iyiook aitobiraki. Matadamu aajo ekiasishore inkishoorot pooki te nkisisa Olaitoriani (1 Petero 4: 11).

**12. Ore te kanisa nikijo kinteng'en iltung'ana, aa inkera, elelero, oltung'ana kituak aaitobiraki pee eyiolou Bibilia, Enkai, Yesu o esiai enye te kanisa o te nkipankata Enkai.**

Keitosha enatejo ti ai buku enaipirta ina bae. Neaku, kayieu nang'arie enatejo tina buku naji *Enkipankata oo Nkisomaritin e Kanisa - Olari le dukuya*.

Keeta tipat oleng tinikinteng'en inkera ang oltung'ana kituak sii. Kidol tipat enkiteng'enare tenkikoo e Yesero pee eikok Musa, nejoki Yesero Musa, *“Toning'o naa enaajoki amu kaaikok, naa keaku Enkai tenebo iyie! Taa itii dukuya Enkai; ninteng'en ninche nkitanapat o naatejo, nintayiolou ninche enkoitoi napuoyie o enaishiaakino neas”* (Enaidurra 18: 19, 20).

Ore tiatua embuku Enkigilata oo Nkitanapat kidol Musa egira aiteng'en iltung'ana loo Israeli pee eiteng'en inkera enye inkitanapat Enkai, nejoki ninye ninche, *“Entushum naa kulo rorei laainei too ltauja linyi, o te nkishui inyi; nieniene ninche metaa olmonekie too nkaik inyi, netiu ninche anaa enkishili too nkomomi inyi. Ninteng'ening'ene ninche nkera inyi, niimakiki ninche itonini too nkajijik inyi o ipuopuo te nkoitoi, o irurara o itonini. Ningerigere ninche too molinkaishi oo nkutukie oo nkajijik inyi o too nchomito inyi”* (Enk. 11: 18-20).

Matisipu aajo keitanap iyiook kulo kererin pee kinteng'en inkera ang. Metaa kinteng'en ninche too nkang'itie ang neme te kanisa ake. Kenare nikiata enkiteng'enare sidai te kanisa kake kenare nikiata sii enkiteng'enare sidai too ltirenito lang.

Ekidol enkitanyaanyukoto sidai te nkishui e Timoteo. Amu, keyiolo kokoo enye naji Lois ororei le Nkai neiteng'en enkerai enye naji Oinike (ng'oto Timoteo). Neiteng'en sii Oinike Timoteo. Keibala ina bae tinisom 2 Timoteo 1: 5, nejo, *“Adamu sii ina kirukoto ino nasipa, enkirukoto apa naitera amany kokoo ino Lois, o ng'utunyi Oinike, nayiolou taata aitisip inchere etamanya atua iyie.”* Neaku, ore pee inteng'en inkera inono naa kaata osiligi ajo keiteng'en sii ninche inkera enye.

Ore sii tembuku oo Ndung'eta e Rashe nikidol olupayian obo ogira aikok enkerai enye, nejoki ninye, *“Toning'o enkerai ai*

*enkikoo e papaai lino, nimiany enkiteng'enare e yieyio lino; amu keaku nena utarot enkishili te ndukuya ino neaku olupisiai te murt ino*" (Ndung'eta e Rashe 1: 8, 9).

Ore to Sotua Ng'ejuk kidol Yesu egira aitanap ilkipaareta lenyena pee eiteng'en iltung'ana pooki, pee ejo Yesu, "*Enchom entaa loreren pooki ilooiteng'eni laainei, nimbatisasa te nkarna e Papa o ene Nkerai o ene Nkiyang'et Sinyati; ninteng'ening'ene meibung'a inaitanapa intae pooki; naa ng'ura, atii tenebo intae nkolong'i pooki o metabau enkiting'oto e nkop*" (Matayo 28: 19, 20).

Nikinteng'en ninche pee eibung inkitanapat e Yesu. Metaa kinteng'en ninche pee eyiolou eyieunoto Enkai te ninche neibung enkoitoi e sinyatisho amu keyieu Enkai nikiaku iyiook iltung'ana sinyat te dukuya ninye (Iroma 12: 1, 2; Efeso 1: 4; 1 IIses. 4: 3-8; 1 Tim. 4: 7). Nesipu tipat enkirukoto nasipa, enkirridunoto nasipa, tipat e kanisa, tipat pee kilikioo ilomon supati, tipat pee kiretu ilooshal, o tipat eramatare oontokitin pooki e abori enkitoria e Yesu. Ore tiatua embuku o Iasat 2: 42 kidol ilairukok eibung'ita enkiteng'enare oo Ikpaareta le Yesu. Neaku, ore tena kanisa edukuya keeta enkiteng'enare tipat oleng.

Keliki Paulo iyiook enaipirta tipat ororei le Nkai te iyiook, nejo, "*Ore ilkigerot pooki naa Enkai nayang'ua, neeta dupoto te nkiteng'enare, o te nkisikong'ata o ereriyoto, o te nkitubulunoto tiatua esupatisho, paa ore oltung'ani le Enkai neitabari te nkiaas pooki sidai*" (2 Tim. 3: 16, 17). Neaku, keretu iyiook enkiteng'enare ororei le Nkai too nkoitoi kumok tenaa keiteng'eni aitobiraki. Ore enkiting'oto naa pee eidim ilairukok aataas isiaitin pooki sidain.

Eitanapa Paulo Timoteo pee eiuloki enkiteng'enare te kanisa, nejoki Paulo ninye "*Tasheikinoyu enkisomata oo lkigerot te dukuya iltung'ana o elikioroto, o enkiteng'enare o metabanaa nalotu*" (1 Tim. 4: 13). Ore te mbuku e Iroma 12: 6, 7 neimaki Paulo inkishoorot naapasha. Nejo olkereri li opishana, "... ore paa ene nkisiaayiare nikisiaaishore, ore paa ene nkiteng'enare, nikinteng'enishore..." Neaku, ore pee iata enkishooroto pee inteng'enisho naa kenare niasishore ina kishooroto.

Ore te mbuku **Efeso 4: 11, 12** kidol aajo eipanka Enkai pee etii ilaiteng'enak kanisa. Nelo Paulo dukuya tembuku o le Efeso

4: 12-14 aliki iyiook ajo ainyioo pee enare netii ilaiteng'enak, "...  
*peyie erreteni lelo sinyat, te nkaraki ina siai e ramatare, ene  
nchetata o sesen le Kristo, o metabaiki pooki naboisho naimu  
enkirukoto o eyiolounoto eilo Inoti le Nkai, nikiaku iltung'ana  
ootubulutua aamitunye, aabaiki entemet e mbotoro nalung'a e  
Kristo; pee mikintoki aaku nkeru, naanang'ari idie o idie to  
lkutati ake pooki le nkiteng'enare, o losek loo ltung'ana tiatua  
esunkureisho o losekin le lejare."*

### **Neaku, matisipu kuna baa.**

**Peyie erreteni lelo sinyat** – Kenare nikiata enkiteng'enare pee  
kirretena pee kimir shetani. Ore pee kiyiolou ororei le Nkai  
nikisuj sii, nikiaku iltung'ana ooterretenate pee kiimaa  
inkisilililot kumok.

**Tenkaraki eramatare** – Kenare nikitum enkiteng'enare pee  
kiyiolou enikinko pee kiramata kanisa, ilmareita lang o ilkulikai  
tung'ana.

**Ene nchetata o sesen le Kristo** - Ore pee meatae enkiteng'enare  
sidai naa kegol oleng pee kishet osesen le Kristo. Kake ore pee  
etii enkiteng'enare sidai naa keretu iyiook pee kimbung kuna baa  
naata tipat alang inkulie baa nayau enchankar.

**Pee kiata naboisho tiatua enkirukoto ang** – Keyieu kanisa  
naboisho pee elo dukuya aitobiraki. Ore pee etii enkiteng'enare  
sidai naa keretu kanisa pee etum naboisho.

**Eyiolounoto eilo Inoti le Nkai** - Kenare nikiata enkiteng'enare  
pee kiyiolou Yesu o eyieunoto Enkai. Ore pee metii  
enkiteng'enare keidimayu pee kiaku anaa lelo tung'ana apa  
tenkata oo larishak. Kejo Ilarishak 2: 10, "*Ore apa ina ishohi  
pooki neishunye sii ninche aaye; neitoki ailepu ae ishohi te siadi  
ninche, apa nemeyiolo ninye Olaitoriani aashu esiaai apa  
nataasa ninye tenkaraki Israel.*" Neaku, kaata osiligi ajo  
meyiolou Olaitoriani amu eitu etum ninche enkiteng'enare sidai  
naipirta ninye.

**Kiyieu enkiteng'enare**, "*pee mikintoki aaku nkeru, naanang'ari  
idie o idie to lkutati ake pooki le nkiteng'enare, o losek loo  
ltung'ana tiatua esunkureisho o losekin le lejare.*" Neaku, ore

pee kiata enkiteng'enare sidai nasipa, keretu iyiook pee mikisuj enkiteng'enare pooki ng'ejuk. Kijur imbaa nikisipu tenaa kegilunore nena baa ororei le Nkai.

Ekidol sii te mbuku e Tito inchere keishiakino pee kinteng'en iltung'ana loo mpukunot pooki aa inchere ilpayiani, intasati, intoyie, o ilbarnot (Tito 2: 1-15).

Ore enabayie tena matua matadamu enajo Ilhebrania 4: 12 enaipirta tipat naata ororei le Nkai te iyiook. Nejo, *“Amu keishu ororei le Enkai neeta engolon, nepi ninye alang olalem ake pooki opi mbat pokira, neimisho enarish oltau o enkiyang'et, neim irubat o ntolo, neyiolou ndamunot o nkiguanat oltau.”*

Ore ororei le Nkai naa keeta engolon oleng tinikiasishore aaitobiraki. Keeta engolon pee eibelekeny iltung'ana alang kuna oshi areta ena kop. Amu, keim atua iltauja loo ltung'ana neibelekeny ninche tiatua. Ore pee kisimaki iltung'ana tioriong ake naa keidimayu pee eton eeta iltauja torrok.

Neaku, matonyok pee kinteng'en iltung'ana lang ororei le Nkai pee etum engolon, eng'eno embulunoto, enkibelekenyata, o enkilejilej eatua iltauja lenye. Neaku, iltung'ana lemeiwuati-wuata te nkirukoto enye. Nemesuj enkiteng'enare pooki nalotu. Kake kejur imbaa pooki. Nikitum naboisho. Nemedoiki atua intemat e shetani amu kesujita ororei le Nkai.

Neaku, sii iltung'ana pooki leitu eiruk ilairukok le Yesu amu ketum enkiteng'enare sidai e kanisa. Amu, ore te sipata ketum ninche kulie kiteng'enaritin kumok tena kop kake keyieu nikinyok oleng pee kimput iltauja lenye ondamunot enye too ororei le Nkai.<sup>12</sup>

### **13. Ekinteng'en enkoitoi enjeunoto o enkoitoi e sinyatisho telulung'ata aitobiraki.**

Matonyok pee kiliki iltung'ana ororei le Nkai telulung'ata anaa enatejo Paulo te 2 Timoteo 4: 17, *“Kake eitasho Olaitoriani te nkalo ai, naaisho nanu engolon nalimunye ororei te lulung'ata, neaku aatang'adieki enkutuk o lng'atuny.”* Kake ketii inkanisani naasuj enkoitoi dorrop nemegira aalikioo ororei le Nkai



telulung'ata. Neiteleiki olairukoni likae tung'ani oyieue neiruk inkaik neomonoki ninye nejo etajeuo aashu etaa ninye olairukoni. Kake ore pee kisipu enataasa kanisa e dukuya nikidol aajo eitu esuj ninche ina kipankata (Acts 2: 36-41). Neiruk iltung'ana, neirridu ing'ok enye neibatisai nepuo dukuya tenchula oo lairukok, nelikioo sii ilomon supati. Ore pee kimbelekeny olkitamanyunoto sidai tiatua Bibilia naa keurori enkiteng'enare sidai nasipa e kanisa. Mme esiai ang pee kiponaa imbaa ng'ejuko taata kake ore esiai ang naa pee kinteng'en nena baa apake naatii Bibilia te nkoitoo sidai pee ebulu kanisa aitobiraki. Kelelek pee king'uar imbaa ng'ejuko kake kelelek sii pee eitapong'oo iyiook nena baa. Neaku, ore enkoitoo natii apake Bibilia te nkiterunoto nanare nesuj oltung'ani pee eaku olairukoni, naa pee eiruk Yesu anaa Enkerai e Nkai, Olaitoriani, Olaitajeunoni, neirridu ing'ok enyena, neibatisai, nelu dukuya abulu te nkirukoto enye nesuj iroruat e Yesu o metaba anaa nelotu enkolong enkeeya enye. Matusuj enkitanyaanyukoto e Paulo pee ejo, te Roma 15: 19, "...atolikioyie tukul (aashu telulung'ata) ororei supat le Kristo."

Matisipu kuna baa naaipirta enkoitoo enjeunoto. Ekinyor Enkai iyie oleng o metaba anaa neirriu Enkerai enye pee kinang iyie. Neas tempiris enye eton eitu iyiolou enaipirta enkipankata enye (Yhn. 3: 16).

Neibukoo osarge lenye te shumata olchani pee itum enkishui nemeish. Anaata kiata enashe oleng tenkaraki ina (1 Yhn. 3: 16; 4: 14-16). Keibala ajo ekishal oleng. Mikiindim aatoria enkitiko osarge loltauja lang. Mikiyiolo aajo kanu kimuoiyu nimikiyiolo aajo kanu kiiye. Ekishal oleng nikipong'ori sii inkatitin kumok. Neaku, meidimayu pee kingarakino engolon ang. Metaa ekiyieue eretoto oleng (Yer. 2: 13; 14: 7; 17:9; Irm. 3: 21-26). Kenare nikirridu ng'ok ang amu kitaasa pooki ng'ai ng'ok nikituata tiatua ng'ok nimikiindim aaitajeu ate. Nenare niking'amu enkitoria e Yesu tiatua enkishui ang. (Emb. 9: 20, 21; Ilheb. 6: 1 Irm. 10:9, 10; Iat. 20: 21; Mat. 5: 3; 18: 2-4; Yhn. 5: 24; Efe. 1: 24; 2: 1, 5; Iat. 2: 37, 38; 3: 19; Lk. 1: 14, 15; 13: 1-5; Ilkol. 2: 6.) Maibung'a

aakurraki enatejo Paulo to Iasat 20: 27, “*Amu maata enatelekua eitu aibalakinye intae lulung’ata e nkikoo e Nkai neitu aliki intae.*” Metaa kiliki iltung’ana ororei le Nkai telulung’ata nimikidung’oo imbaa naaje tenkaraki melelek ninche.

Ore pee kias ina nenare neibatisai iyiook. Ore tenkaraki engolon osarge le Yesu o empiunoto enye nepalaki Enkai iyiook ng’ok ang neitutum iyiook o Yesu neisho iyiook Enkiyang’et Sinyati tenkata enkibatisa. Nikias ina te nkirukoto, o tenkirridunoto (Iat. 2: 38; Ilgal. 3: 27; Ilkol. 2: 12; Iroma 6: 1-4; I Pet. 3: 21). Ore pee king’amu Yesu aiko neijia neini iyiook aigil nikitum enkishui ng’ejuk tiatua Yesu. Eshomo enkishui musana nelotu enkishui ng’ejuk. (Yhn. 3:5; 11 Ilkor. 5: 17).

Nenare sii nikibulu tiatua enkirukoto e Yesu aaku iltung’ana ootubulutua. Naa Enkai naisho iyiook engolon pee kibulu tinikisilig ninye nikinyok sii oleng aatoni tiatua ninye neton sii ninye tiatua iyiook (11 Petero 1: 5-10; Yhn. 15: 1-8). Eipanka sii Enkai apa pee kitii tenebo ilkulikae tenchula pee kiretuno nikiutaro sii (Iat. 2: 42-47; Efe. 3: 10). Nenare nikiliki sii ilkulikae ilomon supati (Matayo 28: 19-20). Nikiuloki sii enkomono (1 Ilesalonike 5: 17; Ilkolosai 4: 12; Efeso 6: 18-20). Nikiaku ilasujak le Yesu te sipata (Mark 8: 34-38; Ilfilipi 2: 5-11; 1 Petero 2: 21-24). Tisipu sii Yohana ematua 15:1-17 pee iyiolou eninko pee iaku olasujani le Yesu.

Nenare nikipal kuna: Emarmalisho e loloito, loirerioni, ng’-uarrat torrok, eomonoto e kulie tokitin neme Enkai, esakutore, mang’atisho, enchankar, olom, engoro, olorok, eoro, olarrabal le oro, enkiba neeta likae toki, emerai, enkului (Eului), o nkulie naatiu neijia (Ilgalatia 5: 19-21). Nikiponaa ilng’anayio le Nkiyang’et Sinyati anaa kulo: Enyorrata, eseriani, enchipai nagut, engiriata, enanai e nkoshoke, esupatisho, enkisiligata, emboron, enkibooroto e kewan (Ilgalatia 5: 22). Nikisipu sii lelo kererin pooki likiimakita te nampa 12 tena kisoma ooipirta tipat enkisoma ororei le Nkai. Maibung’a sii enajoki iyiook Embolunoto 2: 10, “*Taa oloisiligayu o tabaiki keeya naa kaaisho iyie enkopiya e nkitoo e nkishui.*”

## 14. Ekinyok oleng aisis Enkai te ndaa Olaitoriani kila Jumapili.

Keshal inkanisani kumok tenaipirta ina kias. Kake eton ebaiki pee kirerioo ate. Matadamu aajo ore tenemetii osalaba anaata eton kitii atua ng'ok ang. Ore pee metii osalaba tenebo empiunoto e Yesu anaata mikiata osiligi le nkishui nemeiting. Ore pee metii osalaba anaata mikiata enkipirta tena kop. Tenemetii osalaba anaata mikiyiolo enikinko pee king'iri teneponu intemat naagol oleng. Tenemetii osalaba anaata kiata enkuretisho anaake tenkaraki ng'ok ang. Amu, etejo Paulo te Roma 6: 23, *"Amu ore olekoisiayio loo ng'ok naa keeya."* Kake ore tenkaraki Yesu ekiindim aabung'a osiligi otejo ele kereri tesiadi ina kiroroto e dukuya, nejo, *"...kake ore enkishorunoto e Nkai e pesho naa enkishui oo ntarasi tiatua Kristo Yesu Olaitoriani lang."* Neliki iyiook 1 Ilkorintio ajo ore osalaba naa keipirta engolon Enkai ata tenaa kejo ilkulikae enkoitoi emodai ina oitoi osalaba (1 Ilkorintio 1: 20-25). Ore osalaba le Yesu naa keipirta enkishui ang taata amu etejo Luka 9: 23, *"Teneyieu oltung'ani naasuj nanu, inchoo emenaa kewan, nenap osalaba lenye inkolong'i pooki, naasuj."* Neaku, kenare nikidamu osalaba le Yesu anaake te nkishui ang. Nikimut pee kinap osalaba lang nikisuj Yesu anaake. Iyiolo sii ajo ore pee kinya endaa Olaitoriani nikilikioo enkeeya e Yesu, aa inchere kilikioo tipat enkeeya enye anaa enajo 1 Ilkorintio 11: 26. Neaku, kajo nanu kenare oleng tinikilikioo enkeeya e Yesu anaake. Neaku, matonyok pee kias ina kila Jumapili nikipal inkitolonyat pooki.

Kapik enkisoma naipirta osalaba tenebo endaa Olaitoriani abori tene, ata hoo tenatipika atua inkulie bukui.

Osalaba le Yesu o tipat te iyiook taata tenebo Endaa Olaitoriani - 1 Pet. 2: 24; Is. 53: 4-6; 2 Ilkor. 5: 21; Yhn. 1: 29; 1 Ilkor. 5: 7; 1 Pet. 2: 24; Iroma 5:9; 1 Pet. 1: 18; Tito 2: 14; Ilkol. 1: 13, 14; Ilgal. 3: 13.

Ore tosotua Musana ketii sii embae naipirta ina kordunoto naa keipirta Olayioni botor. Lasima pee elaku ninye tooropiyiani

(Enkikena 18: 14-16). Neliki sii iyiook Osotua Ng'ejuk ajo kiata enkordunoto tenkaraki osarge le Yesu (Efeso 1: 7).

Keeta iltung'ana enyamali amu keata ng'ok nemeata engolon pee eitajeu ate. Nejo ororei le Nkai, *"..etaasa pooki ng'ok neitong'oro enkiteo e Nkai"* (Iroma 3: 23). Nelo Paulo dukuya ajo, *"..neikenakini esupatisho te mpiris enye metaa enkishorunoto e pesho, te lakunoto natii atua Kristo Yesu, ilo oishorua Enkai metaa Olkipoket to sarge lenye, ong'amaroyu te nkoitoi e nkirukoto. Ore apa ena naa enaitodolu esipata e Nkai, amu ore teng'iriatu e Aisho enye, netogiroyie ninye ing'ok naatulusoitie; pee etum aaitadedeyie makewan neitusupat sii ilo oota enkirukoto tiatua Yesu"* (Iroma 3: 24-26). Ore tenkaraki ng'ok ang ekiata esile naa lasima pee etii elaata. Neata sii Enkai engoro tenkaraki ng'ok (Ir. 1: 18). Nemeidimayu pee kilak iyiook amu mikira bayarot. Neaku, eirriwaka Enkai iyiook Enkerai enye pee elaaki iyiook. Tisipu ajo Enkai naata engoro naa Enkai natalaa esile te Enkerai enye. Neaku, ore ina naa entoki enking'asia amu ebaiki naa ore likae tung'ani anaa olaiguenani aashu olkinki nemeas ina katukul. Ore pee kiata ng'ok te ninye naa lasima paa iyiook oolak ninye. Kake kiata esile te Nkai nelak Enkai esile. Neata Enkai engoro tenkaraki ng'ok neitiship sii kewon (Ing'orai sii 1 Yhn. 1: 7; 2: 2; 4: 1). Naa kesipa etaasa Enkai ina pesho kake kenare nikidamu aajo kainyioo eyieu ninye te iyiook. Keyieu nikiruk toltauja lang pooki nikirridu ng'ok ang neibatisai iyiook nikipuo dukuya aaisilig ninye anaake. Nikipuo dukuya te sinyatisho. Nikiomon Enkai anaake pee eibalakinyie iyiook ng'ok nikiata pee kipal (1 Pet. 3: 11; Ilheb. 10: 14; 12: 14; 1 Pet. 1: 15,16; Tito 1: 8; 2 Tim. 1: 9; 1 IIs. 4: 7; Iasat 2: 38; 1 Pet. 3: 21; Luka 13: 3; Ilgal. 3: 27; Tito 2: 14). Ore apa eton eitu elotu Yesu etogiroyie Enkai embata oong'ok (Iasat 17: 30) kake lasima pee elotu enkata elaata. Neaku, ore pee elotu erishata e Yesu nelak Enkai esile te Yesu. Nelak sii ninye apa ng'ok ang.

Etanapa Yesu ng'ok ang shumata osalaba (1 Pet. 2: 24; Is. 53: 4-6; 2 Ilkor. 5: 21; Yhn. 1: 29; 1 Ilkor. 5: 7; 1 Pet. 2: 24). Kitum esupatisho tenkaraki osarge lenye (Iroma 5:9). Etalakuaki iyiook to sarge lenye (1 Pet. 1: 18; Tito 2: 14; Ilkol. 1: 13, 14). Amu,

kiata esile tenkaraki ng'ok ang. Nesaru iyiook pee meitoki atii oldeket shumata iyiook (Ilgal. 3: 13).

## **Endaa Olaitoriani**

Kelimu kulo kererin naipirta endaa Olaitoriani – Matayo 26: 17-30; Marko 14: 12-26; Luka 22: 7-38; 1 Ilkor. 11: 17-34. Ore tenkata endaa Olaitoriani nikidamu Yesu osalaba lenye. Amu, etua ninye tenkaraki iyiook neibukoo osarge lenye tenkaraki iyiook. Nikiata empalakinoto oo ng'ok o nkordunoto tenkaraki ninye. Ore sii tina rishata kenare nikirridu ng'ok ang nikidamu sii tenaa ekiata enyamali tiatua iltauja lang tialo ilkulikai tung'ana.

Ketumo apa iloitenteng'eni le dukuya te seremata anaake Jumapili. Ore te rishata e Yesu, enkaji Enkai apa epuonu Ilyahudi aatumokino aaomon nejurru sii ilkigerot le Bibilia tenebo. Ore te nkaji naseremishoreki te Jerusalem, naa keitayu Ilyahudi ilasarri te nkolong e Jumamosi (Jumapili kiti). Kainyio etaasa ilairukok te rishata eseremare? Maisoma Iasat 2:42 pee kisipu enataasa apa ilairukok le dukuya tenetumo tenebo aaserem. Nejo, *“Neaku ketumo ninche anaake te nkiteng'enare oo lkipaareta, neshulare aaisiritore, neng'arie endaa, neshulare te nkomono.”* Ore pee ejo *“neng'arie endaa”* naa kegira aimaki endaa Olaitoriani. Kidol nchere eitamoo ilairukok le dukuya ate kuna baa: enkiteng'enare olkipaareta, te nchula, o te ng'arata Endaa o te nkomono sii.

Ore tena kisoma era intokitin imiet nayieu nikidamu naipirta Endaa Olaitoriani.

1. Etaasaki too njumapilini pooki,
2. Endamunoto olasar le Yesu,
3. Shakenisho e Yesu Kristo, (Elikioroto e Yesu Kristo)
4. Enchula tenebo Kristo o enoo Ikulikae airukok,
5. Erishata najurrie pooki ng'ae kewan.

Ore embae e dukuya nikidamu naipirta Endaa Olaitoriani naa nchere etiu anaa etaasaki njumapilini pooki. Naa kidol nchere entoki ena nataasa ilkipaareta nejing'aa te mbuku o Iasat 2:42. Eeta tipat oleng nchere etaasa ena too njumapilini pooki. Ore ilairukok le dukuya neitamoo ate Endaa Olaitoriani. Ore to sotua ng'ejuk, nikidol nchere ore ilairukok too nkulie katitin easishore kulo rorei oleng "engilata emukate" te neimaki Endaa Olaitoriani. Maisoma enataasa te nkata e seremata te Troas too lkigerot. Nejo Iasat 20:7, "*Ore te nkolong e dukuya e wiki kitoni tenebo aagil emukate...*" Ainyoo apa enkipirta olkipaareta te Troas pee eetuo aatumo tenebo te nkolong e dukuya e wiki? Eetuo ninche ilkipaareta aatumo te Troas pee enya Endaa Olaitoriani. Naa keibala nelimuno nchere ore pee eetuo ilkipaareta aatumo te nkolong e dukuya e wiki naa te nkaraki ena kipirta. **Ore Endaa Olaitoriani naa ninye entoki naisul te seremata enye.**

Eikatitin aja enare niking'amaa Endaa Olaitoriani? Kainyio oshi iasiasa Lmaasai nemedung'i eitu easi keigiligili ake? Aidim atadamu entoki niasiasa wikii pooki aashu ebaiki iasiasa anaake. Naa ore ina naa nchere pee eitadoikini nkishu oldiip pee menya ilmasher. Tenemireu inkishu oldiip too rishat naataanikino, naa, kemueyu nejing oltikana, olmilo neye. Neijia sii eikununo te iyiook. Kenare nikitumo anaake niking'amu Endaa Olaitoriani peyie etoni ltauja lang aa biyot nemeye enkishon ang kira lairukok.

**Ore entoki e dukuya** nidamu naa, etaasaki too njumapilini pooki tenaa ketusuja enataasaki te Troas anaake (Iasat 20: 7). Tenaa aikisuj enkitanyaanyukoto olkipaareta le Yesu Kristo, naa kenare niking'amaa Endaa Olaitoriani anaake Jumapili. Ore entoki naitaa ena tipat oleng naa tenkaraki etiaka Yesu iyiook pee kias pee kidamu ninye. Naa ainyioo pee meyieu ilairukok nedamu Yesu Jumapilini pooki?

Ore teina kewarie eton eitu eari Yesu, netum ninche osirua le Pasaka (osirua le tipat loo Lyahudi) tenebo ilkipaareta lenyena tomon aare. Ore pee eidipayu endaa neliki Yesu ninche enaipirta Endaa Olaitoriani. Kiindim aaisoma ororei lenye te mbuku e Luka 22:19,20, "*Nedumu emukate, ore pee eisho enkai enashe nebel neisho ninche ejo, 'Osesen lai ele oishoori te nkaraki ntai; entaas ena kidamumu nanu. Neiko neijia ennikompe eidipa*

endaa, ejo, *'Ore ena kikompe osotua ng'ejuk oitaiki intae osarge lai, oibukori te nkaraki intae.'*" Etiaka Yesu ilkipaareta pee enya Endaa Olaitoriani te ndamunoto enye. Etudumua Yesu emukate. Negil metaa mbelat neisho pooki kipaaret enkiti nejoki ninche enosa.

Kainyoo eutu emukate? Enare nikidamu osesen le Yesu enkata nikinya emukate. Enare nikidamu enataasa Yesu pee eishoru osesen lenye anaa olasar loo ng'ok ang. Pee kidamu eneikuna Yesu pee etum inkisilililot te nkaraki ng'ok ang. Etolimuo olaidetidetani Isaya enaipirta inkisilililot e Yesu too larin kumok oleng te siadi ninye eton eitu eini Yesu. Ekiisom kuna naatolimuo Isaya to lning'o Musana te Mbuku e Isaya 53:5, *"Kake etipikaki ninye olbae tenkaraki nkitarruorrot ang, eitamorrojoki ninye tenkaraki ntorrok ang. Shumata ninye etii enkitamioto naa ninye naishiunye iyiook, naa too oshot enyena eishiunyeki iyiook."* Etapalakaki iyiook ing'ok amu etalaa Yesu ina sile. Etaara ninye Isikarini loo Roman neari metua to musalaba.

Matadamu sii enalimu Matayo 26:27-28, *"Nedumu enkikompe, neisho Enkai enashe, neitarasaki ninche, nejoki, 'Entook pooki; amu osarge lai ele lo sotua oibukori te nkaraki oo lkumok te mpalakinoto oo ng'ok'"* Ore enkikompe naa pee eitadamu iyiook osarge oibukoyie te nkaraki iyiook. Ore osarge lenye naa ine netaremoki eimua pee eilili to Ichani. Etua Yesu tenkaraki osarge lenye sapuk oibukori to sesen. Kainyio eitadamu iyiook ina are olng'anayio loo sabibu? Ore enkiikompe naa pee kidamu iyiook osarge oibukoyie te nkaraki iyiook.

Ore apa pee ejo Yesu ore emukate naa osesen lenye naa ore ina are naa osarge lenye, naa empisha aashu enkitanyaanyukoto ina nikidol iyiook. Tenikidol Endaa Olaitoriani niking'amaa naa keitadamu iyiook osesen osarge le Yesu.

Eibukoyie Yesu osarge lenye te nkaraki ing'ok oo lkumok. Tenikiok ina natii enkikompe te Ndaa Olaitoriani naa kenare nikidamu nchere ore ilo sarge lenye oibukori te musalaba neyaua empalakinoto oo ng'ok ang. Eliki iyiook olkipaaret Petero te mbuku e 1 Petero 1:18, 19 entoki nataasa Yesu pee kinoto enjeunoto, *"Iyiololo aajo etalakuaki intae too rrekiei linyi lemeata tipat litujung'utuo too loo minyi, mme too ntokitin*

*narruoyo anaa enkosholai o sahabu kake to sarge ogol enkinyiang'a le Kristo, otiu anaa olkuoo lemeata entiyoto anaa entibili."*

Eitajewuoki iyiook teilo sarge ogol le Yesu. Etiaka iyiook Yesu pee kidamu ele asar lenye ogol te Ndaa Olaitoriani.

Aime enking'asia oleng tenaa keitadamuni iyiook Yesu o naitaasa iyiook kake etayiolo ninye nchere keidimayu pee erikino iyiook Yesu tenkaraki enchan ang naa ina pee etung'eikia iyiook ena oitoi nikidamunye ninye. Kiata irerei le Luka 22:19 likiasishore anaake te Ndaa Olaitoriani: *"Entaas ena te ndamunoto ai."* Ore ebaiki ina daa e dukuya Olaitoriani etadamutua ilasujak le Yesu enkeeya Olaitoriani too larin kumok oleng. Edamu ilairukok le nkop pooki enkeeya Olaitoriani. Entoki nanare neasi aigil anaake. Etejo Olaitoriani lang, *"Entaas ena kidamunyenye nanu."* Eitu eliki iyiook Olaitoriani lang intarakini aashu ewueji nikidamunye ninye.

Kainyio ae toki eare nanare nikidamu naipirta Endaa Olaitoriani? **Ore entoki eare** nanare nikidamu te Endaa Olaitoriani naa nchere endaa naitadamu iyiook olasar le Yesu. Etiaka iyiook Yesu pee kidamu ele asar lo sesen osarge te nkata nikinya emukate o enkata nikiok, enkikompe.

Kainyio eimaki endamunoto? Enkata ena nadamunyeiki Yesu nchere etua tenkaraki iyiook pee enap aashu pee eituku ing'ok ang.

Era ntokitin are nanare nikidamu naipirta Endaa Olaitoriani. Ore entoki e dukuya nanare nikidamu te Ndaa Olaitoriani naa nchere eatai apa too njumapilini pooki. Ore eniare naa nchere endamunoto olasar le Yesu.

**Ore ene uni** nanare nikidamu naa nchere elikioroto e Yesu Kristo Maisoma enatejo Olkipaaret Paulo eimaki Endaa Olaitoriani too Ilkorintio le dukuya 11:26, *"Amu ore enkata pooki ninosinosa ena mukate niokioko ena kikompe, naa enkeeya o Laitoriani ilikioo, o meeu."* Etejo Paulo aikilikioo enkeeya e Yesu enkata naba anaa eniking'amaa Endaa Olaitoriani. Kigira alikioo tipat olasar le Yesu. Etanapa ing'ok ang neiteleiki olmusalaba. Eimaki Petero kuna naipirta Yesu Kristo te mbuku e I Petero 2:24, *"Ninye makewan otanapa ing'ok ang*



*to sesen lenye te shumata olchani, pee kitum aatuata too ng'ok, neaku aikinchu too supati too lbaa lenyena eishiunyieki ntae."*

Tinikinya Endaa Olaitoriani naa Yesu Kristo kilikioo. Kilikito sii iltung'ana nchere ore olasar le Yesu naa keata tipat oleng te iyiook. Naa enkibalunoto sii ena nautu nchere kiyieue empalakinoto oo ng'ok natumieki ele asar le Yesu Kristo.

Ore Endaa Olaitoriani naa elikioroto enyorrata Enkai. Elimunoto enyorrata sapuk naata apa Yesu tenkaraki iyiook. Etua ninye te yieunoto tenkaraki iyiook pee kiindim aatang'amu imayianat enjeunoto (1 Yohana 4: 10-12).

Tinikinya Endaa Olaitoriani naa aikitum sii enchula tenebo Yesu Kristo o lkulikae airukok. Etejo olkipaaret to Lkorintio le dukuya 10:16, *"Amaa oshi kinchooyo enashe teina kikompe e mayianata, mme osarge le Kristo oshi ilo liking'ar? Naa amaa oshi kibel emukate, mme osesen le Kristo ilo liking'ar."* Etejo Paulo king'ar osarge tenebo osesen le Kristo enkata nikinya emukate o enkata nikiok enkare olng'anayio loo sabibu. Ore ena ng'arata tenebo Kristo etiu anaa ene nchula tenebo ninye.

**Ore embae e ong'uan** naipirta Endaa Olaitoriani naa, enchula tenebo Kristo tenebo lkulikae airukok. Tinikinya emukate nikiok enkikompe, naa aiking'arita osesen osarge le Yesu. Maisoma enajoki iyiook olkipaaret Paulo eimaki eng'arata ang e mukate olkulikai airukok te mbuku I Korintio 10:17, *"Ore amu nabo emukate, ore iyiook hoo nikira kumok nikira osesen obo, amu eng'amu ake oltung'ani embelati eina mukate nabo."* Etejo Paulo kira iyiook osesen obo te niking'ar embelati nabo emukate te Ndaa Olaitoriani. Tenedamu ilairukok olasar le Yesu eng'arita tenebo te nkata eseremata, naa ketum ninche enchula namelok olkulikai tenebo Yesu Kristo. Edamu ninche ilo asar ogol enkinyiang'a. Nelikioo sii tipat olasar lenye, neng'ar emukate o enkikompe tenebo. Eaku ilairukok osesen obo tenebo Yesu Kristo teneyanyit ninye tena oitoi e tipat oleng. Ore te Mesa Olaitoriani kira kumok kake kira sii osesen obo, amu kira nabo king'arita ina mukate nabo. Ore ena Mesa naa keitodolu naboisho natii atua enchula naa keitushul sii ilairukok te nchula nasipa. Enare nikias pooki tenebo. Enkitanapata ena naishorua Yesu Kristo aisho iyiook kira kanisa enye. Neaku kipuonu naa tenebo aas ena.

Ore anaa enatayiolo Yesu nchere etabaua erishata enye pee erore encholiek enye, neisho ninche Endaa Olaitoriani anaa endamunoto enye, naa osiligi sii nchere keshukunye. Enkoitoo sii ena nikitumie enchula o Laitoriani lang wikii pooki. Ore Endaa Olaitoriani naa enkias e kanisa nkatitin pooki. Ore ele sirua mme oloo ikipaareta ake aashu oloo lairukok loo Lyahudi, kake eatayieki apa too nkanisani olmeek lelo leme Lyahudi sii. Ore ileme lairukok (lelo leitu eibatisai) naa kegelari apa ninche te Ndaa Olaitoriani amu ilairukok ake eishoro pee eng'amu Endaa Olaitoriani.

Kaing'ai eitobirakaki Endaa Olaitoriani? Ilairukok pooki. Kiata enchula tenebo Olaitoriani lang Yesu Olaitobirani teina daa apa e dukuya teina kewarie eton eitu eari ninye neitoomonita ilairukok pooki metang'amai aashu eng'ar. **Ketii ninye tenebo Ilairukok egira aang'amaa Endaa Olaitoriani.**

Eti apa aikata olpayian loolmaasai. Oltung'ani supat naa olairukoni ninye, kake eitu edol dupoto naata enchula e Ndaa Olaitoriani. Neasayu entoki nabo te kanisa neitu eitiship ninye, nelamari. Nelam enkomono nelam sii Endaa Olaitoriani. Nedumunye olairukoni ng'en alo ainyikaki ninye neimakinyie ina nyamali. Ore etoni ti aji te mbata e nkima, neiteru oladuoo tung'ani ng'en aidapash kuna kuk nayupuyupito te ng'udi. Ore te nkiti kata neiteru enkima ailiilaa neaku penyo nelioo olang'at le nkima. Neing'or oladuoo tung'ani ng'en olchore lenye, nejoki, "Itisipua?" Nejo olchore, "Ee atisipua". Kiyiolo pooki aajo tenikindapash inkuk aitalam inkulie, naa keiliilaa enkima nedoiyio aye. Neitoki oladuoo tung'ani ng'en adumu ena duoo ng'udi enye, neitutum inkuk tenebo, nekut ayupuyupie. Kainyioo pasa nataase? Eitu eya erishata naado eitu eyupuyup anaa pee eitutumi. Eyupuyupo taa neitoki enkima agolu anaa duoo ake. Neitoki ake oladuoo tung'ani ng'en aing'or olchore, nejoki, "Itisipua?" Teneitokini aitutum nekuti ina kima naa keitoki ake aasisho tenebo aitayu enkima. Tenikigelaa ate aitalam Endaa Olaitoriani te nchula naa aikiminie enkishui nikiata tiatua Yesu Kristo. Kenare nikiponu aashukunye tenebo nikincho Kristo meitopuaa enkima ang pee etum ayupuyupo.

Metii entoki naidim atooro iyiook te nchula nikitum te Misa Olaitoriani. Eiliilaa enkiyupuyup. Ore eneing'uaa engolon

oltauja lang naa Yesu Kristo. Keitodolu iltauja lang Yesu Kristo te nikinyikaki ninye. Ore sii tinikiaku nabo te nchula o Ikuikae airukok te Misa Olaitoriani naa keiyupuyup enkima ang.

**Ore entoki e imiet** nikidamu naa, erishata ena najurrie pooki ng'ae kewan. Isoma enatejo Paulo eimaki oltung'ani onya Endaa Olaitoriani te mbuku I Lkorintio 11:28-29, "*Keishiakino nejur ake oltung'ani kewan eton eitu enya ina mukate neokie ina kikompe. Amu te nanya oltung'ani neok neitu eyiolou tipat e ilo sesen, kewan etudung'oko enkiguena te ina kinosata o te ina okoto.*" Etejo Paulo kenare nejur oltung'ani kewan eton eitu enya Endaa Olaitoriani. Te nemedamu oltung'ani osesen otigile tenebo osarge le Yesu oibukori tenkaraki iyiook einosita Endaa Olaitoriani, naa keinosita te nkoitoi nemeishiakino.

Megira adamu olasar le Yesu. Megira anya te nkoitoi nasipa. Kigira aang'amaa Endaa Olaitoriani te nkoitoi nemeishiakino te nimikidamu olasar le Yesu Kristo. Tinikidamu olasar le Yesu Kristo naa aikijur enkishui ang nikidamu sii ing'ok ang. Kining sii emion tinikiyiou te sipata aajo ainyoo pee etanang'a iyiook. Naa aikishukoki ninye enashe te nyorrata natonyorra iyiook o metua tenkaraki iyiook. Kenare nikimbalunye eng'oki nikiomon ninye pee epaliki iyiook neretu sii iyiook pee kipal ing'ok. Erishata ang ena nanare nikijurrie ate te rishata olasar le Yesu Kristo.

Kejo ilkuikae inchere tenejo "ilo sesen" naa kegira aimaki osesen le Yesu aa taa kanisa kewon aashu matejo ilairukok. Neaku ore pee medamu oltung'ani ilkuikae airukok, matejo tenaa keeta enaatakinore likae airukoni, naa kegira ninye adung'oki kewon enkiguena.

Kitayioloto intokitin imiet nanare nikidamu naipirta Endaa Olaitoriani:

1. Etaasaki njumapilini pooki
2. Endamunoto o lasar le Yesu
3. Elikioroto e Yesu Kristo
4. Enchula tenebo Kristo olkuikai airukok
5. Erishata najurrie pooki ng'ae kewan

Etung'uayie Olaitoriani iloiteng'eni lenyena nerrinyo alo enetii Menye te shumata. Kake ore elototo enye neme enkiting'oto osiligi lang. Ore Endaa Olaitoriani mme olmusalaba ake eitadamu iyiook, kake eitodolu sii elotunoto eare e Yesu. Neme sii elikioroto ake nalimu nchere etua Yesu te nkaraki oo ng'ok ang, kake eibala sii ena sipata nchere eitoki Olaitoriani Yesu ashukunye. Kiata kulo rorei le kanisa Olkorintio oigeroko Paulo ninche: *"Amu ore enkata pooki ninosinosa ena mukate niokioko ena kikompe, naa enkeeya o Laitoriani ilikioo, o meeu."* (1 Ilkorintio 11:26) "O meeu." Ore Endaa Olaitoriani naa keliki iyiook nchere, keitoki ake ashukunye.<sup>13</sup>

## ILARIKOK LE KANISA:

### 1. Ekirikoo kanisa tenyorrata, olong'ur, emborron o teng'eno naing'uaa Enkai.

Keliki iyiook Paulo enkoitoi enyorrata to Lkorintio le dukuya 13: 1-13. Matisipu kuna pukunot oltung'ani oata enyorrata amu etejo ninye pesho inkulie siaitin pooki tinimikiata enyorrata. Ata enkirukoto etejo pesho sii enkirukoto ang tinimikiata enyorrata. Matadamu nampa tomon tiatua nena baa naaipirta ilairukok pooki amu keipirta olong'ur. Kake eitu kiimaki 2 Ilkorintio 1: 3-7 amu keimaki Paulo inchere ekitum olong'ur te Papa lang oti keper *"pee kindim sii iyiook aailejileja ilkulikae ooata osina teina kilejilej nailejilejie iyiook Enkai."* Neiteng'en sii iyiook Matayo 18: 21-35 enaipirta olong'ur. Amu, etapalaka Enkai iyiook imbaa kumok oleng neaku kenare nikiata sii iyiook olong'ur too Ilkulikae. Keliki iyiook Matayo 18: 1-6 enaipirta emborron. Neimaki sii Marko 10: 35-45 emborron amu keeta ilkipaareta le Yesu olwuasa neyieu ilorikan ooata tipat te nkitoria e Yesu. Kake era Yesu enkitanyaanyukoto sidai amu ata hoo tenera ninye Enkerai e Nkai eewuo pee eisiai ilkulikae (Marko 10: 45). Nejo sii Yakobo 4: 10, *"Entadou ate te dukuya Olaitoriani, pee eilepie ninye intae."* Kejo Ndung'eta e Rashe 23: 23 te naipirta eng'eno, *"Inyang'u esipata nimimir ake, inyang'u eng'eno nagut, o enkiteng'enare; o ening'unoto."* Keliki iyiook Yakobo enaipirta ng'eno naata tipat oleng te matua 3: 13-18. Ore eng'eno sidai naa keipirta emborron o olkuaak sidai amu kejo, *"Kaing'ae te intae olong'en neeta endamunoto? Nchoo eitoduaya te nkishon enye sidai o to lkuaak lenye inkiaasin enyena te mborron e ng'eno."* Ore pee kijo kegol oleng pee kitum eng'eno naijo ina naa kenare nikiomon Enkai pee eisho iyiook anaa enalimu Yakobo 1: 5. Ekiomon Enkai amu ninye naata eng'eno naa keisho iyiook "te leng'on." Neliki iyiook 1 Ilkorintio 1: 18-25 enaipirta eng'eno Enkai. Kapaasha eng'eno Enkai o eng'eno oltung'ani (1 Ilkorintio 3: 18-23). Nejo Ilkolosai 2: 3 enaipirta Yesu, *"...olaa tiatua ninye*

*eisudoro masaa pooki sidain e yioulounoto o eng'eno."* Neaku ketii ina ng'eno atua Yesu kewan. Metaa kenare nikiyioulou Yesu tenguton pee kitum sii iyiook eng'eno. Eton etii ilkererin kumok oopirta eng'eno kake keibala ajo kenare nikisilig Enkai nikiomon anaake pee kitum eng'eno naing'uaa ninye. Medupa eng'eno oltung'ani. Ore pee ejo oltung'ani keeta eng'eno naa kajo kegira aimaki eng'eno enye makewan neme eng'eno naing'uaa Enkai. Amu, ore eng'eno naing'uaa Enkai naa keeta emborron. Matadamu enajo Olaikooni 9: 17-18, *"Eikash irorei loo ltung'ana ng'eni ooning'i te mborron alang imbuakunot oloitoreisho tiatua ilmoda. Eikash eng'eno nagut alang imasaa o larrabal, kake ore olaing'okoni obo nemut intokitin sidain kumok."*

Ore kigira aarikoo kanisa naa keeta tipat oleng pee kiomon Enkai eng'eno naing'uaa ninye. Amu, ketii imbaa naagol oleng ewalata. Matadamu aajo ekishal oleng kake ore pee kisilig Enkai naa keretu iyiook anaa enatejo Paulo to Lkorintio li are 12: 7-10; 13: 4).

## **2. Ekiomon oleng nikitumo sii aaimaki imbaa e kanisa pee kitum induaat sidain naaipirta embulunoto e kanisa o enkoitoi nikiasishore nikiramat sii intokitin pooki e kanisa, tenkitanyaanyukoto, enkaji e kanisa o enkiwanja e kanisa.**

Kindipa aaimaki enkomono kake kayieu najo ai bae nabo naa inchere ore inkulie katitin kegolou imbaa metaa kegolou pee kitum ewalata tenaipirta enyamali naje. Kake keyiolo Enkai ewalata neaku ina pee enare nikiomon Enkai inkatitin pooki pee eretu iyiook manoto ewalata. Matadamu Yeremia 17: 9 -10 pee ejo, *"Olalejani oltau alang ntokitin pooki, naa torrongo oleng. Kaing'ae oidim atayiolo ninye? Kajur nanu Olaitoriani ndamunot natem oltau...."* Neaku alang tinikisilig iltauja lang anaata kiomon Enkai pee einining iltauja lang neretu iyiook pee mikiwaliki iltung'ana tengoro naisudoro tiatua iltauja lang nikiyioulou te sipata enikinko tinikintubulu iltung'ana. Nejoki sii Yesu Ifarisayo, *"Ntae*

*lelo ooitaakuno irara asipak too ltung'ana, kake eyiolo Enkai iltauja linyi; amu ore ina nailepie iltung'ana naa olminong too nkonyek Enkai*" (Luka 16: 15). Neaku, keyiolo Enkai iltauja lang tenguton. Neaku, keikash tiniking'as aaisho Enkai iltauja lang pee eituku ninche eton eitu kiimaki embulunoto e kanisa nikiwaliki sii te nyamali naje. Eisidai tinikiomon pooki ena omono, "*Tujurroki nanu, iyie Enkai, niyioulou oltau lai! Ineneng'aki nanu niyioulou ndamunot aainei! Nidol tenaa ketii enkoittoi torrongo atua nanu, nikirikoo nanu te nkoittoi ntarasi*" (Olkerempe 139: 23-24). Ore pee kimbakinyie Enkai imbaa pooki tiatua iltauja lang naa keretu iyiook pee kitum ewang'an naipirta ate o tenaipirta enyamali nikigira aarare tenebo enkoittoi sidai pee kiretu kanisa.

Ore ilkulikae kererin sidain oleng naa Ilfilipi 4: 5-7 pee ejo, "*Nchoo iltung'ana pooki metayioito emborron inyi. Etataana Olaitoriani. Emintanyamal ate ti ae toki, kake ore te pooki toki te nkomono o te nkishoroto e nashe. Enchoo Enkai metayioilo inkolati inyi. Neaku eseriani e Enkai nalang eyiolounoto pooki narrip iltauja linyi o ndamunot inyi tiatua Kristo Yesu.*" Ore pee kias ina naa ekitum eseriani tiatua iltauja lang pee kiwaliki iltung'ana aaitobiraki nikitum sii induaat e kanisa sidain. Keikash ina alang tinikinteleiki ilkulikae tung'ana ilolan tiatua iltauja lang. Nikiomon sii tenebo pee kitum pooki iltauja sidain nikitum ewalata naaing'uaa Enkai naaipirta embulunoto e kanisa.

Nenare nikitumo anaake aaimaki embulunoto e kanisa. Naa kenare neiturrur olupastai iltung'ana pee eimaki imbaa. Amu irara intae ilchekuti le kanisa. Neitanapa Paulo iyiook to Iasat 20: 28 inchere, "*Entagolie ate maate o ina luaata pooki naitaa intae Enkiyang'et Sinyati ilaing'urak lenye, aaitoti esirit e Nkai nainyiang'aka ninye kewan to sarge lenye.*" Ore pee mikitumo aaimaki embulunoto e kanisa naa mikira ilchekuti sidain. Kenare nikidamu oleng ajo kaji kinko pee kintagol iltung'ana le kanisa o kaji sii kinko pee kintoti ninche te ndaa sidai Olaitoriani. Ore inkulie katitin ketiu inkanisani ang anaa ina anisa nati Korintio, amu etejo Paulo enaipirta ninche, "*Ore etiu neijia, lalashera*

*laainei, maidim apa airorie intae anaa iltung'ana ootubulutua tiatua Yesu kake anaa iltung'anak ake, anaa nkera kutiti tiatua Kristo. Kule aitotiye intae, mme endaa nagol, amu mindimidimi apa aainosa ina neton doi ake mindimidimi...*" (1 Ilkorintio 3: 1-2). Neaku, ore tenkaraki ina kenare nikitumo anaake aaimaki embulunoto e kanisa. Amu, ore pee mikiimaki imbaa kelelek pee etiu kanisa anaa ina anisa natii apa Laodikea. Nejo Embolunoto 3: 15-16 naipirta ina kanisa, "*Ayiolo nkiaasin inono. Mirobi iyie nimirowua, oi imut airopiju aashu irowuaju. Neaku ore amu imololong, mirobi nimirowua, ekaanotu aitayu te nkutuk ai.*"

Kenare nikiimaki sii intokitin pooki e kanisa aa enkaji e kanisa o enkiwanja e kanisa. Emiramamat oshi enkang ino? Ore pee erruoyo entoki nintobir. Ore pee ijo keishiakino tiniponaa entoki naje, niponaa. Neaku, ore enkaji e kanisa naa keeta tipat oleng alang enkang ino. Kake eton meeta ilairukok kumok ina damunoto. Amu, kerruoyo entoki naje te nkaji e kanisa nemeitobir. Nerruoyo imbaoi nemepik oranki. Nebulu inkujit nemedung. Meshilaa amu kejo mme esiai ai, aashu keeta inkulie kitolonyat kumok. Neaku, kenare nikirridu nikiramamat enkaji tenebo enkiwanja e kanisa anaa inkang'itie ang. Matadamu enajo embuku e Hagai 1: 9, "*Isiligutua intae nkumok, naa ng'ura, etaa kuti; ore pee iyauu intae ang, nakutaa nanu. Ainyo? Olaitorani loo lororani ojo. Tenkaraki ena aji ai nairragita tenkidaaroto amijoonu, intanyamaluoluo maate oltung'ani ake te nkaji enye makewan.*" Kegira aimaki ele kereri enkaji Enkai apa kake keeta tipat sii te iyiook taata, aa taa kenare nikidamu sii enkaji Enkai aaramat alang tinikiramamat inkajijik ang ake. Kenare nikiata sii induaat sapukin naaipirta enkiwanja e kanisa pee mikipong'ori nikinosu te siadi.



### **3. Ekigelu inkomitiini naaipanka imbaa e kanisa netum induaat o nkipankat. Nepuo dukuya aas te nyuaata. Ore pee meas nikirorie ninche.**

Keibung'akino o ina bae nampa are. Neaku, enkoitoi ina nikisuj nikitejo te mbae e are. Nikigelu inkomitiini naitasheiki imbaa e kanisa pee kisipu aajo etaasaki. Amu, ore pee metii kelo dukuya kanisa meeta enkipankata nemeasi imbaa naata tipat oleng. Pee kitum engolon nikipuoyie dukuya matadamu enatejo Paulo to Lfilipi 2: 12-13, “*..entabai enjeunoto inyi te nkuretisho o te nkikirikirata. Amu Enkai naasisho tiatua intae, te pokira are, te yieunoto o te asata inyi tenkaraki murruna enye sidai.*” Neaku, Enkai naisho iyiook enkidimata pee kipuo dukuya aas imbaa pooki. Ore pee metii ninye meeta enikias. Neikok sii iyiook Ilhebrania 6: 12 pee mikidukunya, nejo, “*... pee miakuku yietuti, kake iloo duaaya lelo laa te nkirukoto enye o teng'iriata etujung'o nkisiligat.*” Kegira aimaki enkishui ang pooki tiatua Yesu kake keipirta isiaitin nikias amu kelelek pee kinauru nimikias esiai Olaitoriani te nyuaata. Matadamu sii enatejo Paulo to Lfilipi 4: 13, “*Aidim ataasa mbaa pooki tiatua ilo laa ninye laaidimie.*” Neaku, ore pee kisilig Enkai niking'iri ekiindim aataas imbaa kumok enking'asia. Matadamu enajo oshi Ilmaasai pee ejo, “*Meishaa elukunya nabo eng'eno.*” Neitoki ajo, “Menyaanyuk nyuaat o nkidimat.” Keikash nyuaat amu ore pee miata enyuaata mikiretu enkidimata ino. Maibung'a enajo Iroma 12: 11, “*Emincho enkisosion inyi edukunya, entaa lkirowua te Nkiyang'et, esiyia Olaitoriani.*” Ore enkoitoi nikiasishore pee mikidukunya naa tinikimbung aakurraki enkomono pee kitum engolon. Ore pee kisipu ina rishata pee eibung'i Yesu te Getsemane nikiyiolou aajo keeta enkomon engolon oleng amu ore pee eomon netum enkitieunoto oleng pee ejoki lelo tung'ana ooyieu neibung ninye, “*Ai ng'ae ing'oruru*” (Yohana 18: 4). Neing'asia lelo tung'ana oleng, nejo olkereri le ile enaipirta ninche, “*...nerrinyo siadi nebatata te nkop*” (Yohana 18: 6). Neaku, ore pee kiomon oleng

tenguton o te sipata naa keidimayu pee kitum engolon oleng nikiasie esiai Olaitoriani. Maibung'a sii enajoki iyiook Paulo to Lkolosai 3: 23-24 pee ejo, *“Ore esiaai inyi pooki entaas too ltauja, anaa Olaitoriani iasakiki neme iltung'ana, iyiololo aajo to Laitoriani itumutumu enjung'ore anaa olekoisiaayio linyi; Olaitoriani Kristo isiaaitata.”*

Nikitejo, **“Ore pee meas nikirorie ninche.”** Ore inkatitin kumok naa keshalu ilarikok le kanisa nemeirorie iltung'ana tenemeas esiai enye. Keure aashu kerikino aashu keiteleiki ilkulikae entioto. Kake kenare neeta ilarikok enkitieunoto pee eirorie iltung'ana temberron aitagol oleng pee epuo dukuya aas isiaitin enye naatejo ninche keas. Neitanap Paulo Timoteo inchere, *“Inguanaki intijing'ai, nisikong, ninkok niaaku otemesi (niaku oloota eng'iriata sapuk) te ng'iriata o te nkiteng'enare (2 Timoteo 4: 2).”* Kake kenare nikias nena pooki te mberron anaa enajo Ifilipi 2: 1-11 amu keeta Yesu emberron oleng pee elotu ena kop nelu osalaba. Ore pee kidol aajo meas ninche esiai enye katukul niking'oru ilkulikae ooas. Mikiyiolo te sipata kake ebaiki etashala apa Timoteo, amu eitanapa Paulo ninye aiko neijia, *“Tenkaraki ina peyie aaitadamu inchere nyaaki ntopiu enkishoroto e Enkai natii atua iyie ninoto apa tenkiteleikinoto oo nkaik aainei. Amu eitu eisho iyiook Enkai oltau le nkuretisho kake oltau le ngolon o le nyorrata o le nkibooroto e kewan” (2 Timoteo 1: 6-7).* Neaku, keibala teilo kereri inchere keetai esiai nikias iyiook pee kintoki aatum engolon nikiasie esiai Olaitoriani, amu eitanapa Timoteo inchere, *“nyaaki ntopiu.”* Naa kajo nanu enkomono naret iyiook oleng alang inkulie baa pooki.

#### **4. Ekiimbung enkoitoi e sinyatisho aakurraki pee kiaku enkitanyaanyukoto too lkulikae.**

Keibung'akino ina bae embae e dukuya nikitejo naipirta ilarikok inchere, *“Ekirikoo kanisa tenyorrata, olng'ur, emberron o teng'eno naing'uaa Enkai.”* Kake kenare nikijo inkulie baa naaipirta

esinyatisho. Matisipu 1 Timoteo 4: 11-16, *“Intanapisho ninteng’enishore kuna baa. Mincho oltung’ani hoo obo kimenu tenkaraki kitisho ino, kake intoduaa ilairukok enkitanyaanyukoto tiatua enkiroroto o to lkuaak, tiatua enyorrata, tiatua enkirukoto, o tiatua esinyatisho. Tasheikinoyu enkisomata oo lkigerot te dukuya iltung’ana o elikioroto, o enkiteng’enare o metaba anaa nalotu...Intamoo kewan kuna siaaitin tasheikinore ninche, pee edol pooki ng’ae eninkonari te nyuaata. Toduaa kewan o nena kiteng’enat inono, imbung’a, amu teniaas ina nintajeu kewan o lelo likinining.”* Idolita ajo keeta tipat oleng pee esuj olarikoni enkoitoidi sidai pee eaku ninye enkitanyaanyukoto too lkulikae. Ore pee eitanap iltung’ana pee esuj enkoitoidi e sinyatisho kake mesuj ninye naa kejo ninche osunkuroi ninye. Ebaiki neeta empijan sapuk oleng kake mesidai enkiroroto enye. Metaa kegol pee ening iltung’ana ninye amu meirorie ninche oshi temberron o tenkanyit. Kenare olarikoni nejur kewan tenguton nejur sii enkiteng’enare enye. Amu, kelelek pee epong’ori netum olwuasa nesuj sii enkiteng’enare oo lkulikae alang ororei le Nkai. Idolita sii ajo etejo, *“Intamoo kewan kuna siaaitin.”* Neaku, melelek kuna baa naa ina pee enare neitamok oltung’ani kewan nena pooki. Nenare nenyok oleng tenkomono o te kisoma nagut pee eaku enkitanyaanyukoto too lkulikae.

Keliki sii iyiook Paulo te 1 Timoteo 3: 1-13 enaipirta olkuak sidai onare neeta olaitasheikinoni le sirit. Nejo eishiaakino nemeeta eleyiata. Naa kesipa kepong’ori pooki ng’ae kake eishiaakino nera ninye oltung’ani onyokita oleng pee esuj enkoitoidi e sinyatisho. Nejo sii enare neeta sii errepet *“te lelo ootii boo pee medoiki ake atua esulare o rreshet le shetani”* (1 Tim. 3: 7). Kesipa ketii iltung’ana le lelo ootii boo lemenyor oltung’ani osujita Yesu kake ore ilkumok oleng naa kenyor oltung’ani supat laa keyanyit ilkulikae. Naa kebor sii nemeeta enchankar. Naa ore pee edol ninye nejo eisidai ina oitoidi e Yesu. Tisipu sii Tito 1: 5-9. Mepaashare oleng kuna baa natii Timoteo. Nejo Tito 1:8 naipirta olarikoni, *“Kake aminin, olonyor esupatisho, oloata tonata,*

*oloitoriori, sinyati neibooyo kewan.*” Ore pee esuj nena baa naa keitship Enkai neaku enkitanyaanyukoto sidai too lkulikae. Kepal sii olarikoni kuna baa torrok nalimu Ilgalatia 5: 19-21 nenyok pee eiu ilng'anayio le Nkiyang'et anaa enalimu Ilgalatia 5: 22-26. Tisipu sii Ilkolosai 3: 1-17 amu keliki iyiook naaipirta enkishui sidai tiatua Yesu. Ore enkoitoi naretu iyiook pee kisuj enkoitoi e sinyatisho naa enkomono tenebo ororei le Nkai. Etejo Daudi to Lkerempe le Nkai 119: 11, *“Atushuma nanu ororei lino to ltau lai, pee maas ake eng'oki tialo iyie.”* Eisidai sii tinikimbalunyie ng'ok ang anaa enatejo Yakobo 5: 16, *“Metaa, embalakinoto ng'ok inyimaate, niomonokinono, pee eishiunyeiki intae. Amu eeta enkomono o ltung'ani supat enkidimata sapuk.”* Kake king'oru oltung'ani oisiligayu oleng pee meaku imbaa ang imbaa olmarenke. Matoomon sii ena omono anaake, *“Tujurroki nanu, iyie Enkai, niyiolou oltau lai! Ineneng'aki nanu niyiolou ndamunoto aainei Nidol tenaa ketii enkoitoi torrano atua nanu, nikirikoo nanu te nkoitoi ntarasi”* (Olkerempe 139: 23-24).

Ore ai bae nabo naipirta ina oitoi esinyatisho naa inchere kenare nikincho metorikoi iyiook Enkiyang'et Sinyati anaa enalimu Iroma 8: 1-17. Maibung'a enatejo Ilgalatia 5: 25 pee ejo, *“Tenetaa Enkiyang'et taata kinchuyie iyiook, ematurubare naa erikore e Nkiyang'et.”* Neaku, mikimurut Enkiyang'et, nimikisiadu, kake ekiriamariyie Enkiyang'et. Nikiuloki enkomono oleng pee eutaki Enkai iyiook tenaa ekatii dukuya, aashu siadi aashu tenaa ekigira aairiamariyie Enkiyang'et.

## **5. Ekinteng'en ilairukok likitegelutua pee eaku ilarikok neitoki ninche aaiteng'en ilkulikai anaa enajo 2 Timoteo 2: 2.**

Kejoki Paulo Timoteo tele kereri, *“Ore ina nitoning'o te nanu te dukuya lchakenini kumok, intarasaki lelo tung'ana ooisiligayu ooidim sii ninche aaiteng'en ilkulikae.”* Kindipa aaimaki ele kereri kake kayieu naponaa imbaa tene. Keeta ele kereri tipat oleng te kanisa, amu ore inkulie katitin kinteng'en iltung'ana kake

meisiligayu ninche nemeiteng'en ilkulikae. Metaa keiting enkiteng'enare. Kake ore pee kisipu iltung'ana niking'oru iltung'ana ooisiligayu nikinteng'en ninche nikintoki aaiteng'en ninche eneiko pee eiteng'en ilkulikae, naa kaata osiligi sapuk oleng ajo kebul kanisa. Neaku, maimaki irubat eilo kereri. Nejo, ***“Ore ina nitoning'o te nanu te dukuya lchakenini kumok...”*** Ore enedukuya, kenare niking'as aasipu enatejo ororei le Nkai. Amu, etolimuo Paulo ororei le Nkai. Keipirta sii ina bae enkiteng'enare oolkipaareta le Yesu anaa enajo Iasat 2: 42 pee ejo, *“Neaku ketumo ninche anaake tenkiteng'enare oo lkipaareta, neshulare aaisiritore ....”* Netii sii ilchakenini kumok ootoning'utuo nena baa. Neaku, meishiakino tinikisuj indamunot ang ake aashu indamunot ng'ejuko naagilunore ororei le Nkai. Tenkitanyaanyukoto, ebaiki nejo oltung'ani kayieu nasuj Yesu kake mayieu nairuk ajo etopiuo too lootuata. Amu, ketii inkanisani naajo neijia kuna olong'i. Kake meidimayu ina oitoi katukul amu ore empiunoto naa olkitamanyunoto le nkirukoto oo lairukok anaa enajo Paulo to Lkorintio le dukuya ematua 15. Nejo Paulo tenaa eitu epiu Yesu naa pesho enkirukoto ang. Nejo likae kayieu naomonoki oltung'ani oyieu neiruk Yesu najoki sii ina kata ake itajeuo. Kake ore enyamali meitanap iyiook ororei le Nkai pee kias ina. Eitanapa iyiook ororei le Nkai pee kinteng'en iltung'ana pee eiruk, neirridu, neibalunyie enkirukoto enye neibatisai. Ore en kikoo ai naipirta ina bae naa inchere kenare nikipal ina omono narikito ina bae. Etejo oltung'ani obo mikipal ina omono amu eisidai. Kake amaa ainyioo pee mikipal enkoitoi nikigira aasishore enkomono naje tenaa kegira ina omon aitapong'oo iyiook? Keikash tinikintoomon iltung'ana pee enyorraa enkiteng'enare naipirta enkoitoi enjeunoto pee kinteng'en ninche ti ai rishata tenguton alang tinikiomonoki ninche ina kata ake nikijo etajeuo eton eitu eirridu, neitu eibalunyie enkirukoto enye, neitu sii eibatisai.

Nejo sii likae kayieu nasuj Yesu kake kayieu nalo dukuya asuj olkuak lang. Kake ore enyamali naa inchere ketii ilkuaki oogilunore ororei le Nkai. Netii sii ilkuaki sidain kake keyieu

nikiata enjurrunoto sapuk oleng pee mikipong'ori. Matusuj enajo Ile Efeso 5: 15, "*Eng'ura entabaraki eninkunariri elototo, mme anaa ltung'ana oomoda kake anaa lng'eni, entaasishore enkata, amu torrok enkolong'i.*"

Neitoki ajo Paulo, "***...intarasaki lelo tung'ana ooisiligayu.***" Ore enedukuya kenare nikinteng'en pooki ng'ae oyieu enkiteng'-enare amu etejo ororei le Nkai, "*Meimutie Olaitoriani eitu eitabaya enkisiligata enye anaa enadamu kulikae enkimutioto, kake keng'iri te intae amu meyieu obo oimin, kake pee ebaiki pooki ng'ae enkirridunoto*" (2 Petero 3: 9). Nejo sii Marko 16: 15, "*Enchom enkop pooki entoliki iltung'ana pooki ele rorei supat.*" Nejo sii Matayo 28: 19, 20, "*Enchom entaa loreren pooki ilooiteng'eni laainei, nimbatisasa te nkarna e Papa o ene Nkerai o ene Nkiyang'et Sinyati, ninteng'ening'ene meibung'a inaitanapa intae pooki ...*" Neaku, keibala oleng ina bae, kake eyieu nikisipu sii iltung'ana. Menyaanyuk iltung'ana pooki. Metaa kenare nikigelu sii iltung'ana likidolita aajo keisiligayu naa keidim sii aaiteng'ena ilkulikae.

Neitoki ajo Paulo, "***...ooidim sii ninche aaiteng'en ilkulikae.***" Nikinteng'en ninche eneiko pee eiteng'en ilkulikae tung'ana. Amu, keidimayu pee eaku oltung'ani olairukoni netum enkiteng'-enare oleng kake eton meyiolo eneiko teneiteng'en ilkulikae. Neaku, matusuj kuna roruat. Ing'as aaiteng'en ninye tenguton. Nintoki arik ninye enkiteng'enare pee kidol ninye iyie igira aaiteng'en ilkulikae. Ore pee indip ina inchoo ninye erishata pee kinteng'en iyie ina kisoma metii ilkulikae. Nisipu enkiteng'enare enye ninerioo tinidol imbaa naatapong'oriye ninye aashu niponaa imbaa naatorikine ninye. Ore pee idol ajo eterretene niriamariye ninye alo aaiteng'en likae tung'ani aashu likae marei. Metaa inchoo ninye erishata pee eiteng'en ninche kake itii tenebo ninye. Ore pee erikino embae naje aashu kepong'ori oleng tembae naje niretu ninye. Tenindip ina rishata, niimaki ina kiteng'enare enye ti ai rishata pee intagol ninye nirere imbaa naang'or aashu iwuejitin neetapong'oriye te nkisoma enye. Niriamariye ninye o metaba

anaa nidol ajo keidim aiteng'ena ilkulikae openy. Kake kenare nedamu sii ninye eneiko pee erik likae airukoni pee eiteng'en sii ninye eneiko pee eiteng'en ilkulikae. Nesuj ninye nena roruat pooki. Nelo ina kipankata dukuya aiko neijia o metaba anaa neyiolou iltung'ana kumok oleng te kanisa eneiko pee eiteng'en ilkulikae.

**6. Ekinteng'en ilairukok le kanisa metayioloitoo inkishoorot enye nikinkok pee egelu isiaitin naairirikino inkishoorot enye. Niking'oru sii enkoitoo pee etum enkiteng'enare nairirikino inkishoorot enye metaasa isiaitin enye aitobiraki.**

Kiimakita ina bae te nampa 11 tiatua nena baa naaipirta ilairukok pooki. Kake kiponaa inkulie baa tene. Kayieu nikiuloki **Efeso 4: 11-14** pee kitum ewalata naipirta ina bae. Naa kejo, “*Ore nena kishorunot enyena naa ketejo pee eaku kulikae ilkipaareta, neaku kulikae iloibonok le Nkai, neaku kulikae ilalikiorok, neaku kulikae ilairritak o laiteng'enak, peyie **erreteni lelo sinyat**, tenkaraki ina siaai e ramatare, ene nchetata o sesen le Kristo, o metabaiki pooki naboisho naimu enkirukoto o eyiolounoto eilo Inoti le Nkai, nikiaku iltung'ana ootubulutua aamitunye, aabaiki entemet e mbotoro nalulung'a e Kristo, pee mikintoki aaku nkera, naanang'ari idie o idie to lkutati ake pooki le nkiteng'enare, o losek loo ltung'ana tiatua esunkureisho o losekin le lejare.*” Ore pee eimaki “nena kishorunot enyena” te dukuya ele kererin naa kegira aaimaki Yesu kewan amu ninye oishoo iltung'ana inkishoorot. Neaku, matadamu inkatitin pooki pee kishukoki Yesu enashe nikincho ninye enkisisa pooki te naipirta inkishoorot ang. Keibala tiatua kulo kererin inchere ore esiai oo larikok le kanisa naa pee “**erreteni lelo sinyat**.” Ore enkoitoo nabo nikiasishore pee kias ina naa pee kiretu ilairukok metayioloitoo inkishoorot enye. Kajo eisidai oleng tinikirorie ninche tenguton aaikilikuan enayieu ninche, impukunot enye, o indamunot enye pee easishore inkishoorot enye. Nikiomon sii Enkai tenebo ninche pee eibalayu

te ninche o too larikok le kanisa ajo keishiakino teneas esiai naje te kanisa. Ore pee eyieu oltung'ani neas esiai naje kenare nikisipu oleng ajo keeta ng'eno pee eas ina siai aitobiraki. Tenea keibala ajo keyieu enkiteng'enare, nikiteng'en ninye aashu king'oru enkoitoi pee elo atum enkiteng'enare naipirta ina siai. Ebaiki netii ilairukok kumok ootii inkanisani ang lemegira aasishore inkishoorot enye. Neaku, matonyok pee kiretu olairukoni pooki metayiolo inkishoorot enyena, neesishore te kanisa te nkisisa Enkai. Naa ore pee kias ina kaata osiligi oleng ajo kebulu kanisa nimikitoni anaa inkera *“naanang'ari idie o idie to lkutati ake pooki le nkiteng'enare, o losek loo ltung'ana tiatua esunkureisho o losekin le lejare.”* Neaku, ore enkiteng'enare ang, aa iyiook ilarikok, naa pee kirreten ilairukok pee easisho tiatua enkipankata Enkai alang teneyiolou imbaa kumok oleng too lukuny kake megira aasishore pee elo dukuya enkipankata Enkai (The Mission of God).

Ore ai bae naa inchere kenare nikilikioo isiaitin e kanisa nikiyieu neasi. Amu, ore pee meyiolo ilairukok aajo ekiyieu neas esiai ebaiki netoni ake te kanisa. Matonyok pee king'oru inkoitoi kumok pee kilikioo isiaitin pooki nikiyieu neasi te kanisa pee egelu ilairukok esiai aashu isiaitin naairirikino ninche.

Keipirta sii ina bae naji **“priesthood of all believers”** te Kingeresa, aa inchere ekira pooki ilapolosak le Yesu tiatua enkaji Enkai. Keimaki Petero ina bae te 1 Petero 2: 4-10 eisulaki olkereri le tomon, naa kejo ilo kereri, *“Irara intae olorere ogeluno, inkasisin e nkaji e nkitoo, olorere sinyati, iltung'ana le Enkai makewan, pee itumutumu aainosai inkiaasin enyena e nking'asia, oloipotuo intae entung'uai enaimin aajing atua ewang'an enye naing'asiasho.”* (Tisipu sii Isaya 43: 20-21). Ore tele kereri kegira Petero aimaki ilairukok pooki mme ilarikok le kanisa ake. Keasisho apa olapolosani isiaitin tiatua enkaji e Nkai. Neiteng'en ninye iltung'ana, nemayian, neitaiki ilasarri. Ore tenkoitoi nabo era Israeli pooki ilapolosak anaa enalimu Enaidurra 19: 4-6. Kake kelimu sii Ilawi ematua e 8 tenebo ematua e 9 enaipirta emputoto e Aron o layiok lenyena. Neimaki sii Ilawi ematua e 19 inkitanapat



naanare nesuj ninche. Ore sii taata kenare neas ilairukok pooki isiaitin tiatua kanisa kake ketii sii ilkulikae oiuloki aas isiaitin e kanisa anaake (Efeso 4: 11; 1 Timoteo 5: 17-18). Ore to Sotua Ng'ejuk keimaki sii kulo kererin ilairukok anaa ilapolosak: Embolunoto 1: 5-6; 5: 9-10; 20: 6. Kake menare nejo olairukoni, "Mme esiai ai pee aliki ilkulikae tung'ana ororei le Nkai." Amu, keibala 1 Petero 2: 9 ajo kenare nelikioo olairukoni pooki ororei le Nkai. Keeta sii ele kereri tipat inchere keeta olairukoni pooki elakunoto pee eiuloki aomon Enkai. Mme lasima pee elo enetii olupastai. Neomonoki sii ilkulikae.

**7. Ekiimbung sii kuna sipat tomon ong'uan naatii shumata kuna aakurraki pee kiaku shakenisho too lkulikae airukok te kanisa.**

**8. Ekinyok pee kishet naboisho tenebo inkulie anisani ang te klusta ang to Lkoroi aa inchere te klusta e Mara South, tenkitanyaanyukoto, kinyorraa pee kinyok aaponu entumo kila olapa pee kiimaki imbaa, niking'ar indamunot, nikingtagol olikae olikae, nikiomon Enkai pee kitum induaat sidain.**

Matonyok pee kisuj enatejo Paulo te Efeso 4: 1-3, "*Ore naa nanu olora oloena tenkaraki Olaitoriani, asai intae entobik te nkishon naishiaakino ina kipototo naipotoki intae, te nkanyit pooki o te mborron, tenebo eng'iriata iretokinono olikae o likae tiatua enyorrata, inyuaakiki aata naboisho e Nkiyang'et tiatua eenata e seriani.*" Ekiata sii enkitanyaanyukoto to Iasat ematua e 15 pee eata ninche enkiguana pee eimaki imbaa. Kesipa ajo mikira ilkipaareta le Yesu ledukuya anaa ninche kake eton eeta tipat oleng pee kitumo aaimaki imbaa ang pee kitum naboisho. Ore sii tenkaraki kira osesen obo maibung'a sii aakurraki enatejo Paulo to Lkorintio le dukuya 12: 26, "*Ore pee eme erubata nabo, nemeyu rubat pooki tenebo ina; ore pee eisisi erubata nabo, neshipa nkulie rubat pooki tenebo ina.*" Nejo sii Iroma 14: 19, "*Ematusuj naa ina*

*nayau eseriani o enchetunoto nashetu olikae olikae. Matusuj sii 1 IIsesalonike 5:11 pee ejo, "Neaku entagoluoto oshuaa o likae o likae naa enteshet olikae olikae anaa ina niaasitata."* Nejo Ilhebrania 10: 25, "*...nimikipalaa entumo, anaa enatiu olkuaak le kulikae, kake intagolo olikae olikae neisul idolitata aajo etinyikua ina Olong.*" Nikiomon sii ina omono e Paulo pee ejo, "*Eitu apal maishooyo enashe te intae, nadamu intae te nkomono ai, pee eisho intae Enkai o Laitoriani lang Yesu Kristo, iloo papa le nkitoo enkiyang'et nagut eng'eno o ene mbolokinoto, entayiolo ninye*" (Efeso 1: 16-17). Ore pee kitumo aaimaki imbaa keyieu nikiomon Enkai oleng pee kitum eng'eno naing'uaa enetii ninye (Ing'orai sii Yakobo 1: 5). Amu, ore pee kiasishore eng'eno ang ake kelelek pee kipong'ori. Matonyok sii pee kisuj enkomono e Yesu te Yohana 17: 20-21.

## **9. Ekirrip kanisa nikiramat inyamalaritin e kanisa aasioki.**

**Matisipu Iasat 20: 27-31,** "*Amu maata enatelekua eitu aibalakinye intae lulung'ata e nkikoo e Nkai neitu aliki intae. Entagolie ate maate o ina luaata pooki naitaa intae Enkiyang'et Sinyati ilaing'urak lenye, aaitoti esirit e Nkai nainyiang'aka ninye kewan to sarge lenye. Kayiolo ajo inchere ore pee alo aing'uaa intae nejing atua intae isuyian ooata enkarri, lemeing'urrie ena luaata; naa keinyototo ltung'ana tiatua intae, oojo mbaa e nkiushoto, pee eyietaa looiteng'eni laa ninche esujaa. Enchololoto naa nidamumu aajo ore te rishata oo larin okuni eitu agira aikokito intae pooki dama o kewarie too lkiyio.*" Matisipu aajo etejo Paulo keinyototo lelo tung'ana tiatua ninche. Mikiyiolo tenaa etijing'a kanisa eeata enkipankata pee epurro iltung'ana kake ore tenkiting'oto keas ina. Keyietaa iltung'ana nemerregel sii ororei le Nkai. Kajo kiyiolo iltung'ana ootaasa ina. Naa meshilaa tenegil kanisa katukul amu kegira aadamu ate ake. Etiu anaa olowuaru oata esumash laa kelotu ninye enetii endaa nanya oleng egira adamu kewan ake. Neaku, kenare nikisipu iltung'ana naa ore pee

elotu enyamali naje kenare sii nikiramat ina nyamali eton eitu ebulu.

Keidimayu sii pee eitanyamal iyiook iltung'ana lemetii kanisa ang. Nejo **2 Petero 2: 1**, "*Kake einyeito sii apa iloibonok le lejare tiatua olorere, anaa enayooki sii aainyototo tiatua intae ilaiteng'enak le lejare.*" Neaku, matorrip kanisa ang too nkaloli pooki amu ketii iltung'ana atua netii sii iltung'ana otii boo e kanisa ang ooyieu neyietaa iltung'ana laa ninche esujaa. Nelo dukuya Petero ajo, "...ooyau too nkisudorot inkiteng'emat naaiminie neitarruoo, nemiki doi ninye Olaitoriani laa ninye oinyiang'ua ninche, neyaki ate enkidaaroto nasieku. Naa kesuj ilkumok irrekiei lenye torrok ore te nkaraki ninche nesukenyi enkoitoo oo sipat. Ore enkwuarisho enye neitorogony intae too roreri loo monko, amu meiyiata enkiguana enye e opa, nemeirura erruoroto enye" (2 Petero 2: 1-3). Neaku, kenare nikishololo anaake nikirrip eluaata ang aa inchere kanisa. Amu kejo oshi Ilmaasai, "*Meshukoyu oloomi otoyio.*" Nejo sii, "*Mesarunoyu oltau oipurupure,*" aa inchere ore tipat e kuna dung'eta e rashe pokira naa pee isioki arerioo imbaa eton eitu erruoyo. Matisipu sii kulo kererin oopirpta iloibonok le lejare – Matayo 24: 4-5, 11; Ilgalatia 1: 6-9; Ilfilipi 3: 2; Ilkolosai 2: 4, 8, 18, 20-23; 2 IIsesalonike 2: 1-3; 1 Timoteo 1: 3-7; 4: 1-3; 2 Timoteo 3: 1-8; 1 Yohana 2: 18-19, 22-23; 2 Yohana 7-11; Yuda 3-4. Keata ilashumpa endung'et erashe najo, "*Eripata te rishata sidai (A stich in time)* aa inchere keikash tinirip enkila ino eton ebaiki amu tinianyu erishata sapuk oleng ebaiki nelotu erishata pee meitoki aripayu. Nejo Ilmaasai, "*Tumurutoi enkiperrata e ng'udi,*" naa keeta sii tipat nanyaanyukie ina dung'et e rashe te Kingeresa naipirpta enkila. Metaa tenetii enyamali keikash tinintobir eton ebaiki. Nejo sii Ilashumpa, "*Enkibooroto naikash alang embaata,*" (*prevention is better than cure*) aa inchere keikash tinimbooyo embae alang tinianyu pee ibak te siadi. Amu, ebaiki nival enyamali o metabaa anaa nesapuku oleng.

## **10. Ekibaiki iltung'ana le kanisa pee kining inyamalaritin enye nikiomonoki ninche nikinteng'en ororei le Nkai nikintagol sii.**

Ore ina bae naa keipirta enatejo Paulo to Iasat 20: 27-31 anaa enikindipa aatejo. Kenare neramat ilarikok kanisa anaa ilaing'urak oodupa. Neitoti sii iltung'ana te ndaa naaing'uaa Enkai. Ore kanisa naa etiu anaa olmarei anaa enaimaki Paulo to Lkorintio ematua e 12. Maibung'a enatejo ninye inchere, *“Ore pee eme erubata nabo, nemeyu rubat pooki tenebo ina; ore pee eisisi erubata nabo, neshipa nkulie rubat pooki tenebo ina. Irara taata intae osesen le Kristo, nirara moobo rubat enyena”* (1 Ilkorintio 12: 26-27). Neaku ore pee etum obo enyamali tiatua kanisa ang anaata kipuo aabaiki ninye pee kiomonoki ninye nikintagol ninye. Kake ore inkulie katitin ketum oltung'ani enyamali kake meibala ti oriong. Neaku, ina pee enare nikipuo aabaiki ninye aasipu enkishui enye tenaa ketii enyamali naje. Kejo Ndung'eta e Rashe, *“Ore enkiguana natii atua endamunoto e tung'ani netiu anaa enkare nagut, kake ore ilo oota ening'unoto naa kebuku ninye aipang'unye”* (Ndung'eta e Rashe 20: 5). Kesipa oleng ina dung'et erashe amu ore inkulie katitin meyieu iltung'ana nelimu imbaa naagut oleng tiatua iltauja lenye. Neaku, kenare nikiata eng'eno sapuk pee kibuku aaipang'unye ninche.

Ekidol te kulo kererin aajo keishiakino tinikiomonoki ilkulikae: 1 Timoteo 2: 1-2; Efeso 6: 16-18; Daniel ematua e naudo; Yakobo 5: 14; Matayo 5: 44; Iasat 12: 5. Nenare sii tinikinteng'en iltung'ana anaa Paulo pee ejo to Iasat 20: 20-21, *“Niyiololo aajo eitu ai kata aing'ash aibalakinye intae embae ake pooki naret intae, naiteng'en intae te dukuya iltung'ana, naruk inkajjik, aishakenoki ndung'ot pokira aa Lyahudi o aa Lyunani meirridu tialo Enkai, neiruk Olaitoriani lang Yesu Kristo.”* Neaku, eitu eanyu iltung'ana meetu enetii ninye kake eshomo abaiki ninche too nkajjik enye. Maibung'a sii eng'eno natejo embuku o Lhebrania 10: 24, *“...naa ematadamu enikinkunakino olikae olikae enkibusunkat o enyorrata o siaaitin sidain...”* Kenare nikintagol

olikae anaa enataasa Yudas o Sila. Nejo Iasat 15: 32 naipirta ninche, "...*neinosaki lalashera nkumok neitagol.*" Ing'orai sii kulo kererin: 1 Ilesalonike 5: 11, 14; Ilgalatia 6: 1-2; Olaikooni 4: 9-12; Ndung'eta e Rashe 27: 17; Tito 1: 9; Efeso 4: 12; 2 Timoteo 3: 16; Ilhebrania 3: 13; 13: 1.

**11. Ekinteng'en aitobiraki lelo pooki oojo keyieu neibatisai. Nikinteng'en ajo ore enkibatisa naa keipirta empalakinoto oong'ok, eng'amunoto Enkiyang'et Sinyati, o enkibung'ata enkoitoi e Yesu tiatua enkishui enye. Nikinteng'en sii enaipirta imayianat tenebo imbaa naagol naaponu tenejing enkoitoi e Yesu (2 Timoteo 2: 15).**

Kindipa aaimaki enkiteng'enare nikidol aajo keeta tipat oleng te kanisa. Kajo kitodua sii aajo keeta tipat oleng pee kinteng'en iltung'ana tenguton eton eitu eibatisai. Amu, ore pee eibatisai nemeyiolo tipat aashu meyiolo enaipirta imbaa naagol naaponu naa kelelek pee eshuko ninche siadi. Maiteng'ena ninche kulo kererin pooki eton eitu eibatisai pee eyiolou aajo melelek ina oitoi kake ketii sii imayianat tenesuj: Yohana 3: 16; Luka 9: 23-26; Iasat 2: 38; Luka 9: 57-62; Iroma 12: 1-2; 1 Ilkorintio 6: 18-20; 1 Ilesalonike 4: 3-8; Ilfilipi 1: 29-30; Marko 4: 17; Ilgalatia 6: 12; 1 Petero 3: 13-16; 2 Petero 3: 17-18; Iroma 1: 16-17; Marko 8: 34-38.

Matadamu sii kulo kererin pooki oopirta enkibatisa: Matayo 3: 13-17; Matayo 28: 18- 20; Iasat 2: 38; 22: 16; 1 Ilkor. 12: 13; Iroma 6: 1-4; Ing'orai sii Iasat 2: 47 pee ejo "Neponaa Olaitoriani ilo turrur lenye anaa ake te lelo ooitajeuni;" Ilgalatia 3: 26, 27; 2 Ilkor. 5: 17; Ilkolosai 2: 11, 12; 1 Petero 3: 2 - Ing'orai sii Marko 16: 16; Yohana 3: 3, 5. (Ore ilo rorei oji "aaigil" naa keidimayu pee eeta ai tipat inchere "aing'uaa shumata". Metaa eini oltung'ani aaigil teinoto naing'uaa shumata amu eing'uaa ina bae Enkai.); Tito 3: 5. Ketii embuku naigero naipirta lelo kererin pooki naji, "Enkoitoi e Njeunoto."

**12. Nikinteng'en sii ororei le Nkai aitobiraki tenkipankata sidai pee kintoti kanisa te ndaa Olaitoriani nairirikino enkitubulunoto enye tiatua Yesu.**

Matusuj enatejo Paulo te Tito 1: 9 naipirta ilarikok, “*Neibung akurraki ilo rorei osipa anaa enaiteng'enishoteki, pee eidim ninye aishooi eutaroto tiatua ina kiteng'enare supat, neibooyo lelo ooishankarra.*” Neimaki Tito 2: 1 “enkiteng'enare sidai.” Neimaki 1 Timoteo “*enkiteng'enare supat.*” Keesishore kulo kererin pooki ororei obo te nkutuk o Lgiriki. Naa keipirta enkiteng'enare nasipa naata biotisho. Ketii embarakinoto nemetii elejare. Amu, keidimayu pee esipa embae naje kake ore pee iimaki anaake nimiimaki inkulie baa tiatua ororei le Nkai naa keaku enkiteng'enare nemeeta mbarakinoto sidai (aashu enkiririkinoto). Nejo sii Paulo te Roma 15: 19, “*...atolikioyie tukul ororei supat le Kristo,*” aa inchere etolikioyie imbaa too nkiririkinot. Eitu eitong'or imbaa. Matadamu kuna baa.

(1) Kenare nikireiki Osotua Ng'ejuk hoo neton eeta Osotua Musana tipat oleng. Amu ninye olkitamanyunoto lo Sotua Ng'ejuk. Naa ore pee isom Osotua Ng'ejuk keimaki imbaa kumok to Sotua Musana. Metaa kegol pee inteng'en iltung'ana Osotua Ng'ejuk tinimiimaki sii Osotua Musana.

(2) Matadamu aajo keitutum osalaba, empiunoto o elotunoto e Yesu imbaa pooki. Neaku, ore pee kinteng'en iltung'ana Bibilia matadamu pee eaku nena baa olkitamanyunoto le nkiteng'enare ang.

(3) Matadamu sii aajo ekigira aaiteng'en iltung'ana pee eaku ilasujak le Yesu neiteng'en sii ilkulikae. Meipirta eyiolounoto oo mbaa e Bibilia ake too lukuny. Amu, ketii iltung'ana laa kenyok oleng pee eyiolou imbaa ng'ejuko kake mesuj tiatua enkishui enye.

(4) Matusuj enkitanyaanyukoto e Paulo pee eiteng'en iltung'ana anaa enatolimuo ninye te 1 Ilesalonike 2: 6, "*Neitu king'oru enkisisa too ltung'ana aa te intae, arashu te kulikae, hoo naa anaata kinkuna neijia anaa ilkipaareta le Kristo.*"

(5) Matadamu pee kinteng'en inkisomaritin kumok naing'uaa Injili amu ore enkishui e Yesu naa olkitamanyunoto le nkiteng'-enare ang.

(6) Matadamu pee kigelu enkipirta nabo nikintobir inkisomaritin naata esiana naipirta ina bae naa keji te Kingeresa "*theme or series preaching.*" Kaisho kuna kitanyaanyukot. Keidimayu pee iata enkipirta aashu "*series*" naaipirta olmarei. Nintobir matejo inkisomaritin ong'uan naipirta ilmareita. Ebaiki niyieu ninteng'en imbaa naaipirta eseremare, aashu enkibatisa, aashu enkoitoi e sinyatisho, aashu esujata e Yesu, aashu endaa Olaitoriani, aashu enikinko pee kiyiolou inkishoorot ang, aashu inkitanyaanyukot e Yesu (*parables*), aashu erikore e kanisa, aashu enkoitoi e njeunoto, aashu empiris e Nkai, aashu enyorrata, aashu ng'ok, aashu enkiteng'enare oo lairukok (*discipleship*), aashu enkipankata e Nkai tiatua Bibilia telulung'ata (*mission of God*), aashu enkirridunoto, Enkai, Enkiyang'et Sinyati, Yesu, empukunoto e kanisa nayieu Enkai, inkitapong'ot e taata tenaipirta Bibilia, enjurrunoto oo lkuak, enkomono, Endaa Olaitoriani, elotunoto e Yesu, Keper, Olbalbal le Nkima, imayianat nikitum tiatua Yesu, enikira ng'ae tiatua Yesu, Enkai nara uni (*Trinity*), inkitanapat tomon, kaing'ae Yesu, tipat osalaba, empiunoto, emitunoto e Bibilia, o enikinko pee kinyorru ilmang'ati lang. Tadamu pee inteng'en inkisomaritin naipirta ng'ok naatii olkuak linyi anaa: esiai oloibonok (ildeketa), empurrorre, elejare, emera, eloloito, inkituak kumok, enkidong'oto oonkituak, olwuasa, olkep, entonai enduaran, tenemetii empalakinoto oong'ok tiatua iltung'ana, engoro, isiruai oogilunore ororei le Nkai, olmarenke, ilkeek lemesidain aashu ilkeek oitemerisho (*drugs*), o kulie ake naatiu

nejjia, enchankar, olom, olorok, ng'uarrata torrok, eomonoto e kulie tokitin neme Enkai, esakutore, mang'atisho. Nintoki sii aiteng'en iltung'ana enaipirta ilng'anayio le Nkiyang'et anaa enalimu Ilgalatia 5: 22-24.

(7) Keidimayu sii pee igelu embuku nabo to Sotua Musana aashu to Sotua Ng'ejuk ninteng'en inkisomaritin kumok naata esiana naing'uaa ina buku ake.

(8) Ore ai oitoi enkiteng'enare naa tinigelu iltung'ana ooje tiatua Bibilia ninteng'en enaipirta enkishui e kulo tung'ana, anaa: Adam tenebo Hawa, Abrahamu, Isaac, Yakobo, Yosef, Musa, Yoshua, Rahabu, Samson, Gideon, Debra, Samuel, Saulo, Daudi, Solomon, Yoab, Elija, Elisha, Isaya, Yerima, Yosia, Yohana Olaibatisani, Yesu, Petero, Paulo, Barnaba, Timoteo, Yohana o Ikulikae ake. Ninteng'en iltung'ana enaipirta lelo tung'ana pee eyiolou eneiko tenesuj inkitanyaanyukot enye sidain tenkishui enye napaash inkitapong'ot enye.

(9) Ketii sii kuna pukunot oo nkisomaritin: Keipirta emitunoto e Bibilia o mbaa naaipirta emitunoto e Nkai (keji "*apologetics*" te Kingeresa), netii inkisomaritin naaipirta imbaa naagol, netii sii inkisomaritin naaipirta inyamalaritin naata iltung'ana aashu kanisa.

(10) Keyieu nikidamu inkisomaritin naaipirta kuna rishat: Pasaka, erishata e Krismas, tenebo olari ng'ejuk. Netii sii inkulie kanisani naayanyit oleng ina wiki eton eng'or Pasaka. Metaa keeta **Jumapili** oltuka (*Palm Sunday*) naa keipirta ina olong pee ejing Yesu Yerusalem, "*Nedumu iltung'ana lng'osil loo ltuka nepuo aanang'are ninye*" (Yohana 12: 13). Netii sii **Alhamisi** naa keipirta ina rishata pee enya Yesu Endaa Olaitoriani tenebo ilkipaareta lenyena. Ore **Ijumaa** naa keipirta ina olong pee eshe Yesu, neaku keji Ijumaa sidai. Ore inkulie katitin keisomaki oshi Isaya ematua e 53 teina olong e Jumaa. Ore **Jumamosi** naa



keipirta ina rishata pee etii Yesu atua enkurare. Neishunye ina wiki naji Ewiki sinyati. Ore pee eishunye ina wiki nelotu **Pasaka** kewan aa **Jumapili** naipirta empiunoto e Yesu. Matadamu aajo meigero tiatua Bibilia ajo lasima pee kiyanyit kuna olong'i alang inkulie kake mme torrongo sii tinikidamu tenguton nikiyanyit sii nena rishat naaipirta Yesu. Amu, era ninye Olaitoriani lang. Nemeishiakino tinikiata enchankar naipirta nena baa amu etejo Paulo to Roma 14: 5-6, *"Eitirrish likae tung'ani enkolong nabo aitulusoo te nkae, neitirrish likae nkolong'i pooki aitoris. Enchoo pooki tung'ani metonyorrai te ndamunoto enye makewan. Ore oloitirrish enkolong nabo neitirrish aa Olaitoriani eyanyit."* Neaku, tenaa keyieu oltung'ani neyanyit nena olong'i tiatua ina ewiki naji Ewiki nasinya naa metii enyamali, kake ore pee meshilaa likae tung'ani ilo kuak naa metii sii enyamali.

(11) Kajo nanu eisidai oleng teneipanka olpastai Jumapilini pooki tiatua olari obo pee esuj ina oitoi to nkiririkinot. Metaa kedamu nena pukunot oo nkisomaritin pooki egira aipanka inkisomaritin enyena tiatua olari oje. Neipanka tenkomono, o ng'eno. Naa mme torrongo sii teneipanka inkisomaritin enyena tenebo ilkulikae pastani pee eng'ar ninche indamunot. Mme lasima pee esuj ninche enkipankata nabo kake keng'ar indamunot. Ore pee epuku enyamali naje tempolos olari nemetii enkisoma naipanka naipirta ina bae naa mme torrongo teneipanka ai kisoma naipirta ina bae. Ore pee eidip ina kisoma neshukokino enkipankata enye. Amu, meyiolo oltung'ani imbaa naaponu.

(12) Ore ai bae naa matadamu aajo kigira aaiteng'en iltung'ana pee eiteng'en sii ilkulikae. Amu, ore inkulie katitin kiasishore enkoitoi nagol oleng te nkiteng'enare ang metaa kegol oleng pee eibung iltung'ana kuna baa pee epuo aaiteng'en ilkulikae. Maing'oru inkoitoi kumok naaret iltung'ana lang meibung'a kuna baa nikiyieu nikinteng'en ninche.

(13) Kayieu naisho intae enkitanyaanyukoto naing'uaa kanisa ang ti America, inchere eneiko oshi ninche pee edamu iyieunot e kanisa pee eipanka inkisomaritin naaisho ilpastani iltung'ana le kanisa. Keikilikuan oshi kuna kikilikuanat: 1. Kaji kiyieu nikirik iltung'ana te mbulunoto enye? 2. Kakua nyamalaritin kidolita tiatua iltung'ana lang te kanisa naanare nikiret? 3. Ketii enchalan naje naibala? 4. Amaa, kakua kikilikuanat egira aikilikuan iltung'ana le kanisa? 5. Kenare nikinkok iltung'ana lang pee eas nyoo, aashu pee eaku nyoo? 6. Kaa buku te Bibilia nanare nikiasishore pee kinteng'en ninche? Tisipu pee miuloki embuku nabo anaake. Kenare nikiasishore imbukui pooki te Bibilia pee kinteng'en iltung'ana. 7. Kaa pukunoto enkiteng'enare (aashu keji "series" te Kingeresa) sidai tinikinteng'en iltung'ana, naa kaa dupoto etum tina kiteng'enare (aashu "series")? Kiimakita ilo rorei oji "series" te Kingeresa te nampa (6) te shumata ena bae. Ore series naa inkisomaritin nikinteng'en iltung'ana naidikidiko naaipirta embae nabo. 7. Ore enabayie naa kenyaanyuk ina bae nikitejo te nampa (10) te shumata, metaa kenare nikidamu kuna rishat anaa Pasaka, Krismas, aiko neija.

(14) Netii oltung'ani otejo eisidai tinikisuj **2 Timoteo 4:2** inkatitin pooki tinikinteng'en iltung'ana. Nejo ilo kereri, "...tolikioi ele rorei isiosiono tenkata sidai o te ntorrono. Inguanaki intijing'ai, nisikong, ninkok niaaku otemesi (niaku oloota eng'iriata sapuk) te ng'iriata o te nkiteng'enare." 1. Ninerioo imbaa, 2. Nisikong (te nyorrata tenebo olng'ur o eng'iriata), 3. Ninkok,<sup>14</sup> 4. Ninteng'en te nkoitai nasipa naitoriori (Tisipu sii 2 Timoteo 3: 16-17). Kake matisipu oleng ajo kejo Paulo anaata kias nena pooki "**te ng'iriata.**" Amu, etejo sii Paulo tina buku ake inchere, "Meishiaakino osinka lo Laitoriani teneaku olo larrabal kake oltung'ani oibor oshoke te pooki ng'ae olaiteng'enani onyor aiteng'enisho, ong'iri, nererioo te mborron lelo ookesh ninye, amu ebaiki neidim Enkai aishoo meirridu nepuonu aayiolou ina sipata. Pee ebaiki neisik aaing'uaa orreshet

*le shetani, otang'asa apa aibung metaasa enayieu ninye'' (2 Timoteo 2: 24-26).*

(15) Matadamu enkitapong'oto nabo tenguton oleng. Tinikinteng'en oleng enaipirta imbaa nemetii atua osororua le nkiteng'enare e Bibilia nikilepie ninche aaitaa ine tipat oleng alang inkulie baa naaibala naata tipat aisul, naa ekipong'ori. Maibung'a oleng kuna baa naatii osororua le Bibilia anaa kuna baa naaipirta ilomon supati. Tenkitanyaanyukoto, maibung'a aakurraki oleng imbaa naaipirta Enkai, Yesu, osalaba, empiunoto, enkoitoi enjeunoto o enkoitoi e sinyatisho. Kake ketii inkulie baa e oriong naa keeta iltung'ana indamunot naapaasha. Kenare nikiata eng'iriata oleng naipirta nena baa. Matadamu embata e kuna baa eoriong.

Tinikiomon pooki tenebo aashu teneomon obo. Keikok Bibilia iyiook pee kias imbaa pooki too mbarakinot te kanisa (1 Ilkorintio 14: 40) kake meiuloki aliki iyiook ewalata naipirta ina bae. Neaku, menare nikiata enchankar naipirta ina bae. Kake ketii imbaa kumok te Bibilia naipirta olwuasa, o tinikidamu ilkulikae alang tinikidamu iyieunot ang ake.

Ore ai bae naa tinikiasishore imashinini te kanisa aashu mikiaasishore. Meiuloki Osotua Ng'ejuk aaliki iyiook tenaa eisidai tinikiasishore aashu mesidai. Neaku, kajo ekiata elakunoto tina bae. Metaa mesidai tinikinchanarra naipirta ina bae aashu kinteng'en inkisomaritin kumok naipirta ina bae. Kake kenare nikiasishore nena mashinini aitobiraki.

Ore ai toki naa enkiroroto oo lng'ejepa. Menare nikiuloki aaimaki ina bae anaake amu ore embae naata tipat naa inchere tinikintagol iltung'ana te kanisa too mbaa naaning'unoyu. Kake kesipa ore pee eyau oltung'ani ina bae tiatua kanisa ang naa kenare nikiimaki. Ore te sipata ketii elejare oleng tiatua ina siai enkiroroto oo lng'ejepa. Netii iltung'ana laa kejo ore pee meiro iltung'ana too lng'ejepa nemeeta Enkiyang'et Sinyati te mborei. Nejo sii ore oltung'ani lemeiro toolng'ejepa naa olairukoni oshal. Neaku,

matorrip ina bae pee kinteng'en iltung'ana imbaa enkiyang'et naashet kanisa alang tinikinteng'en imbaa naayau olarrabal.

(16) Matadamu sii pee kintoris imbaa tenkiririkinoto (keji "balance" te Kingeresa) tiatua enkiteng'enare ang. Kang'as aliki tipat ilo rorei oji "balance" te Kingeresa. Ore pee mikintoris enkiteng'enare ang nikireiki embae aashu enkiteng'enare nabo naa ekipong'ori. Kake ore ina kiteng'enare kewon naa nemme enkias torrongo kake ore pee kireiki ina bae oleng nimikidamu inkulie kiteng'enaritin naabung'akinore ina kiteng'ena, naa ekipong'ori. Neaku, mayiolo katukul likae rorei obo te Kimaasai olimu ina bae metelexu enkitorisio.

Neaku, kayieu nikidamu entoki naji "polarities" te Kingeresa pee kisipu enkoitoi pee kias imbaa pooki te nkoitoi nairirikino. Ore polarities naa keipirta imbaa are naapasha kake keibung'akino. Kayieu nikidamu kuna baa amu ore inyamalaritin kumok naa eing'uaa inkitapong'ot tenkaraki kuna baa. Matang'as aadamu imbaa naaipirta enkishui ang teumata.

Tinikidamu imbaa .....	Inikining tiatua iseseni lang aashu iltauja lang
Enchula tenebo.....	Katon openy aa nanu ake
Imbaa naaipirta Enkai .....	Imbaa naaipirta ena kop
Kaisilig ilkulikai .....	Kanap olola lai makewan
Enkitashoto .....	Enkibelexenyata
Esiai.....	Endala
Enkitiunoto .....	Enkuretisho

Ore nena baa pooki naa keata tipat tiatua enkishui ang. Naa keata pooki erishata enye nairirikino. Kake ore pee kireiki nabo oleng nimikidamu ai bae naabung'akino ina, nikipong'ori. Kayieu naisho intae enkitanyaanyukoto nabo pee eibalayu ina bae. Matadamu indamunot o ening'unoto. Eisdai pokirare amu eisdai tinikidamu imbaa pee mikiaas tenkoitoi alani. Kake keidimayu pee kidamu

oleng enikiaas kake metii ening'unoto aashu metii esipata tiatua iltauja lang naipirta ina bae. Anaa te kanisa keyieu nikidamu imbaa pooki nikiaas tenkoittoi nairirikino kake keyieu netii sii ening'unoto. Aashu ore likai rorei naa "enkirowuaj" nasipa.

Kake keidimayu pee etii ening'unoto aashu enkirowuaj kake metii indamunot neaku kipong'ori tenkaraki ina. Amu, ebaiki nikiaas imbaa nemeishiakino tororei le Nkai tinimikidamu enikiasita. Metaa kigira aaing'oru enkirowuaj kake mikigira aaing'oru esipata ororei le Nkai to ndamunot ang te nkoittoi naishiakino. Neaku, kenare nikidamu kuna baa kigira aaiteng'en iltung'ana.

Ore hoo nemegira Paulo aimaki enkirowuaj sii duo oleng tembuku Olkorintio kake kegira aimaki enkiroto toolng'ejepa kake keata tipat naipirta ina amu ebaiki ore tenkaraki enkirowuaj ang nikinteru aairo toolng'ejepa lemeyioloi kake meret kanisa teumata. Amu, kejo Paulo tembuku e dukuya Olkorintio 14: 15 *"Kaa naa aas? Kaomon ake tenkiyang'et ai (aashu ilng'ejepa lemeyioloi) kake aomon ake sii toondamunot aainei narany te nkiyang'et narany ake sii te ndamunoto ai."* Inchere keibung'akino enkiyang'et oondamunot. Neaku, ore pee kireiki enkiyang'et ake (aashu ilng'ejepa lemeyioloi) meretu kanisa amu kejo Paulo tolkereri 16, *"Amu tininchooyo enashe te nkiyang'et ino, kaji eiko likae oton teina tumo pee ejo 'Esai' teina ashe ino, tenemeyiolo enajoito"* (1 Ilkorintio 14: 16). Neaku, kejoito Paulo keikash tenemaomon tenkiyang'et nemeyioloi tiatua enchula e kanisa amu meretisho. Kake keikash tenaomon too ndamunot tenkoittoi naibala oleng pee eretu kanisa.

Matadamu sii kuna baa naaipirta enkiteng'enare ang.

**Tenchoto nabo**

**Ti ai shoto**

- Enataase..... Oorei le Nkai
- Iasat sidain ..... Enkirukoto
- Inkitanapat ..... Empiris

Aitadou kewon.....	Enjurrunoto oombaa
Imbaa naaipirta tung'anisho .....	Imbaa naaipirta Enkai
Erishata.....	Intarasi
Osinyati .....	Olaing'okoni
Imbaa osesen.....	Imbaa enkiyang'et
Ilng'anayio le Nkiyang'et .....	Inkishoorot enkiyang'et
Alo dukuya aiu ilng'anayio .....	Empiris
Enkirowuaj .....	Enkibooroto e kewon
Enkirooroto.....	Ening'unoto (listening)
Enkiyang'et .....	Indamunot, eng'eno
Inkoitoi ng'ejuko.....	Enkipankata
Enkai nalakua .....	Enkai nataana
Aisilig likai .....	Eutaroto
Sinyatisho .....	Oлкуak

Matadamu aajo ore nena baa pooki naa keata tipat kake ore pee kireiki nabo oleng naa keidimayu pee kipong'ori. Tenkitan-yaanyukoto, matadamu imbaa naataasate te nkishui ang, nikidamu sii ororei le Nkai. Kang'as aikilikuan intae ajo kainyioo enkipimet ang? Imbaa naataasate tiatua enkishui ang enkipimet aashu ororei le Nkai? Kesipa, ororei le Nkai.

Ore apa atii enkaji natii Nairobi nagira anya endaa netii likai tung'ani omoni te nanu. Nikinteru aaimaki Enkiyang'et Sinyati naaliki ninye enkatini naipirta kewon. Nejo ore apa atii olgilata lai agira aomon Enkai, naaibatisa Enkai nanu te Nkiyang'et Sinyati nairo toolng'ejepa. Neaku, entoki nataase tenkishui enye. Neaku, kegol oleng pee aliki ninye ajoki eitu easayu ina bae. Kake ore te sipata mikiyiolo tenaa Enkiyang'et Sinyati etang'amua aashu ai kiyang'et ake. Ore enkipimet naa ororei le Nkai. Kejo Iasat 2: 38 keng'amu oltung'ani Enkiyang'et Sinyati ina kata pee eibatisai. Ore tiatua embuku o Iasat naa kenyaanyuk teneng'amu oltung'ani Enkiyang'et Sinyati o teneibatisa Enkai oltung'ani te Nkiyang'et Sinyati. Neaku kejo sii embuku e dukuya Olkorintio 12: 13 "*Ore tenkibatisa teina Kiyang'et nabo nikitaa pooki osesen obo*

*neitamataki iyiook ina Kiyang'et nabo.*” Neaku, ore pee eibatisai iyiook tenkare neibatisa Enkai iyiook pooki te Nkiyang'et Sinyati. Ore pooki ng'ae oibatisaki tenkare, neibatisaki sii tenkiyang'et teneiruko neirridua sii.

Neaku, matorrip ate amu ebaiki naa sidai enataase tiatua enkishui ino kake ebaiki naa kegilunore ororei le Nkai. Neaku, matayiolo aajo ore enkipimet ang naa ororei le Nkai.

Maimaki sii iyie penyo ilng'anayio le Nkiyang'et o nkishoorot enkiyang'et tenaipirta enkiteng'enare ang. Eisidain nena pokirare kake ore pee kireiki nabo nikipal enkae naa ketii enyamali. Tenkitanyaanyukoto, maing'urai kanisa natii Ilkorintio. Maisoma Ilkorintio le dukuya 1: 7 nejo, *“neaku eitu eng'oriki intae enkishorunoto e nkiyang'et hoo nabo..”* (1 Ilkorintio 1: 7). Neaku, keata inkishoorot enkiyang'et pooki kake maisoma 3: 1-3 pee kidol aajo eton era ninche inkera kutiti tiatua enkirukoto. Naa keata sii ninche olwuasa 4: 19. Naa keshipa tenkaraki eloloito tiatua kanisa (1 Ilkorintio 5:1, 2). Kepuo iltung'ana enetii ileitu eiruk tenkaraki enchankar enye (6: 1). Kejo ninche kiata elakunoto tiatua Yesu kake kegira aadamu ate ake (10: 23, 24).

Ketii ilkarsisi oomen ilkulikai te kanisa (1 Ilkorintio 11: 21, 22). Etiu sii anaa meata enyorrata (1 Ilkorintio 13:1-3). Isoma sii Ilgalatia 5: 22-24; Matayo 7: 22, 23.

Neaku, matayiolo aajo ore pee kireiki inkishoorot Enkiyang'et ake te nkiteng'enare ang nimikidamu ilng'anayio le Nkiyang'et naa kejing enyamali sapuk atua iyiook.

Neaku, matadamu nena baa pooki paa ore pee kinteng'en ilkulikai nikiretu ninche pee eata nkiririkinot naarisio (aashu te Kingeresa keji *“balance”*) te nena baa. Amu eisidai pooki kake keata pooki erishata enye neata ewueji enye te kanisa o tenkiteng'enare ang.

### **13. Nyorrraa olpastai le kanisa pee eiteng'en inkisomaritin naing'uaa Bibilia naaipirta kuna baa te kila olari, eisulaki nena baa naaipirta ilairukok pooki.**

Kedamu olpastai erishata sidai pee eiteng'en nena baa naaipirta ilarikok tenebo ilpastani. Amu, menyaanyuk imbaa pooki naaipirta ilarikok o mbaa naaipirta ilairukok. Neaku, kenyok ilaiteng'enak oleng aaiteng'en ilairukok tenebo ilarikok kuna baa enkata nabo tiatua olari te nkoitoi nairirikino. Naa keibala ajo ketii imbaa kumok tiatua ena kisoma, neaku kenare negelu olpastai imbaa natii ena kisoma neiteng'en ninye nena baa te rishata nabo, ore ti ai rishata neiteng'en inkulie. Kake kenyok oleng aiteng'en iltung'ana ootii kanisa enye nena baa pooki too nkolong'i.

### **14. Nikipik enkomono atua nena baa pooki anaake.**

Kindipa aaimaki enkomono. Atejo keeta enkomono tipat oleng tenaipirta ina siai e kanisa, kake kayieue naitoki aitadamu intae ajo eisapuk oleng ina bae naaipirta enkomono tialo ina siai oolarikok le kanisa. Amu, ore pee kingarakino engolon ang nikipong'ori inkatitin pooki. Ore enkikoo ai naa pee kiomon anaake ina omono e Paulo natii embuku Efeso 1: 17-19 najo, "*...pee eisho intae Enkai o Laitoriani lang Yesu Kristo, iloo papa le nkitoo enkiyang'et nagut e ng'eno o ene mbolokinoto, entayiolo ninye. Aomon pee eitawang inkonyek oo ltauja linyi pee itumutumu aatayiolo ilo siligi oipotokoki intae, aatayiolo aajo kebaa ina golon enye nemetemayu naa ninye naasisho tiatua iyiook iloiruko, te risioroto easata enkidimata enye kitok.*" Metaa ore pee iomon, iomon pee kincho Enkai enkiyang'et nagut e ng'eno o ene mbolokinoto. Niomon sii pee kintawang Enkai inkonyek oltau lino pee imbung ilo siligi le Nkai. Niomon pee kincho Enkai ina golon pee irikoo iltung'ana. Niomon sii pee kimput Enkai oltau lino te Nkiyang'et Sinyati anaa enajo Bible te Efeso 5: 18, "*Emimera te naisho oo sabibu amu emutata e nkishon ina; kake enchoo Enkiyang'et eiput intae..*" Ore



pee ejo *"enchoo Enkiyang'et eiput intae"* naa kegira aimaki pee eiput iltauja lang anaake. Matadamu sii aajo mikigira aarare osesen o sarge, *"kake ilaitoriak, nikiarare engolon oo mpukunot kumok, nikiarare ilaitoriak le nkop lena aimin taata, nikiarare lororani loo nkiyang'eta torrok too wuejitin e shumata"* (Efeso 6: 12). Neaku, ore inkatitin pooki tenepuku enyamali naje kenare nikiomon Enkai pee measishore shetani ina bae to losek lenye pee eitapong'oo iyiook. Matadamu tenguton enajo Paulo to Lkorintio li are 12: 10, *"...amu ore enkata nashal nanu ina kata agol."* Metaa ore pee kinyorraa aajo ekishal nikintarasaki Enkai ina shalan neibelekeny ninye metaa engolon.

## ENKITING'OTO ENA BUKU NAIPIRTA INDUAAT

Maisiliga Enkai pee eretu iyiook pee kiaku ilarikok oata enkima Olaitoriani o Enkiyang'et Sinyati tiatua iltauja lang. Nikiata induaat naaing'uaa oltau le Nkai. Nikimbung enkoitoi e Yesu toltauja oosipa. Nikisilig ninye inkatitin pooki anaa engolon ang. Nikiboloki iltauja lang pee king'amu eng'eno naaing'uaa Enkai. Nimikias isiaitin e kanisa te sunkureisho kake kias te sipata nikincho Enkai enkitoo pooki. Nikisilig ninye pee eilepie iyiook alang tinikilepie ate. Nikincho metorikoi iyiook Enkiyang'et Sinyati alang ilkuaki loo nkulie kanisani pee meji iyiook anaa enajo Yesu te Matayo 15: 7-9, "*Lo sunkuro, enotoko Isaya tenaibon enye pee ejo, 'Aayanyit ele orere too nkutukie, kake kaalakuaniki iltauja lenye; naa pesho aaserem ninche nanu, aa nkitanapat oo ltung'ana eitudupaa anaa ae ninche enkiteng'enare nasipa.'*"

Matadamu sii aajo pesho kuna baa pooki nikitejo tene tinimikisuj aapik iroruat. Keikok Yakobo 1: 22-25 enaipirta ina bae, naa kejo,

*Kake entaa ilaasak lo rorei, mme laning'ok ake ilejileje ate. Amu teneaku ake oltung'ani olaning'oni lo rorei, mme olaasani, netiu ninye anaa oltung'ani oing'or enkomom enye te nking'uret. Amu eing'or ninye enkomom enye, ore pee elo, nerikino nabo kata enaikununo. Kake ore olojur asipu inkitanapat bayarot, inkitanapat e lakunoto, nesheikino, nemetiu anaa elde ake oning nerikino, kake olaasani oata nkiaasin, ore ilo nemaiyiani tiatua iyasat enena.*

Matadamu sii enajo Ilmaasai too Ndung'eta e rashe, "*Meeta enebaya olorora lenkutuk,*"<sup>15</sup> aa inchere teniro imbaa tenkutuk nimintabaya too nkiasin naa pesho. Nejo sii inchere, "*Medung olorora le nkutuk ong'ata,*"<sup>16</sup> aa inchere imelioo toonkonyek imbaa nijo tenkutuk ake tenimipik inkiasin. Neitoki aajo, "*Opi kutuk oya*

*enkop,*<sup>17</sup> aa inchere ketii oltung'ani laa ore teneiro naa keyiolo pooki toki naa ng'en oleng kake meitabaya too nkiasin nena naajoito. Nejo sii oltung'ani obo, "*Mme lasima pee idol iroruat pooki eton eitu ilo dukuya, neaku ore pee idol eroruata nabo nilo dukuya te nkirukoto.*"<sup>18</sup> Nejo likae, "*Meidip eyiolounoto, easata naidip. Meidip sii enyorraroto, easata naidip.*"<sup>19</sup> Nejo Ilmaasai, "*Menyaanyuk inyuat o nkidimat.*" Nejo Yesu kewan, "*Mme pooki tung'ani laajo 'Olaitoriani, Olaitoriani,' ojing enkitoria e Nkai, kake ilo oas enayieu Papa lai otii shumata*" (Matayo 7: 21).

Meisisi Enkai Olaitoriani lang tenebo Olaitajeunoni lang Yesu Kristo tiatua Enkiyang'et Sinyati. Mikinchoo Enkai eng'eno o engolon pee ias esiai enye. Mikitamayiana Enkai iyie pee iaku sii emayianata too lkulikae. Mikinchoo sii Enkai eng'iriata pee irikoo ilairukok anaa olchekut supat. Mikitaretu Enkai pee idamu aitarasaki ninye enchalan ino nisilig ninye pee eibeleyenya ina shalan metaa engolon. Minauru te nkomono. Iuloki enkomono anaake pee ias esiai Enkai toltau owang. Mikimputa Enkai te nyorrata enye pee inyor sii ilkulikae. Metaa empiris, esipata, o enyorrata tenebo intae pooki anaake.

Ashe oleng, Paul Highfield oji sii Saruni Ole Ntaya tenkop Olmaasai, 2014.

## IMBUKUI NATAASISHORE PEE AITOBIR ENA BUKU (Endnotes)

<sup>1</sup> Paul Highfield, *Enkishui o Enkiteng'enare e Yesu* (Springfield, Missouri: Christian Restoration Ministries, 2011) 259-260. Printed by Word Alive in Nairobi Kenya. Ing'orai sii Frederick Dale Bruner, *Matthew: A Commentary Volume 2: The Churchbook Matthew 13-18* (Grand Rapids, Michigan: William B. Eerdmans Publishing Company, 1990) 414, 415 pee idol indamunot enyena naaipirta ina bae.

<sup>2</sup> Frederick Dale Bruner, *Matthew: A Commentary Volume 2: The Churchbook Matthew 13-18* (Grand Rapids, Michigan: William B. Eerdmans Publishing Company, 1990) 414.

<sup>3</sup> Bruner, (Matthew 13-28) 415. Nejo ninye te Kingeresa, "The part of the human race given to each one daily is the disciple's main way to love the world."

<sup>4</sup> Bruner, (Matthew 13-28) 418.

<sup>5</sup> Highfield, *Enkishui e Yesu*, 114-115.

<sup>6</sup> Kyle Idleman, *Not a Fan* (Grand Rapids, Michigan: Zondervan pub. co., 2011) 29-38.

<sup>7</sup> Idleman, 38-214.

<sup>8</sup> C. David Jones, *The Apostles of Jesus Christ* (Fort Wayne, Indiana: Phalanx Associates, 2010) 75.

<sup>9</sup> Paul Highfield, *Enkare Naishu: Embolunoto Embuku e Yohana* (Springfield, MO: Christian Restoration Ministries, 2013) 75. Printed by Total Printing Systems, Newton, IL.

<sup>10</sup> Paul Highfield, *Enkishui e Yesu*, 115.

<sup>11</sup> Highfield, *Enkishui e Yesu*, 81-86.

<sup>12</sup> Paul Highfield, *Enkipankata oo Nkisomaritin e Kanisa - Olari le dukuya* (Springfield, MO: Christian Restoration Ministries, 2009) 5-7. Printed by Faith Printing, 824 Bills Rd., Franklin, IL 63638.

<sup>13</sup> Highfield, *Enkipankata oo Nkisomaritin e Kanisa - Olari le dukuya*, 108. Eitobira likae tung'ani ina kisoma apa naasishore nanu te mbuku ai kake meekure ayiolo ajo kaing'ae oitobira.

<sup>14</sup> <http://balancedpreaching.com/articles/Balanced%20Preaching.pdf>.

<sup>15</sup> Menye Patita, Olormaitai.

<sup>16</sup> S. S. Sankan, *Intepen e Maasai* (Nairobi: National Literature Bureau, 1979) 81, nampa 158.

<sup>17</sup> Sankan, 82, nampa 171.

<sup>18</sup> Dr. Martin Luther King Jr.

<sup>19</sup> Johann Wolfgang von Goethe.